

MESYUARAT PERTAMA, PENGGAJAL KELIMA
PARLIMEN KEEMPAT BELAS
2022

HARI ISNIN : 7 MAC 2022

**JAWAPAN-JAWAPAN BAGI PERTANYAAN-PERTANYAAN JAWAB
LISAN YANG TIDAK DIJAWAB DI DALAM DEWAN
(SOALAN NO. 11 HINGGA NO. 93)**

NOTA : [RUJUK PENYATA RASMI HARIAN (HANSARD)]

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : TUAN ABDUL LATIFF BIN ABDUL RAHMAN
[KUALA KRAI]**

TARIKH : 7 MAC 2022 | ISNIN

SOALAN

TUAN ABDUL LATIFF BIN ABDUL RAHMAN [KUALA KRAI] minta **PERDANA MENTERI** menyatakan adakah Lembaga Tabung Haji berhasrat untuk mendapatkan semula hotel-hotel Tabung Haji yang dahulu dipindah milik kepada Urus Harta Jemaah Sdn Bhd memandangkan sektor pelancongan tempatan telah kembali rancak dan seringkali hotel-hotel ini merekodkan kadar tempahan yang tinggi.

JAWAPAN

**SENATOR DATUK HAJI IDRIS HAJI AHMAD
MENTERI DI JABATAN PERDANA MENTERI
(HAL EHWAL AGAMA)**

Tuan Yang Di-Pertua,

Untuk makluman Ahli Yang Berhormat,

1. Sektor pelancongan merupakan salah satu sektor yang terkesan dengan penularan wabak Covid-19 dan ianya menerima manfaat dari pembukaan semula sektor perniagaan negara sejak suku ketiga tahun 2021. Namun masih terdapat risiko penularan varian-varian baru seperti Omicron dan sempadan negara juga masih belum dibuka sepenuhnya kepada pelancong asing.
2. Lembaga Tabung Haji (**TH**) sentiasa memerhati dan menilai peluang-peluang pelaburan di dalam dan luar negara berdasarkan risiko yang berpatutan. Penelitian ini akan mengambil kira peluang pelaburan di dalam sektor-sektor yang berpotensi mencatatkan keuntungan dan memberi nilai tambah terhadap pendeposit **TH**.
3. **TH** tidak menolak kemungkinan untuk melabur semula di dalam aset-aset dan pelaburan-pelaburan yang di bawah UJSB, tidak terhad kepada hotel-hotel yang telah dipindahmilik sahaja. Kajian dan penelitian akan dibuat di TH sekiranya ia selari dengan alokasi aset strategik **TH** dan mengambil kira penilaian unsur-unsur komersil dan pulangan keuntungan untuk memelihara kepentingan **TH** dan seterusnya pihak pendeposit.
4. Namun, **TH** juga akan meneroka dan menilai peluang pelaburan selain daripada aset yang berada dibawah UJSB, yakni aset-aset dan peluang pelaburan-pelaburan yang berada di pasaran, tertakluk kepada pelaburan yang berdaya maju dan memberi pulangan yang baik untuk manfaat pendeposit.

SOALAN NO. : 12

PEMBERITAHUAN PERTANYAAN JAWAB LISAN DEWAN RAKYAT MESYUARAT PERTAMA, PENGGAL KELIMA PARLIMEN KEEMPAT BELAS 2022

PERTANYAAN : LISAN

DARIPADA : TUAN R. SIVARASA [SUNGAI BULOH]

TARIKH : 7 MAC 2022 (ISNIN)

SOALAN

TUAN R. SIVARASA [SUNGAI BULOH] minta **MENTERI PERUSAHAAN PERLADANGAN DAN KOMODITI** menyatakan apakah tindakan yang akan diambil oleh Kementerian selepas perintah larangan dikeluarkan oleh agensi Amerika Syarikat *US Customs and Border Protection* (CBP) terhadap minyak sawit yang dieksport ke US oleh Sime Darby Plantations Bhd. (SDP) atas dapatan mereka bahawa ada keterangan 'munasabah' atau *reasonable evidence* untuk membuktikan SDP telah gunakan amalan buruh paksa dalam kutipan buah dan pengeluaran minyak sawit yang dieksport ke US.

JAWAPAN

Tuan Yang Di-Pertua,

Dapatan oleh *Custom and Border Protection* (CBP), Amerika Syarikat ini sudah tentu memberi persepsi buruk terhadap industri sawit Malaysia dan turut menjejaskan reputasi produk sawit negara. Oleh itu, pihak Kementerian Perusahaan Perladangan dan Komoditi dengan kerjasama Kementerian Luar Negeri (Wisma Putra) telah mengadakan perbincangan bersama wakil syarikat Sime Darby dan FGV untuk membantu mereka merancang pelan tindakan susulan yang wajar diambil.

Selain daripada itu, Kementerian melalui MPOB juga turut mengadakan perbincangan secara berterusan dengan Biro Hal Ehwal Buruh Antarabangsa (ILAB) yang merupakan sebuah agensi di bawah Jabatan Buruh Amerika Syarikat bagi menyelesaikan isu buruh paksa dalam industri sawit Malaysia.

Dengan kerjasama Majlis Pensijilan Minyak Sawit Malaysia (MPOCC), pihak ILAB telah dipelawa untuk memberi input ketika sesi pandangan awam (*public comment*) atau libat urus pemegang taruh bagi cadangan penambahbaikan MSPO yang telah diadakan pada pertengahan tahun 2021.

MPOB Washington DC sentiasa menyalurkan maklumat berkaitan usaha yang diambil oleh Malaysia dalam menangani isu buruh paksa ini kepada pihak ILAB CBP dan pemegang taruh berkaitan di Amerika Syarikat. Misalnya, maklumat bertajuk *National Action Plan on Forced Labour* (2021-2025) telah disampaikan kepada mereka baru-baru ini bagi menggambarkan komitmen jitu oleh Kerajaan Malaysia dalam menangani isu buruh paksa.

Bagi memastikan kelangsungan dalam usaha menangani perkara ini juga, Kementerian melalui MPOB turut mengadakan perbincangan dengan pihak CBP bagi memastikan tiada diskriminasi terhadap produk sawit Malaysia yang lain. Bahkan, MPOB turut membantu pengimport di Amerika Syarikat untuk mendapatkan pembekal alternatif dari Malaysia jika pembekal sedia ada menghadapi sekatan oleh CBP.

SOALAN NO. : 12

Kementerian Perusahaan Perladangan dan Komoditi sekali lagi menekankan bahawa industri minyak sawit di Malaysia beroperasi di bawah piawaian ketat selaras dengan agenda matlamat pembangunan lestari seperti mana yang digariskan oleh Pertubuhan Bangsa-Bangsa Bersatu bagi memastikan semua orang menikmati keamanan dan kemakmuran.

Kerajaan melalui Kementerian Perusahaan Perladangan & Komoditi, Kementerian Sumber Manusia dan Kementerian Dalam Negeri telah menjalin hubungan kerjasama yang erat dengan Pertubuhan Buruh Antarabangsa (ILO) dalam memerangi isu buruh paksa dan buruh kanak-kanak dalam sektor kelapa sawit. Melalui kerjasama ini, pelbagai program kesedaran mengenai amalan baik bagi memastikan kesejahteraan pekerja buruh telah dijalankan oleh pihak Kerajaan secara berterusan bagi mendidik pengusaha-pengusaha ladang mengenai elemen buruh paksa dan buruh kanak-kanak di ladang kelapa sawit bagi memastikan perkara ini dielakkan sama sekali.

Sejak Perintah Pelepasan Penahanan (WRO) dikenakan oleh CBP, pihak SDP juga dilaporkan telah melaksanakan audit menyeluruh syarikat mereka oleh organisasi bebas bagi meneliti amalan-amalan yang dikaitkan dengan buruh paksa untuk diperbaiki dan juga diubah.

Dalam hal ini, SDP juga telah membuat proses membayar balik yuran pengambilan semasa dan bekas pekerja asing yang berjumlah RM82.02 juta (sejak 17 Februari 2022) setelah audit tersebut selesai dilaksanakan. Pekerja-pekerja asing tersebut adalah dari Indonesia, Bangladesh, India, Nepal, Myanmar, Kemboja, Sri Lanka dan Pakistan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : JAWAB LISAN

**DARIPADA : TUAN NIK MOHAMAD ABDUH BIN NIK
ABDUL AZIZ [BACHOK]**

TARIKH : 7 MAC 2022 (ISNIN)

SOALAN

TUAN NIK MOHAMAD ABDUH BIN NIK ABDUL AZIZ [BACHOK] minta **MENTERI ALAM SEKITAR DAN AIR** menyatakan usaha dan langkah - langkah Kementerian untuk mengatasi penggunaan plastik yang sering dikaitkan dengan pencemaran sisa plastik yang mengancam kehidupan manusia dan marin.

JAWAPAN

Tuan Yang Di-Pertua,

1. Kementerian Alam Sekitar dan Air (KASA) komited dalam usaha menangani pencemaran sisa plastik khususnya plastik sekali guna yang menyebabkan pencemaran di ekosistem darat, air dan marin. Bagi memantapkan usaha Kerajaan dalam mengatasi pencemaran sisa plastik ini, KASA telah membangunkan Rangka Kerja Pelestarian Plastik 2021-2030 (*Malaysia Plastics Sustainability Roadmap 2021-2030 – MPSR*) yang berperanan sebagai panduan kepada semua pemegang taruh dalam memastikan kelestarian plastik di sepanjang rantai nilai, berteraskan konsep ekonomi kitaran dan prinsip kitaran hayat. Objektif pelaksanaan Roadmap ini adalah untuk menangani pencemaran plastik secara mampan dalam memastikan kemakmuran ekonomi, kesihatan dan kesejahteraan sosial negara.

2. Selari dengan Rancangan Malaysia ke-12, Roadmap ini juga adalah sebagai pelengkap kepada inisiatif ekonomi kitaran sisa pepejal yang sedang dibangunkan oleh Kementerian Perumahan dan Kerajaan Tempatan (KPKT).
3. Bagi menangani pencemaran sisa marin termasuk plastik, Mesyuarat Jemaah Menteri pada 26 November 2021 telah meluluskan **Dasar dan Pelan Tindakan Sisa Marin Kebangsaan 2021 - 2030**. Dasar dan Pelan Tindakan ini menggariskan 5 tonggak utama dengan 17 pelan tindakan dan 103 aktiviti dalam usaha menangani isu pencemaran sisa marin.
4. KASA telah mendapat kelulusan daripada Jemaah Menteri dan Majlis Negara bagi Kerajaan Tempatan (MNKT) pada 18 November 2020 untuk pelaksanaan **Kempen Tiada Beg Plastik oleh Pihak Berkuasa Tempatan (PBT)** secara seragam di seluruh negara. Kempen ini adalah selaras dengan Pelan Hala Tuju Malaysia ke arah Sifar Plastik Sekali Guna 2018 - 2030 yang telah diperkenalkan pada 17 Oktober 2018.
5. Melalui kempen ini, semua premis perniagaan di seluruh Malaysia akan mengenakan caj minimum 20 sen bagi setiap beg plastik yang diberikan kepada pelanggan di kaunter pembayaran. Pengenaan caj ini adalah berpandukan prinsip *user-pays-principle* (dengan izin) yang bertujuan untuk menghindari penggunaan plastik sekali guna dan pada masa yang sama mendorong pengguna untuk membuat keputusan yang lebih mesra alam. Selain itu, pelaksanaan pemberian straw minuman atas permintaan juga turut dilaksanakan melalui kempen ini.
6. Setakat ini, 6 Kerajaan Negeri telah menyambut baik pelaksanaan Kempen Tiada Beg Plastik. Untuk makluman, kerajaan negeri **Pulau Pinang** telah memperkenalkan caj pencemaran melalui Kempen Hari Tanpa Beg Plastik sejak tahun 2009 diikuti oleh negeri **Selangor** bermula Januari 2020. Negeri **Perlis** dan **Johor** juga telah melaksanakan Kempen ini bermula tahun 2021. Liputan pelaksanaan kempen ini terus meluas dengan pelaksanaan di Negeri **Pahang** bermula pada Januari 2022 dan bakal menyusuli oleh Negeri

Terengganu pada bulan Mac 2022. **Wilayah Persekutuan** pula telah melaksanakan larangan penggunaan beg plastik berasaskan petroleum dan mengenakan caj 20 sen ke atas beg biodegradasi sejak 15 Mac 2019.

7. KASA dengan ini mengucapkan setinggi-tinggi penghargaan dan ucapan terima kasih kepada negeri-negeri dan PBT yang telah menyambut baik inisiatif KASA dalam melestarikan alam sekitar.

8. Bagi negeri-negeri yang belum menjalankan Kempen ini, sesi libat urus yang berterusan akan dilakukan oleh pihak KASA bersama pihak Kerajaan Negeri dan PBT sepanjang tahun ini untuk mereka berbuat sedemikian.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS**

PERTANYAAN : LISAN

**DARIPADA : YB PUAN VIVIAN WONG SHIR YEE
(SANDAKAN)**

TARIKH : 07 MAC 2022 (ISNIN)

SOALAN

PUAN VIVIAN WONG SHIR YEE [SANDAKAN] minta **MENTERI KANAN KERJA RAYA** menyatakan bilakah Kementerian akan membaiki jalan raya Persekutuan dari Sandakan ke Telupid yang mana sudah hampir tidak boleh dilalui untuk pemandu kenderaan di mana ianya juga membahayakan nyawa kesemua pengguna jalan raya sejak Oktober tahun lepas

JAWAPAN

Tuan Yang Di-Pertua,

Untuk makluman Ahli yang Berhormat, Kementerian Kerja Raya mengambil maklum setiap isu yang dibangkitkan oleh Ahli Yang Berhormat. Kementerian ini sentiasa komited dalam melaksanakan program penyenggaraan Jalan Persekutuan di Negeri Sabah bersama agensi pelaksana iaitu JKR Negeri Sabah melalui program Penyenggaraan Rutin, Penyenggaraan Berkala Pavemen dan Penyenggaraan Berkala Bukan Pavemen.

Pada tahun 2022, Kementerian Kerja Raya telah memperuntukkan sejumlah Ringgit Malaysia: Tujuh Perpuluhan Sembilan Juta (RM7.9 juta) bagi melaksanakan penyenggaraan rutin dan kerja-kerja berkala di Laluan Dua Puluh Dua (22) iaitu Jalan Persekutuan dari Sandakan ke Telupid. Kerja-kerja tersebut sedang dalam proses pelaksanaan oleh konsesi Jalan Persekutuan.

Selain itu, beberapa tindakan segera telah diambil oleh konsesi Jalan Persekutuan pada tahun 2021 sebagai langkah jangka pendek bagi menyelesaikan masalah jalan berlubang dari Kota Kinabalu ke Sandakan iaitu laluan dua puluh dua (22) termasuk laluan ke Telupid dengan melaksanakan penampalan jalan atau dengan izin (pothole patching) di bawah kerja-kerja Penyenggaraan Rutin. Kuantiti kerja tampalan lubang yang telah dilaksanakan di laluan tersebut adalah sebanyak dua puluh satu ribu, lapan ratus tujuh puluh sembilan meter persegi (21,879 m²). Manakala bagi jalan yang rosak teruk berpunca daripada kelemahan struktur pavemen, kerja-kerja penyenggaraan telah dilaksanakan di bawah program Penyenggaraan Berkala Pavemen dengan peruntukan penyenggaraan sebanyak Ringgit Malaysia: Tiga Puluh Perpuluhan Lima Juta (RM30.5 juta).

Untuk makluman Ahli Yang Berhormat juga, laluan dua puluh dua (22), iaitu Jalan Kota Kinabalu - Sandakan adalah termasuk dalam pelaksanaan Projek Lebuhraya Pan Borneo di bawah Pakej Kerja 28, 29 dan 30 iaitu jalan dari Batu Tiga Puluh Dua (32) ke Kampung Baoto Telupid yang baru sahaja bermula pada Oktober 2021. Projek ini melibatkan jajaran sepanjang lima puluh lapan perpuluhan sembilan kilometer (58.9km) dan dijangka siap pada Oktober 2024.

Kementerian ini sentiasa komited untuk memastikan segala aduan mengenai kerosakan jalan diambil tindakan segera bagi menjamin keselesaan pengguna jalan raya.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : JAWAB LISAN

DARIPADA : TUAN ANYI NGAU [BARAM]

TARIKH : 7 MAC 2022 (ISNIN)

SOALAN

TUAN ANYI NGAU [BARAM] minta **MENTERI ALAM SEKITAR DAN AIR** menyatakan apakah rancangan dan tindakan masa terdekat Kementerian untuk menyelesaikan masalah hakisan tebingan sungai seperti di Sungai Baram sehingga menjadi ancaman kepada keselamatan rumah-rumah panjang/kampung seperti rumah panjang Long Ikang, Kuala Tutoh, Long Bemang, Long Panai dan lain-lain yang dibina di tebingan Sungai Baram.

JAWAPAN

Tuan Yang Di-Pertua,

1. KASA melalui Jabatan Pengairan dan Saliran Malaysia (JPS) sedia maklum mengenai beberapa kawasan di tebingan Sungai Baram yang mengalami hakisan tebing sungai yang serius di Sungai Baram seperti Kg. Benawa, SK Long Naah, SK Ubong Imang, SK Long Jegan, Pekan Long Lama, Long Bemang, Long Ikang, Kuala Tutoh dan Long Panai.
2. Sehubungan itu, JPS telah melaksanakan Projek Pembinaan Retaining Wall Sungai Baram berhampiran Bandar Marudi dengan kos keseluruhan RM 9.36 Juta yang telah siap pada 22 Januari 2022
3. Selain daripada itu, beberapa projek telah diangkat di bawah Permohonan RP3 Tahun 2023 yang melibatkan Sungai Baram tertakluk kepada kelulusan.

Sekian, terima kasih.

**PEMBERITAHUAN PERTANYAAN LISAN DEWAN
RAKYAT MESYUARAT PERTAMA, PENGGAL KELIMA
PARLIMEN 2022 KEEMPAT BELAS 2022**

PERTANYAAN : LISAN

**DARIPADA : TUAN DR. KELVIN YII LEE WUEN
[BANDAR KUCHING]**

TARIKH : 7 MAC 2022 (ISNIN)

SOALAN

DR. KELVIN YII LEE WUEN [BANDAR KUCHING] minta **PERDANA MENTERI** menyatakan tentang perkembangan pengumuman Kerajaan untuk meminda Seksyen 309 Kanun Keseksaan untuk *Decriminalise Attempted Suicide* untuk menangani isu peningkatan jumlah cubaan membunuh diri di seluruh Malaysia.

JAWAPAN

**YB DATO SRI DR. HAJI WAN JUNAIDI BIN TUANKU JAAFAR,
MENTERI DI JABATAN PERDANA MENTERI
(PARLIMEN DAN UNDANG-UNDANG)**

Tuan Yang di-Pertua,

Untuk makluman Ahli Yang Berhormat, Kerajaan melalui Jabatan Peguam Negara (AGC) telah mengambil inisiatif untuk mengkaji undang-undang berkenaan dengan kesalahan persubahatan dan percubaan membunuh diri di Malaysia memandangkan sejak kebelakangan ini insiden percubaan membunuh diri semakin meningkat dan meliputi pelbagai peringkat umur. Isu percubaan membunuh diri menjadi lebih meruncing pada masa ini disebabkan keadaan ekonomi yang tidak menentu sehingga ramai orang yang kehilangan sumber pendapatan atau

hilang pekerjaan seterusnya membawa kepada tekanan emosi. Oleh yang demikian, pendekatan yang lebih holistik perlu diambil untuk mengekang perbuatan tersebut.

Berdasarkan hasil kajian, perbandingan peruntukan undang-undang mengenai percubaan untuk membunuh diri di United Kingdom, New Zealand, India dan Singapura mendapati negara-negara tersebut telah mengeluarkan percubaan membunuh diri daripada sistem keadilan jenayah dan memasukkan orang yang membuat percubaan membunuh diri ke dalam sistem rawatan kesihatan. Ini bermakna percubaan membunuh diri bukan lagi suatu kesalahan jenayah di negara-negara tersebut.

Oleh itu, AGC telah menimbang cadangan daripada pihak berkepentingan untuk mengeluarkan percubaan membunuh diri daripada sistem keadilan jenayah dan memasukkan orang yang membuat percubaan membunuh diri ke dalam sistem rawatan kesihatan.

Berdasarkan dapatan kajian, AGC telah meneliti pilihan perundangan yang ada serta implikasi perundangan sekiranya kesalahan percubaan membunuh diri dikeluarkan daripada sistem keadilan jenayah. Di samping itu, AGC juga telah meneliti keperluan untuk meminda undang-undang lain yang berbangkit sekiranya kesalahan percubaan membunuh diri dikeluarkan daripada sistem keadilan jenayah bagi mengelak berlakunya kelompongan dalam undang-undang berkaitan perkara ini.

Kajian yang meliputi cadangan pindaan kepada undang-undang berkenaan telah hampir dimuktamadkan dan selanjutnya ia akan dikemukakan kepada Jemaah Menteri untuk kelulusan bagi pindaan undang-undang yang dicadangkan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGKAL KELIMA
PARLIMEN KEEMPAT BELAS 2022**

PERTANYAAN : JAWAB LISAN

**DARIPADA : DATO' SERI UTAMA HAJI MUKHRIZ BIN TUN
DR. MAHATHIR [JERLUN]**

TARIKH : 7 MAC 2022 (ISNIN)

SOALAN

DATO' SERI UTAMA HAJI MUKHRIZ BIN TUN DR. MAHATHIR [JERLUN] minta **MENTERI ALAM SEKITAR DAN AIR** menyatakan apakah jaminan yang boleh diberikan kepada rakyat bahawa banjir besar tidak akan melanda lagi setelah mengambil kira kesan pemanasan global dan perubahan iklim. Apakah yang dibincang dengan Kerajaan-Kerajaan Negeri untuk pastikan Penilaian Impak Alam Sekitar diambil serius semasa mempertimbangkan permohonan pembangunan di satu-satu kawasan.

JAWAPAN

Tan Yang Di-Pertua,

1. Untuk makluman Yang Berhormat, berdasarkan Laporan Kumpulan Kerja Pertama IPCC yang telah diumumkan pada 9 Ogos 2021 lalu, negara diunjurkan akan mengalami peningkatan suhu permukaan di antara 1.9°Celsius (°C) hingga 2.1°C pada penghujung abad ini. Dengan peningkatan suhu ini, purata taburan hujan akan turut meningkat sebanyak 14% hingga 25% manakala paras laut dijangka turut meningkat sehingga 0.73 meter dalam tempoh yang sama. Malaysia sememangnya terdedah kepada kejadian banjir kerana bentuk muka bumi serta sistem iklim yang mempunyai kadar kelembapan yang tinggi. Kejadian banjir sememangnya tidak dapat dielakkan daripada berlaku kerana ianya terjadi disebabkan

oleh banyak faktor-faktor bukan iklim (*non-climatic drivers*) dan perubahan iklim.

2. Dengan adanya kesan perubahan iklim dan pembangunan yang pesat, risiko banjir besar berlaku akan meningkat dan impaknya lebih besar sekiranya tiada tindakan adaptasi untuk mengatasinya pada masa akan datang. Kementerian komited dalam usaha untuk mengurangkan kemudahterancaman dan meningkatkan daya tahan terhadap impak perubahan iklim. Kerajaan sentiasa proaktif dan mengambil pendekatan berperingkat atau '*stepwise approach*' dalam perancangan jangka panjang untuk menangani impak perubahan iklim.

3. Strategi ini memerlukan integrasi dan perancangan bersepadu untuk pengurangan risiko bencana dan mengelakkan kerugian dan kerosakan (*loss and damage*). Ke arah itu, Kementerian sedang membangunkan Pelan Tindakan Adaptasi Kebangsaan (*National Adaptation Plan* - NAP). Untuk makluman Dewan, Kementerian dalam proses untuk mengemukakan permohonan kewangan iklim iaitu Dana Program Ketersediaan atau *Readiness Programme*, *Green Climate Fund* bagi tujuan ini.

4. Kementerian juga memberi fokus kepada pendekatan secara struktur dan bukan struktur dalam perancangan menangani perubahan iklim seperti berikut:

- i. **membangunkan struktur dan reka bentuk infrastruktur tebatan banjir berkonsepkan *make room for water*** seperti menaik taraf sistem pengurusan banjir, pantai dan sungai-sungai utama serta menaik taraf benteng/ban pantai/ sungai dan parit dengan meningkatkan tahap perlindungan (kala purata ulangan banjir atau *Average Recurrence Interval* [ARI]) dengan menaikkan reka bentuk infrastruktur saluran dan pantai daripada 100 tahun ARI kepada 200 tahun ARI;
- ii. **penggunaan mandatori pelan-pelan dan garis panduan Manual Saliran Mesra Alam (MSMA) dan Pelan Induk Saliran Mesra Alam (PISMA) oleh Kerajaan Negeri dan Pihak**

- Berkuasa Tempatan (PBT)**, dan memperkasa pematuhan Pelan Hakisan dan Kelodak (ESCP);
- iii. **meningkatkan kesedaran awam** dengan pelaksanaan *Public Outreach Programme* (POP) dan kempen kesedaran alam sekitar melalui pendekatan komunikasi, pendidikan dan hebahan awam atau *communication, education and public awareness* (CEPA). Salah satu pendekatan yang akan diperkenalkan adalah pelaksanaan latihan menghadapi banjir (*flood drills*).
 - iv. **memperkasa pelaksanaan pendekatan Pengurusan Lembangan Sungai Bersepadu / *Integrated River Basin Management* (IRBM)** dalam pengurusan lembangan sungai.; dan
 - v. **mewujudkan pusat ramalan cuaca numerikal kebangsaan (*numerical weather prediction - NWP*)** yang merangkumi pembangunan pusat komputer prestasi tinggi serta pembangunan, pengoperasian dan penyelidikan model cuaca.
5. Kerajaan juga komited dalam usaha untuk mengarusperdanakan dasar perubahan iklim di peringkat negeri melalui dua platform perbincangan dengan kerajaan negeri iaitu Mesyuarat Menteri-menteri Alam Sekitar dan Ahli-Ahli Majlis Mesyuarat Kerajaan Negeri yang Bertanggungjawab mengenai Alam Sekitar (MEXCOE) dan Majlis Tindakan Perubahan Iklim (MyCAC) yang dipengerusikan oleh YAB Perdana Menteri. Melalui platform-platform ini, Kementerian berharap agar perancangan dan pelaksanaan tindakan adaptasi mendapat perhatian yang serius dan kerjasama daripada Kerajaan-kerajaan Negeri.
6. KASA melalui Jabatan Alam Sekitar (JAS) juga secara berterusan melaksanakan libaturus secara langsung dengan pihak Kerajaan-Kerajaan Negeri bagi memastikan sesuatu cadangan pembangunan mengambilkira aspek penilaian impak kepada alam sekeliling.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS**

PERTANYAAN : LISAN

**DARIPADA : YB DATO' SRI ABDUL AZEEZ BIN ABDUL
RAHIM [BALING]**

TARIKH : 7 MAC 2022 (ISNIN)

SOALAN

Minta **PERDANA MENTERI** menyatakan apakah penambahbaikan yang akan dilaksanakan Kerajaan untuk meningkatkan kesedaran orang awam atau *public awareness* terhadap fungsi dan kepentingan sistem amaran bencana atau disaster warning system agar mereka sentiasa bersedia dan berwaspada menghadapi sebarang kemungkinan berlaku bencana.

JAWAPAN**DIJAWAB OLEH YB DATUK DR ABD LATIFF AHMAD
MENTERI DI JABATAN PERDANA MENTERI
(TUGAS-TUGAS KHAS)**

Tuan Yang di-Pertua,

1. Selaras dengan inisiatif pengurangan risiko bencana (DRR) yang turut memberi fokus kepada program pendidikan dan kesedaran, masyarakat yang berpengetahuan mengenai risiko bencana perlu dilahirkan menerusi program dan aktiviti agensi kerajaan, swasta atau pertubuhan bukan kerajaan (NGO). Program seperti ini bukan sahaja meningkatkan kesedaran dan pengetahuan masyarakat, malah mampu meningkatkan kapasiti dan tindak balas masyarakat dalam menghadapi bencana.
2. Tanggungjawab pelaksanaan pelbagai inisiatif DRR ini bukan sahaja terletak pada sesebuah agensi sahaja. Namun, perkembangan terkini dalam pengurusan bencana di seluruh dunia menunjukkan inisiatif pengurangan risiko bencana perlu dijalankan secara sistematik, terselaras dan cekap merentasi pelbagai sektor.
3. Berdasarkan Arahan Majlis Keselamatan Negara (MKN) No. 20, Agensi Kerajaan yang membangun serta menyelenggara sistem amaran bencana antara lain perlu melaksanakan program kesedaran awam dan kesiapsiagaan awam untuk bertindak terhadap maklumat dan amaran daripada sistem amaran awal yang dibangunkan. Di Malaysia, agensi-agensi teknikal berkaitan pengurusan bencana bertanggungjawab membangun dan menyelenggara antara lain seperti berikut:

JENIS BENCANA	AGENSI	JENIS SISTEM AMARAN BENCANA
Banjir	Jabatan Pengairan dan Saliran	Siren banjir dan Program Ramalan dan Amaran Banjir (PRAB)
Tsunami	Jabatan Meteorologi	Siren Amaran Tsunami

Hujan berterusan sewaktu Monsun	Malaysia	Amaran cuaca mengikut peringkat
Tanah runtuh	1. Kementerian Kerja Raya 2. Jabatan Mineral dan Geosains Malaysia	Sistem Amaran Awal Tanah Runtuh

4. Agensi Pengurusan Bencana Negara (NADMA) selaku peneraju pengurusan bencana berperanan sebagai penyelarasan kesedaran awam yang melibatkan agensi-agensi berkaitan. Manakala dari segi pelaksanaan program kesedaran awam berkaitan fungsi dan kepentingan sistem amaran bencana, tanggungjawab utama terletak pada agensi kerajaan yang berkaitan sama ada secara bersendirian atau bekerjasama dengan NADMA serta pelbagai pihak lain seperti NGO.

5. NADMA komited untuk terus meningkatkan penyelarasan pelaksanaan program-program *Community Based Disaster Risk Management* (CBDRM) bersama setiap peringkat komuniti bagi meningkatkan tahap kesedaran dan kesediaan rakyat terhadap pengurusan bencana dengan kerjasama pelbagai agensi termasuk badan-badan bukan kerajaan (NGO), ahli-ahli akademik, institusi pengajian tinggi, pihak swasta dan syarikat berkaitan kerajaan (GLC).

6. Dalam hal ini, NADMA akan terus meningkatkan kerjasama antara Kementerian, Kerajaan Negeri dan di peringkat daerah bagi melaksanakan program-program CBDRM yang memperkasakan komuniti dalam menghadapi bencana.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : JAWAB LISAN

**DARIPADA : TUAN SIVAKUMAR VARATHARAJU NAIDU
(BATU GAJAH)**

TARIKH : 7 MAC 2022 (ISNIN)

SOALAN

TUAN SIVAKUMAR VARATHARAJU NAIDU [BATU GAJAH] minta **MENTERI PERUSAHAAN PERLADANGAN DAN KOMODITI** menyatakan tentang rancangan Kementerian untuk mengurangkan kebergantungan kepada tenaga kerja asing di sektor perladangan serta usaha-usaha yang diambil untuk menggalakkan orang tempatan menceburi sektor ini yang kini dipenuhi lebih daripada 80% oleh pekerja asing.

JAWAPAN

Tuan Yang di-Pertua,

Untuk makluman Ahli Yang Berhormat, sehingga ke hari ini, belum ada lagi kemasukan pekerja asing yang baharu di sektor perladangan (dan juga sektor-sektor lain) sejak berlakunya pandemik COVID-19. Antara rancangan dan langkah-langkah yang diambil oleh Kementerian bagi mengurangkan kebergantungan kepada tenaga kerja asing di sektor perladangan adalah seperti berikut:

- i. Kerajaan sentiasa menyarankan penggiat industri untuk mengadaptasi penggunaan mekanisasi dalam proses kerja. Mekanisasi bukan sahaja mempercepat proses kerja tetapi juga membantu mengurangkan kebergantungan kepada tenaga kerja manual. Bagi mempromosikan penggunaan mekanisasi dan automasi, Kementerian Perusahaan dan Perladangan Komoditi melalui Lembaga Minyak Sawit Malaysia telah menghasilkan lebih daripada 50 teknologi yang sedia untuk dikomersialkan.
- ii. Penubuhan Konsortium Penyelidikan Mekanisasi dan Automasi (MARCOP) juga diharapkan akan dapat membantu meningkatkan penggunaan teknologi dan jentera di ladang sawit dan mengubah lanskap sektor perladangan daripada berintensifkan buruh kepada berintensifkan modal.
- iii. KPPK telah mengadakan kolaborasi bersama pihak PERKESO dengan menganjurkan Karnival Kerjaya Agrikomoditi (secara atas talian) pada bulan Mac 2021. Karnival ini adalah merupakan salah satu platform untuk membantu pihak industri dalam menarik minat golongan belia menceburi sektor perladangan dan agrikomoditi di samping membuka peluang pekerjaan kepada warga tempatan yang terjejas akibat penularan wabak COVID-19.
- iv. Dengan harga pasaran minyak sawit mentah (MSM) yang melepasi paras RM7,000 satu tan buat pertama kali dalam sejarah pada 24 Februari yang lalu, para peneroka FELDA juga dilaporkan telah

mampu meraih pendapatan sehingga RM12,000 sebulan. Bagi memastikan proses penuaian buah sawit tidak tertangguh dan menyebabkan kerugian akibat buah yang rosak, adalah penting bagi pihak industri untuk menggaji tenaga kerja yang mencukupi bagi melakukan kerja-kerja tersebut.

- v. KPPK akan melipatgandakan usaha untuk mengisi kekurangan tenaga kerja di sektor perladangan dan industri komoditi dengan mengadakan kempen bagi mengajak lebih ramai rakyat tempatan bekerja di sektor ini. KPPK akan terus bergerak ke arah memberi keutamaan kepada rakyat tempatan bekerja di sektor perladangan dan industri komoditi selain memperkasa modal insan melalui latihan dan kursus di bawah Institut Perladangan dan Komoditi Malaysia (IMPAC).

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : DATUK ZAKARIA BIN MOHD. EDRIS @ TUBAU
[LIBARAN]**

TARIKH : 7 MAC 2022 (ISNIN)

SOALAN

DATUK ZAKARIA BIN MOHD. EDRIS @ TUBAU [LIBARAN] minta **PERDANA MENTERI** menyatakan apakah usaha Kerajaan dalam transformasi kebangkitan ekonomi digital yang membolehkan perniagaan bersaing di dunia yang semakin saling berkaitan.

JAWAPAN

**DIJAWAB OLEH YB DATO' SRI MUSTAPA BIN MOHAMED
MENTERI DI JABATAN PERDANA MENTERI (EKONOMI)**

Tuan Yang di-Pertua,

1. Ekonomi digital didefinisikan sebagai aktiviti ekonomi dan sosial yang melibatkan pengeluaran dan penggunaan teknologi digital oleh individu, perniagaan dan kerajaan.

2. Perkembangan ekonomi digital dapat dinilai melalui sumbangannya kepada Keluaran Dalam Negeri Kasar (KDNK), pada tahun 2020 adalah sebanyak 22.6%, berbanding 19.2% pada tahun 2019. Manakala sumbangan e-Dagang kepada KDNK bagi tahun 2020 adalah sebanyak 11.5% berbanding 8.5% pada tahun 2019.

3. MyDIGITAL merupakan agenda Kerajaan dalam mentransformasi Malaysia menjadi sebuah negara berpendapatan tinggi yang berpacuan pendigitalan dan juga menjadi peneraju serantau dalam ekonomi digital. MyDIGITAL merupakan pelengkap kepada dasar pembangunan negara dan dirangka sejajar dengan Wawasan Kemakmuran Bersama (WKB 2030) dan Rancangan Malaysia Kedua Belas (RMKe-12).

4. Rangka Tindakan (*Blueprint*) Ekonomi Digital Malaysia telah dilancarkan pada 19 Februari 2021 mengandungi enam teras strategik yang terdiri daripada 22 strategi, 48 inisiatif nasional serta 28 inisiatif peringkat sektor dan dilaksanakan dalam tiga tempoh fasa pelaksanaan. Enam teras tersebut merangkumi keseluruhan ekosistem pembangunan ekonomi digital antaranya infrastruktur digital, bakat dan daya saing ekonomi. Bagi memastikan pelaksanaan inisiatif di bawah Rangka Tindakan berjalan lancar, Kerajaan telah mewujudkan Majlis Ekonomi Digital dan 4IR Negara yang dipengerusikan oleh YAB Perdana Menteri.

5. Kerajaan akan terus memberi tumpuan ke atas pembangunan ekonomi digital. Kerajaan juga telah menggariskan empat strategi yang mampu memperhebat ekonomi digital seiring dengan pelaksanaan inisiatif di bawah Rangka Tindakan dalam tempoh RMKe-12, iaitu:

- a. Menyediakan Persekitaran yang Menyokong Pertumbuhan Ekonomi Digital;
- b. Memperkukuh Penyediaan Infrastruktur dan Perkhidmatan Digital;
- c. Membangunkan Bakat Digital Tersedia Masa Hadapan; dan
- d. Menjadikan Malaysia sebagai Pusat Digital ASEAN.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : TUAN NIK NAZMI BIN NIK AHMAD
(SETIAWANGSA)**

TARIKH : 7 MAC 2022 (ISNIN)

SOALAN

TUAN NIK NAZMI BIN NIK AHMAD [SETIAWANGSA] meminta **MENTERI KANAN PERTAHANAN** menyatakan apakah status Dasar Industri Pertahanan dan Keselamatan Negara, yang dikatakan akan dilancarkan “dalam masa satu atau dua bulan lagi” pada awal November 2021 oleh YAB Perdana Menteri.

JAWAPAN

Tuan Yang di-Pertua,

Draf Dasar Industri Pertahanan dan Keselamatan Negara (DIPKN) kini dalam proses untuk mendapatkan kelulusan kabinet dan setelah diluluskan kelak, DIPKN dirancang untuk dilancarkan pada acara *Defence Services Asia* (DSA) 2022 pada hujung Mac tahun ini.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : TUAN SHAHARIZUKIRNAIN BIN ABD. KADIR
[SETIU]**

TARIKH : 7 MAC 2022 (ISNIN)

SOALAN

TUAN SHAHARIZUKIRNAIN BIN ABD. KADIR [SETIU] minta **PERDANA MENTERI** menyatakan jumlah peruntukan bagi membaik pulih infrastruktur di kawasan FELDA dalam kawasan Parlimen Setiu untuk tahun 2022.

JAWAPAN

**DIJAWAB OLEH YB DATO' SRI MUSTAPA BIN MOHAMED
MENTERI DI JABATAN PERDANA MENTERI (EKONOMI)**

Tuan Yang di-Pertua,

1. FELDA memperuntukan RM50 ribu/tahun diberikan bagi setiap Wilayah FELDA termasuk FELDA Wilayah Terengganu bagi tujuan baik pulih infrastruktur awam.
2. Merujuk kepada Garis Panduan Pengurusan Dana Kes Kecemasan di Rancangan FELDA berkuatkuasa 1 November 2021, FELDA telah memberi peruntukan Dana Kes Kecemasan bagi membantu peneroka yang ditimpa musibah bencana alam seperti kebakaran, banjir, tanah runtuh, ombak besar dan angin ribut. Setiap Wilayah FELDA akan diperuntukan sebanyak RM50,000 kepada Wilayah Besar (lebih daripada 20 rancangan) dan RM30,000 kepada Wilayah Kecil (kurang daripada 20 rancangan) pada setiap tahun.
3. Selain itu, pembaikan kemudahan awam di kawasan FELDA menggunakan Tabung Pembaikan Infrastruktur Awam di mana peruntukan disalurkan mengikut keperluan pihak rancangan. Antara kerja pembaikan yang menggunakan tabung tersebut adalah baik pulih tebing, jalan kampung, sistem perparitan dan bangunan komuniti. Penentuan kos pembaikan akan ditentukan oleh FELDA Investment Corporation Integrated Property Management (FICIPM) Sdn. Bhd.
4. Permohonan peruntukan baik pulih infrastruktur boleh dibuat kepada Pejabat FELDA Wilayah untuk pertimbangan Ibu Pejabat FELDA.

Sekian, terima kasih.

**KPEMBERITAHUAN PERTANYAAN LISAN DEWAN
RAKYAT MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : TUAN CHAN FOONG HIN
[KOTA KINABALU]**

TARIKH : 07 MAC 2022 (ISNIN)

SOALAN

Minta **PERDANA MENTERI** menyatakan apakah fungsi Majlis Pemulihan Negara (MPN) yang dipengerusikan oleh bekas Perdana Menteri, Muhyiddin Yassin sekiranya kabinet tidak diwajibkan untuk menerima nasihat-nasihat yang disyorkan MPN tersebut.

JAWAPAN

**DIJAWAB OLEH YB DATUK DR. ABD LATIFF BIN AHMAD,
MENTERI DI JABATAN PERDANA MENTERI
(TUGAS-TUGAS KHAS)**

Tuan Yang di-Pertua,

1. Majlis Pemulihan Negara (MPN) berfungsi untuk menyokong Jemaah Menteri dalam pelaksanaan langkah-langkah yang perlu diambil dalam Pelan Pemulihan Negara. Pelaksanaan Program Imunisasi COVID-19 Kebangsaan antara komponen utama dalam Pelan Pemulihan Negara untuk memastikan Kerajaan dapat memberi komitmen sepenuhnya untuk mengawal virus dan membawa ekonomi ke hadapan memasuki trajektori pertumbuhan.
2. Selain daripada itu, proses memudahcara pembukaan sektor-sektor ekonomi, sosial dan keagamaan turut diberi perhatian. MPN juga menjalankan fungsinya untuk mewujudkan kesedaran dalam kalangan masyarakat untuk mematuhi prosedur operasi standard (SOP) bagi membendung wabak COVID-19 supaya dapat beralih dari pandemik kepada endemik.
3. Justeru, segala syor dan pandangan oleh MPN akan dikemukakan kepada Jemaah Menteri untuk pertimbangan sebelum apa-apa keputusan diambil dengan mengimbangkan keperluan melindungi rakyat Keluarga Malaysia daripada COVID-19 dan juga pemulihan ekonomi negara khususnya sektor perniagaan serta pelancongan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA PENGGAL KELIMA
PARLIMEN KEEMPAT BELAS 2022**

PERTANYAAN : LISAN

DARIPADA : YB TUAN CHAN MING KAI [ALOR SETAR]

TARIKH : 7 MAC 2022 (ISNIN)

SOALAN

Minta **PERDANA MENTERI** menyatakan berapa jumlah permohonan bantuan khas pengurusan kematian COVID-19 diterima daripada setiap negeri dan berapa kes permohonan pada tahun 2021 yang masih belum selesai dibuat bayaran.

JAWAPAN

**DIJAWAB OLEH YB DATUK DR ABD LATIFF AHMAD
MENTERI DI JABATAN PERDANA MENTERI (TUGAS-TUGAS KHAS)**

Tuan Yang di-Pertua,

1. Sehingga 28 Februari 2022, Agensi Pengurusan Bencana Negara (NADMA) telah menerima sebanyak 38,431 permohonan Bantuan Khas Pengurusan Kematian COVID-19 NADMA. Daripada jumlah ini, sebanyak 17,867 permohonan yang layak dan lengkap, telah diluluskan dan bayaran telah dilaksanakan sebanyak RM89.335 juta, manakala 279 permohonan telah ditolak kerana tidak layak.
2. Pecahan 17,867 permohonan lulus mengikut negeri tempat kematian adalah seperti berikut:

NEGERI	BILANGAN PERMOHONAN LULUS	BAYARAN (RM)
Johor	1,535	7,675,000

Kedah	1301	6,505,000
Kelantan	780	3,900,000
Melaka	560	2,800,000
Negeri Sembilan	750	3,750,000
Pahang	505	2,525,000
Pulau Pinang	720	3,600,000
Perak	677	3,385,000
Perlis	97	485,000
Selangor	5,914	29,570,000
Terengganu	570	2,850,000
Sabah	1071	5,355,000
Sarawak	955	4,775,000
Kuala Lumpur	2,050	10,250,000
Labuan	190	950,000
Putrajaya	192	960,000
JUMLAH	17,867	89,335,000

3. Baki sebanyak 20,285 permohonan masih diproses yang turut meliputi permohonan dengan dokumentasi tidak lengkap dan memerlukan tindakan susulan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : JAWAB LISAN

**DARIPADA : DATO' SRI ABDUL AZEEZ BIN ABDUL
RAHIM [BALING]**

TARIKH : 7 MAC 2022 (ISNIN)

SOALAN

DATO' SRI ABDUL AZEEZ BIN ABDUL RAHIM [BALING] minta **MENTERI ALAM SEKITAR DAN AIR** menyatakan sejauh manakah status projek menyelenggara lembangan sungai dan menaik taraf tali air bagi mengatasi masalah banjir yang kerap berlaku di beberapa kawasan berisiko banjir khususnya di negeri Kedah.

JAWAPAN

Tuan Yang Di-Pertua,

1. KASA amat prihatin dengan masalah banjir yang berlaku di beberapa kawasan berisiko khususnya Negeri Kedah terutamanya banjir yang berlaku disebabkan oleh limpahan sungai. Justeru itu, KASA telah menyalurkan beberapa peruntukan pada tahun 2021 bagi perancangan jangka masa pendek, Projek Pemuliharaan Sungai Untuk Mengurangkan Risiko Banjir telah diluluskan oleh kerajaan persekutuan di bawah RMKe-12 bagi Negeri Kedah. Skop kerja yang terlibat di bawah projek ini adalah:

- i. Kerja-kerja pengaluran sungai;
- ii. Kerja-kerja menstabilkan tebing sungai;
- iii. Menaiktaraf aset tak alih; dan
- iv. Menaiktaraf saluran dan struktur berkaitan bagi meningkatkan kualiti air sungai

2. Kerja-kerja yang telah dilaksanakan adalah seperti berikut:-

- i. Kerja-kerja pemuliharaan sungai untuk mengurangkan risiko banjir sebanyak 58 kerja berjumlah RM4.7 juta; dan
- ii. Projek Berskala Kecil Di Bawah Inisiatif Program Strategik Memperkasa Rakyat dan Ekonomi (PEMERKASA) – Pemuliharaan Sungai Untuk Mengurangkan Risiko Banjir, sebanyak RM3 juta yang melibatkan 45 kerja.

3. Manakala bagi tahun 2022, sebanyak RM11.5 juta diperuntukkan bagi Projek Pemuliharaan Sungai Untuk Mengurangkan Risiko Banjir di Negeri Kedah melibatkan 66 kerja-kerja dalam peringkat pelaksanaan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : JAWAB LISAN

**DARIPADA : DATO' SERI ANWAR BIN IBRAHIM
[PORT DICKSON]**

TARIKH : 7 MAC 2022 (ISNIN)

SOALAN

DATO' SERI ANWAR BIN IBRAHIM [PORT DICKSON] minta **MENTERI ALAM SEKITAR DAN AIR** menyatakan langkah dan tindakan dalam menangani impak perubahan iklim di Malaysia dan pendirian terhadap pelaksanaan resolusi UN Climate Change Conference (COP26) di Glasgow.

JAWAPAN

Tan Sri Yang Di-Pertua,

1. Negara diunjurkan akan mengalami peningkatan suhu permukaan di antara 1.9°Celsius (°C) hingga 2.1°C pada penghujung abad ini. Dengan peningkatan suhu ini, purata taburan hujan akan turut meningkat sebanyak 14% hingga 25% manakala paras laut dijangka turut meningkat sehingga 0.73 meter dalam tempoh yang sama.

2. Bagi menangani impak perubahan iklim, Kementerian Alam Sekitar dan Air (KASA) sentiasa proaktif dan mengambil pendekatan berperingkat atau 'stepwise approach' dalam perancangan jangka pendek dan panjang. Ke arah itu, Kementerian dalam proses untuk mengemukakan permohonan kewangan iklim iaitu Dana Program Ketersediaan atau *Readiness Programme, Green Climate Fund* untuk membangunkan Pelan Tindakan Adaptasi Kebangsaan (*National Adaptation Plan, NAP*) yang dijangka akan siap pada tahun 2025 dan akan mengandungi perancangan tindakan adaptasi secara menyeluruh merangkumi lima (5) sektor utama iaitu:

- i. Keselamatan air dan sumber pesisir pantai (*Water security and coastal resources*);
- ii. Pertanian dan keselamatan makanan (*Agriculture and food security*);
- iii. Infrastruktur, tenaga dan persekitaran terbina (termasuk bandaraya) (*Infrastructure, energy and built environment (include cities)*);
- iv. Perhutanan dan Biodiversiti (*Forestry and biodiversity*); dan
- v. Kesihatan awam (*Public health*).

3. Selain itu, melalui tindakan adaptasi khusus bagi sektor air, Kementerian melalui NAHRIM juga telah menyediakan panduan pelaksanaan adaptasi perubahan iklim melalui penerbitan *Climate Change Adaptation Framework for Water Sector* atau Kerangka

Adaptasi Kebangsaan (NAF) yang akan memantapkan pelaksanaan adaptasi perubahan iklim di Malaysia.

4. Antara langkah pendekatan utama lain yang akan dilakukan oleh KASA untuk menangani impak perubahan iklim ialah:

- i. Mengukuhkan tadbir urus negara terhadap perubahan iklim melalui penglibatan semua pihak berkepentingan;
- ii. Melaksanakan pelbagai program untuk mendorong agenda perubahan iklim dengan menggerakkan sumber tenaga manusia dan peruntukan kewangan;
- iii. Memperkenalkan mekanisme pasaran karbon;
- iv. Menjalin kerjasama dengan semua pihak berkepentingan agar komitmen negara di bawah United Nations Framework Convention on Climate Change (UNFCCC) dapat dipenuhi; dan
- v. Memupuk gaya hidup hijau dalam semua lapisan masyarakat melalui konsep kesihatan planet (*planetary health*) ke arah pembangunan lestari yang holistik.

5. Untuk makluman Ahli Yang Berhormat, delegasi Malaysia yang diketuai oleh KASA telah mengikuti proses rundingan perubahan Iklim di Persidangan Ke-26 Negara Ahli kepada Konvensyen Rangka Kerja Perubahan Iklim Pertubuhan Bangsa-Bangsa Bersatu (UNFCCC COP-26) di Glasgow Scotland dari 31 Oktober hingga 12 November 2021. Secara umumnya, delegasi rundingan Malaysia telah mengikuti proses rundingan bagi isu-isu utama rundingan seperti berikut:

- i. Mekanisme pasaran karbon di bawah Perjanjian Paris;
- ii. Mekanisme ketelusan pelaporan perubahan iklim;
- iii. Jangka masa sepunya bagi pelaksanaan 'nationally determined contributions' (NDC);
- iv. Pembiayaan perubahan iklim; dan
- v. Adaptasi perubahan iklim.

6. Selain proses rundingan perubahan iklim, Malaysia turut menyertai beberapa deklarasi secara sukarela di luar proses rundingan iaitu *Global Methane Pledge* anjuran Amerika Syarikat dan Kesatuan Eropah dan *Glasgow Leader's Declaration on Forest and Land Use* anjuran United Kingdom selaku presiden persidangan UNFCCC COP-26.

7. Persidangan UNFCCC COP-26 telah menghasilkan keputusan yang dinamakan sebagai *Glasgow Climate Pact* yang turut merangkumi keputusan-keputusan bagi agenda rundingan oleh delegasi Malaysia. Secara umumnya, Glasgow Climate Pact telah berjaya memuktamadkan agenda-agenda rundingan yang tertunggak sejak tahun 2019 disebabkan oleh pandemik COVID-19. Berdasarkan *Glasgow Climate Pact*, sebahagian besar pendirian negara di dalam isu-isu seperti mekanisme pasaran karbon, ketelusan pelaporan perubahan iklim, pembiayaan perubahan iklim dan jangka masa sepunya bagi NDC adalah selari dengan keputusan rundingan. Sehubungan itu, KASA berpandangan adalah penting untuk keputusan-keputusan berkaitan di dalam Glasgow Climate Pact diterjemahkan ke dalam pelaksanaan dasar negara terutamanya berkaitan dengan mekanisme pasaran karbon, obligasi pelaporan perubahan iklim, pelaksanaan NDC dan mengakses pembiayaan perubahan iklim dari dana antarabangsa.

8. Dalam masa yang sama, Kementerian juga telah memulakan proses libat urus bagi membincangkan pelaksanaan deklarasi yang disertai oleh Malaysia semasa di persidangan UNFCCC COP-26. Pada masa ini, KASA telah mengadakan perbincangan bersama kementerian dan agensi lain bagi mengenal pasti program dan inisiatif sedia ada dan baharu bagi pelaksanaan *Global Methane Pledge*. Amerika Syarikat melalui kedutaan di Kuala Lumpur juga turut menyatakan hasrat mereka untuk menyokong Malaysia dari aspek teknikal, teknologi dan kewangan bagi melaksanakan *Global Methane Pledge*.

9. Selain itu juga, KASA juga komited untuk terus terlibat di dalam proses rundingan perubahan iklim UNFCCC pada masa akan datang agar pendirian dan pandangan negara mengenai isu-isu perubahan iklim antarabangsa dapat diketengahkan dan diambil kira.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

DARIPADA : PUAN HANNAH YEOH TSEOW SUAN [SEGAMBUT]

TARIKH : 7 MAC 2022 (ISNIN)

SOALAN

PUAN HANNAH YEOH TSEOW SUAN [SEGAMBUT] minta **PERDANA MENTERI** menyatakan mengapa Laporan Tahunan SUHAKAM 2020 tidak dibentangkan dan dibahaskan di Parlimen seperti yang pernah dilakukan sebelum ini dan adakah terdapat perancangan untuk ianya dibentangkan dan dibahaskan pada persidangan kali ini.

JAWAPAN

**YB DATO SRI DR. HAJI WAN JUNAIDI BIN TUANKU JAAFAR,
MENTERI DI JABATAN PERDANA MENTERI
(PARLIMEN DAN UNDANG-UNDANG)**

Tuan Yang di-Pertua,

Untuk makluman Ahli Yang Berhormat, Laporan Tahunan Suruhanjaya Hak Asasi Manusia Malaysia (SUHAKAM) 2020 hanya diterima secara rasmi pada suku tahun ketiga 2021. Laporan tersebut tidak dapat dikemukakan lebih awal seperti mana kelazimannya disebabkan pelbagai kekangan berikutan penularan wabak COVID-19 pada ketika itu.

Selaras dengan undang-undang dan peraturan yang berkuat kuasa berhubung dengan Laporan dan Penyata Kewangan Tahunan Badan-Badan Berkanun Persekutuan, Laporan Tahunan SUHAKAM 2020 akan dibentangkan di Parlimen setelah mendapat kelulusan Jemaah Menteri. Perbincangan Laporan ini adalah bergantung kepada ketetapan Dewan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS**

PERTANYAAN : LISAN

**DARIPADA : YB TUAN AHMAD TARMIZI BIN SULAIMAN
(SIK)**

TARIKH : 07 MAC 2022 (ISNIN)

SOALAN

TUAN AHMAD TARMIZI BIN SULAIMAN [SIK] minta **MENTERI KANAN KERJA RAYA** menyatakan langkah Kementerian mengatasi masalah kesesakan lalu lintas yang telah sekian lama berlaku serta sangat kronik di Lebuhraya Utara Selatan (PLUS) dan Lebuhraya Pantai Timur (LPT) ketika hujung minggu dan cuti perayaan yang telah menyebabkan perjalanan di lebuhraya ini tidak lagi memberi keselesaan kepada pengguna.

JAWAPAN

Tuan Yang Di-Pertua,

Untuk makluman Ahli Yang Berhormat, Kerajaan sedar akan peningkatan jumlah trafik di Lebuhraya Utara Selatan dan Lebuhraya KL Karak / Lebuhraya Pantai Timur sehingga menyebabkan lokasi – lokasi tertentu mengalami kesesakan terutamanya pada musim perayaan atau cuti hujung minggu yang panjang dan musim cuti persekolahan. Pada masa ini kapasiti Lebuhraya Utara Selatan dan Lebuhraya KL Karak / Lebuhraya Pantai Timur adalah mencukupi untuk menanggung aliran semasa trafik dan hanya sibuk pada waktu – waktu tertentu.

Untuk perhatian Ahli Yang terhormat, Lembaga Lebuhraya Malaysia (LLM) dan Syarikat Pengendali lebuhraya telah mengambil beberapa inisiatif untuk meningkatkan kelancaran trafik bagi memastikan keselesaan perjalanan pengguna seperti berikut:

1. Menjadualkan kerja pembaikan dan penyelenggaraan yang melibatkan penutupan lorong di laluan utama lebuhraya di luar waktu puncak kecuali bagi kerja – kerja yang melibatkan kes – kes kecemasan bagi mengelakkan kesesakan lalulintas;
2. Menaiktaraf sistem pengawasan trafik di lebuhraya dengan memasang kamera litar tertutup (CCTV) di lokasi tertentu dan papantanda elektronik (*variable message signboard* – VMS) bertujuan untuk menyalurkan maklumat kepada pengguna lebuhraya mengenai keadaan trafik semasa bagi membantu pengguna lebuhraya dalam perjalanan ke destinasi yang di tuju; dan
3. Menyalurkan maklumat keadaan trafik di lebuhraya menerusi hebahan maklumat keadaan trafik melalui media massa seperti saluran radio dan media sosial seperti *facebook & twitter*.

Selain itu, apabila tiba musim cuti perayaan dsb; pihak LLM dan Syarikat Pengendali lebuh raya akan melakukan persediaan seperti berikut untuk menangani peningkatan kenderaan di lebuh raya serta memastikan kelancaran trafik iaitu:

1. Mengeluarkan Nasihat Jadual Perjalanan kepada pengguna lebuh raya bertujuan untuk mengagihkan kemasukan trafik ke lebuh raya pada waktu puncak;
2. Menambah jumlah kakitangan yang bertugas untuk memastikan kejadian luar jangka yang berlaku ditangani dengan segera dan tidak akan menjejaskan aliran trafik;
3. Menyediakan perkhidmatan kren / kembalik dalam keadaan tunggu sedia (*standby*) agar sebarang kejadian luar jangka dapat ditangani dengan segera seterusnya meminimalkan gangguan terhadap pergerakan trafik; dan
4. Menjalankan kempen – kempen keselamatan untuk mendidik pengguna lebuh raya agar menitikberatkan aspek keselamatan semasa memandu di lebuh raya.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : DATO' ABDULLAH SANI BIN ABDUL HAMID
[KAPAR]**

TARIKH : 7 MAC 2022 (ISNIN)

SOALAN

Minta **PERDANA MENTERI** menyatakan tindakan proaktif untuk menamatkan pandemik COVID-19 di Malaysia memandangkan jumlah kes jangkitan harian amat membimbangkan.

JAWAPAN

**DIJAWAB OLEH YB DATUK DR. ABD LATIFF BIN AHMAD,
MENTERI DI JABATAN PERDANA MENTERI (TUGAS-TUGAS KHAS)**

Tuan Yang Dipertua,

1. Pihak Kerajaan sentiasa komited dan memberikan perhatian penuh kepada sebarang keputusan yang diambil berkaitan dengan COVID-19. Pertimbangan sewajarnya perlulah diberikan dengan mengambil kira maklum balas dan pandangan merentas semua Kementerian dan Agensi Kerajaan bagi memastikan keselamatan serta visi dan matlamat Keluarga Malaysia dapat dicapai secara mampan.
2. Usaha ini memerlukan kerjasama dan sinergi yang utuh daripada Keluarga Malaysia di mana pihak Kerajaan perlu memastikan Keluarga Malaysia sentiasa cakna dan memahami tindakan yang diambil merupakan satu langkah persediaan dalam peralihan ke Fasa Endemik yang perlu diberikan perhatian sepenuhnya bagi memastikan keseimbangan dan mengelak daripada berlakunya peningkatan kes

positif COVID-19 di masa akan datang demi kesejahteraan dan kelangsungan hidup Keluarga Malaysia.

3. Peralihan ini perlu berasaskan kepada penilaian risiko semasa jangkitan COVID-19 dalam negara oleh pihak Kementerian Kesihatan Malaysia (KKM) dan mengambil kira maklumat situasi semasa penularan COVID-19. Seperti yang diumumkan oleh YB Menteri Kanan Pertahanan, peralihan ke Fasa Endemik telah ditangguhkan buat sementara waktu mengambil kira kesan pasca-banjir dan peningkatan kes positif melibatkan Varian Omicron dalam kalangan pengembara dari luar negara pada pertengahan bulan Januari 2022.

4. Keputusan pihak Kerajaan untuk beralih ke Fasa Endemik dalam usaha untuk menamatkan pandemik COVID-19 di Malaysia perlu dibuat secara berhati-hati. Justeru, antara tindakan proaktif dalam usaha menamatkan pandemik COVID-19 di negara ini sebelum beralih ke Fasa Endemik adalah seperti berikut:

- i. Pelaksanaan Program Imunisasi COVID-19 Kebangsaan (PICK) dalam memastikan seluruh Keluarga Malaysia menerima vaksin lengkap dan dos penggalak dapat dilihat apabila sebilangan besar kes positif Varian Omicron hanya merekodkan pesakit Kategori 1 dan 2 yang bergejala ringan. Program ini juga telah diperluaskan kepada golongan remaja dan kanak-kanak berumur lima (5) tahun ke atas menerusi PICKkids. Ini termasuklah pemberian dos penggalak secara percuma memberi perlindungan yang terbaik daripada kematian dan gejala serius COVID-19;
- ii. Memperkasakan norma baharu melalui penyediaan Prosedur Operasi Standard (SOP) Am dan Garis Panduan Fasa Endemik yang akan diperkenalkan sebaik sahaja pihak Kerajaan telah memutuskan untuk beralih ke Fasa Endemik;
- iii. Strategi Pengujian COVID-19 Kebangsaan atau (dengan izin) *National Testing Strategy* (NTS) juga merupakan salah satu tindakan proaktif yang telah diperkenalkan oleh pihak Kerajaan. Kaedah *Test, Report, Isolate, Inform* dan *Seek* (dengan izin) atau (TRIIS) perlu segera dilakukan apabila bergejala. Ianya dilihat dapat melindungi diri dan orang lain yang juga merupakan satu tindakan pencegahan holistik dalam memutuskan rantai COVID-19 secepat mungkin dan secara amnya dilihat berjaya diterap dan dipupuk di kalangan Keluarga Malaysia pada ketika ini.

- iv. Peranan penting Duta-Duta Pemerkasaan Komuniti dalam mendidik masyarakat seterusnya memastikan Keluarga Malaysia biasa dengan amalan, langkah-langkah keselamatan, dan setiap SOP serta garis panduan di Fasa Endemik. Kementerian Komunikasi dan Multimedia (KKMM) sedang melakukan persiapan rapi bagi memastikan perancangan berkaitan Duta-Duta Pemerkasaan Komuniti ini dapat dijayakan sebaiknya.

5. Pembukaan sempadan negara secara berperingkat juga merupakan salah satu tindakan pihak Kerajaan dalam fasa “Peralihan ke Endemik”. Berdasarkan kepada Kenyataan Media YB Menteri Kanan Pertahanan pada 1 Mac 2022, terdapat keperluan untuk membuka sempadan negara dan satu keputusan secara prinsip telah dicapai bersandarkan kepada tiga perkara asas:-

- i. Memberi keselesaan kepada pengembara dan tidak merumitkan perjalanan mereka;
- ii. Berpandukan sains dan fakta terkini berkaitan COVID-19; dan
- iii. Membandingkan keperluan pembukaan sempadan dengan negara-negara lain.

6. Dalam hal ini, Kementerian dan Agensi yang terlibat sedang memperincikan protokol termasuk pra pelepasan dan ketibaan ke dalam negara. Keluarga Malaysia boleh pergi ke negara yang turut telah membuka sempadannya sebaik sahaja protokol tersebut dimuktamadkan dan kebenaran diberikan. Tarikh pelaksanaan pembukaan negara ini akan dumumkan oleh YAB Perdana Menteri.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS**

PERTANYAAN : LISAN

**DARIPADA : YB DATUK ROBERT LAWSON CHUAT
(BETONG)**

TARIKH : 07 MAC 2022 (ISNIN)

SOALAN

DATUK ROBERT LAWSON CHUAT [BETONG] minta **MENTERI KANAN KERJA RAYA** menyatakan langkah-langkah bagi mengatasi projek sakit di bawah JKR di Sarawak yang antara lain berkaitan dengan masalah kekurangan tenaga buruh dan pelaksanaan Syarat Perubahan Harga (Variation of Price – VOP).

JAWAPAN

Tuan Yang Di-Pertua,

Untuk makluman Ahli Yang Berhormat, Kementerian ini mengambil maklum mengenai kenaikan harga bahan binaan di pasaran berikutan kesan pandemik COVID-19 di seluruh dunia. Satu kajian telah dilaksanakan oleh Jabatan Kerja Raya (JKR) berdasarkan kepada Siaran Khas 1, 2 dan 3 yang dikeluarkan oleh Jabatan Perangkaan Malaysia (*Department of Statistics Malaysia-DOSM*). Hasil kajian menunjukkan terdapat kenaikan kepada Indeks Kos Bahan Binaan Bangunan dan Harga Unit Purata bagi bahan binaan tersebut.

Kerajaan juga telah bersetuju untuk melaksanakan Syarat Perubahan Harga atau *Variation of Price (VOP)* dalam kontrak kerja berikutan peningkatan ketara kos beberapa bahan binaan demi memastikan projek Kerajaan tidak terjejas dan dapat disiapkan mengikut jadual. Pelaksanaan Syarat Perubahan Harga ini dikuatkuasakan melalui Pekeliling Perbendaharaan PK 2.4 'Pelaksanaan Syarat Perubahan Harga (*Variation Of Price – VOP*) dalam Kontrak Kerja (Pindaan 1 Januari 2022) yang berkuatkuasa mulai berkuatkuasa mulai 1 Januari 2021 hingga 30 Jun 2022. Pelaksanaan syarat perubahan harga ini merangkumi kontrak secara konvensional dan juga kontrak secara Reka & Bina yang mana pengiraan VOP dibenarkan sehingga tamat kontrak dan tertakluk kepada peraturan yang telah dinyatakan dalam pekeliling tersebut.

Bagi meneruskan kesinambungan dalam usaha untuk mengatasi peningkatan harga bahan binaan, kajian dan rayuan berkaitan VOP telah dilaksanakan oleh Kementerian ini dan dalam pertimbangan Kerajaan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : DATUK HAJI HASANUDDIN BIN MOHD
YUNUS [HULU LANGAT]**

TARIKH : 7 MAC 2022 (ISNIN)

SOALAN

DATUK HAJI HASANUDDIN BIN MOHD YUNUS [HULU LANGAT]
minta MENTERI PERUSAHAAN PERLADANGAN DAN KOMODITI
menyatakan apakah usaha Kementerian untuk mengoptimum dan
memperluas lagi peranan pejabat-pejabat MPOB di luar negara sebagai
agen pemasaran berkesan minyak sawit Malaysia di persada
antarabangsa.

JAWAPAN

Tuan Yang Di-Pertua,

Perdagangan minyak sawit mempunyai sumbangan yang besar kepada negara. Sehubungan itu, Kementerian Perusahaan Perladangan dan Komoditi (KPPK) melalui Lembaga Minyak Sawit Malaysia (MPOB) telah menubuhkan enam (6) pejabat serantau termasuk pusat penyelidikan dan pembangunan (R&D) di negara pengimport utama, iaitu:

- i. Washington DC, Amerika Syarikat (meliputi seluruh Rantau Amerika);
- ii. Brussels, Belgium (meliputi seluruh Rantau Eropah);
- iii. Kaherah, Mesir (meliputi seluruh Rantau Afrika);
- iv. Karachi, Pakistan (meliputi seluruh Rantau Asia Tengah dan Barat);
- v. Shanghai, China (meliputi seluruh Rantau Timur Jauh); dan
- vi. Tehran, Iran (meliputi seluruh Iran, Iraq dan Rantau Republik Asia Tengah).

Pejabat-pejabat Serantau MPOB bertindak sebagai wakil institut penyelidikan kerajaan dan pihak berkuasa mengenai minyak sawit di luar negara, dan memainkan peranan penting dalam menjaga pasaran minyak sawit Malaysia, menghapuskan halangan perdagangan dalam bentuk tarif dan bukan tarif ke atas minyak sawit dan memperkukuhkan hubungan dengan pihak berkuasa tempatan di negara-negara pengimport.

Kerajaan melalui Rancangan Malaysia Ke-11 telah menggariskan strategi untuk menyusun semula institusi sektor awam bagi mengurangkan pertindanan peranan serta tanggungjawab antara agensi ke arah mewujudkan sektor awam yang dinamik dan kejut. Selaras dengan itu, Jabatan Perkhidmatan Awam telah melaksanakan kajian rasionalisasi Pejabat Perwakilan dan wakil-wakil agensi Kerajaan Malaysia di luar negeri bagi menyemak semula fungsi dan peranan serta tanggungjawab perwakilan, atase dan diplomat dari kementerian yang ditempatkan di Pejabat-pejabat Perwakilan Malaysia di luar negeri. MPOB termasuk dalam Fasa Kedua pelaksanaan rasionalisasi tersebut.

Majlis Minyak Sawit Malaysia (MPOC), sebuah agensi di bawah KPPK yang dipertanggungjawabkan untuk mempromosi dan memperluas lagi pasaran minyak sawit Malaysia di persada antarabangsa mempunyai 11 buah pejabat serantau di seluruh dunia. Manakala, Perbadanan Pembangunan Perdagangan Luar Malaysia (MATRADE) mempunyai kaunselor perdagangan di lebih 40 buah bandar utama di seluruh dunia. MATRADE berperanan membantu KPPK di dalam mempromosi produk sawit Malaysia serta menjalankan perisikan komersial dan penyelidikan pasaran di negara-negara yang tidak mempunyai Pejabat Serantau MPOB atau MPOC.

Atas usaha rasionalisasi di atas, KPPK bercadang menutup sementara lima (5) buah Pejabat Serantau di Washington DC, Amerika Syarikat; Brussels, Belgium; Kaherah, Mesir; Karachi, Pakistan; dan Tehran, Iran. Pejabat *Palm Oil Research and Technical Service Institute of MPOB* (PORTSIM) di Shanghai, China tidak terlibat dalam cadangan ini. Lanjutan daripada penutupan sementara pejabat serantau ini, fungsi promosi minyak sawit di luar negara akan diserahkan kepada MPOC. Walaupun begitu, MPOB masih membekalkan input teknikal jika diperlukan oleh pihak MPOC dan MATRADE.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

DARIPADA : TUAN WONG LING BIU (SARIKEI)

TARIKH : 7 MAC 2022 (ISNIN)

SOALAN

TUAN WONG LING BIU [SARIKEI] minta **PERDANA MENTERI** menyatakan berapa ramai Ahli Parlimen yang telah melompat parti semenjak PRU-14. Adakah jumlah ini adalah tertinggi sejak kemerdekaan Malaysia.

JAWAPAN

Tuan Yang di-Pertua,

Sejak Pilihan Raya Umum Keempat Belas sehingga Februari 2022 terdapat seramai 38 Ahli Dewan Rakyat telah bertukar parti. Perbincangan sedang giat diadakan untuk menggubal Rang Undang-Undang Anti Lompat Parti. Rang Undang-undang ini akan dibentangkan di Parlimen setelah perkara dasar dan definisi lompat parti dimuktamadkan. Ini kerana terdapat perbezaan pandangan berhubung definisi lompat parti daripada setiap parti politik yang perlu diselesaikan sebelum Rang Undang-Undang ini boleh dibentangkan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : JAWAB LISAN

**DARIPADA : TUAN YUSUF BIN ABD. WAHAB
[TANJONG MANIS]**

TARIKH : 7 MAC 2022 (ISNIN)

SOALAN

TUAN YUSUF BIN ABD. WAHAB [TANJONG MANIS] minta **MENTERI ALAM SEKITAR DAN AIR** menyatakan tentang keperluan untuk mengorek muara-muara sungai di Parlimen Tanjong Manis terutama di utara Pulau Bruit kerana semua muara sungai sudah termendap dan cetek dan menyukarkan nelayan keluar mencari rezeki.

JAWAPAN

Tan Sri Yang Di-Pertua,

1. Bagi mengatasi masalah kecekakan muara di Parlimen Tanjong Manis, Sarawak, JPS melalui KASA telah memohon peruntukan bagi Projek- projek pembangunan RMKe-12 *Rolling Plan* Ketiga (RP3) tahun 2023 adalah seperti berikut:-

- i. Pemuliharaan Muara Sg. Terusan Buit/Tekajong Daro, Bahagian Mukah, Sarawak anggaran kos projek RM10 juta; dan
- ii. Projek Pengawalan Hakisan Pantai Di Pantai Kuala Belawai, Daerah Tanjong Manis Mukah yang dianggarkan berjumlah RM20juta.

2. Bagi perancangan jangka pendek KASA telah memperuntukan di bawah butiran Risiko banjir yang melibatkan 2 kerja pada tahun 2021. Antaranya

- i. Kerja -kerja Pemuliharaan Muara Sg. Betanak Pulau Buit Daro dengan Kos projek RM306,000.00, bermula pada 18 Oktober 2021 dan siap pada 26.10.2021; dan
- ii. Kerja -kerja Pemuliharaan Muara Sg. Salah Kecil dengan Kos projek RM310,050.00 yang bermula pada 18.10.2021 dan siap pada 26.10.2021.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN

DARIPADA : DATO' NGEH KOO HAM [BERUAS]

TARIKH : 07 MAC 2022 (ISNIN)

SOALAN

Minta **PERDANA MENTERI** menyatakan tindakan yang sedang dan akan diambil oleh Kerajaan untuk memastikan Kerajaan berupaya membayar faedah persaraan (pencen perkhidmatan, ganjaran perkhidmatan dan Award Wang Tunai Ganti Cuti Rehat pekerja- pekerja Kerajaan yang kian meningkat dari RM9.88 bilion (tahun 2010) ke RM26.38 bilion (tahun 2020) dan ke RM46.6 bilion (jangkaan untuk tahun 2030).

JAWAPAN

**DIJAWAB OLEH YB DATUK DR ABD LATIFF AHMAD
MENTERI DI JABATAN PERDANA MENTERI
(TUGAS-TUGAS KHAS)**

Tuan Yang di-Pertua,

1. Bagi memperkukuh kedudukan fiskal negara, Kerajaan mengguna pakai Rangka Kerja Fiskal Jangka Sederhana atau Medium Term Fiscal Framework (MTFF) sebagai panduan dalam menggubal strategi ke arah konsolidasi fiskal jangka sederhana (3 hingga 5 tahun) yang selari dengan pelan pembangunan Rancangan Malaysia Kedua Belas (RMKe-12). RMKe-12 menyediakan rangka kerja dasar yang holistik bagi pembaharuan struktur dan menetapkan halatuju jangka masa sederhana.
2. Kerajaan juga sedang membangunkan Strategi Hasil Jangka Sederhana (MTRS) bagi menambah baik asas hasil merangkumi pelaksanaan langkah hasil secara berperingkat, semakan semula perundangan cukai dan pemodenan pentadbiran hasil. Pelaksanaan MTRS adalah penting bagi memastikan Kerajaan dapat membiayai perbelanjaan termasuk bayaran pencen dalam tempoh jangka panjang. Bayaran pencen dikategorikan sebagai perbelanjaan tanggungan iaitu perbelanjaan yang dipertanggungjawabkan terus kepada Kumpulan Wang Disatukan tanpa perlu mendapat kelulusan Parlimen selaras dengan Perkara 98, Perlembagaan Persekutuan.
3. Untuk jangka masa panjang, skim persaraan sedia ada akan diperhalusi bagi memastikan beban kewangan Kerajaan lebih mampan dan pada masa yang sama kebajikan pesara turut diberi perhatian sewajarnya selaras dengan kedudukan kewangan semasa Kerajaan.

Sekian, terima kasih.

**PEMBERITAHUAN PERTANYAAN LISAN DEWAN NEGARA
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : JAWAB LISAN

DARIPADA : DATUK ROZMAN BIN ISLI [LABUAN]

TARIKH : 7 MAC 2022 (ISNIN)

SOALAN

DATUK ROZMAN BIN ISLI [LABUAN] minta **MENTERI ALAM SEKITAR DAN AIR** menyatakan adakah Kementerian sedar Labuan sering mengalami gangguan bekalan air dan apakah perancangan jangka masa panjang Kementerian untuk mengatasi masalah ini.

JAWAPAN

Tuan Yang Di-Pertua,

1. Untuk makluman Ahli Yang Berhormat, Kerajaan Persekutuan amat prihatin mengenai gangguan bekalan air yang berlaku di Labuan. Berdasarkan pemantauan yang dibuat, didapati bahawa gangguan ini adalah berpunca dari paip pecah yang melibatkan kawasan tertentu. Bagi mengatasi masalah tersebut, perancangan jangka panjang untuk menaik taraf dan menggantikan paip-paip yang usang di Labuan telah dibuat. Kerja-kerja ini akan dijalankan secara berperingkat memandangkan ianya melibatkan perbelanjaan yang besar.
2. Di bawah *Rolling Plan 2* (RP2) Rancangan Malaysia Kedua Belas (RMKe-12), RM202.65 juta telah diluluskan bagi melaksanakan kerja-kerja menaiktaraf dan penggantian paip-paip lama sepanjang 50 km yang akan memberi manfaat kepada hampir 20,000 pengguna air yang

berdaftar dengan Bahagian Bekalan Air Labuan. Paip-paip sedia ada ini akan diganti dengan jenis paip yang lebih berkualiti seperti besi mulur (*Ductile Iron* - DI), besi keluli lembut (*Mild Steel Cement Lining* - MSCL) dan *High Density Polyethelene* (HDPE) dalam pelbagai saiz yang bersesuaian. Secara spesifik, kerja-kerja penggantian ini melibatkan kawasan-kawasan seperti berikut:

- (i) **Sepanjang Jalan Mohd Salleh hingga ke Simpang Bukit Kallam, Jalan Sg. Bedaun hingga ke Terminal Shell, Jalan Bukit Timbalai sehingga persimpangan Sg Pagar dan Sepanjang Jalan Bukit Besar sehingga persimpangan Sg Lada.** Kerja-kerja fizikal dijangka dapat dimulakan pada April 2022 dan dijangka siap pada April 2024;
- (ii) **Jalan Patau-Patau dari Simpang Jalan Ranca-Ranca Lama ke Simpang Jalan Ranca-Ranca dan Pulau Enoe** di mana tender bagi lantikan kontraktor telah dilaksanakan pada 26 Januari 2022. Kerja-kerja fizikal dijangka dapat dimulakan pada Mei 2022 dan dijangka siap pada Mei 2023;
- (iii) **tiga buah Kampung Air di Labuan iaitu Kg. Air Patau-Patau 1, Kg. Air Patau-Patau 2 dan Kg Air Bebuloh.** Tender perunding bagi kawasan ini telah ditutup pada 10 November 2021. Penilaian kos dan teknikal telah selesai dan dalam peringkat untuk dibentangkan kepada Lembaga Perolehan Kementerian bagi lantikan perunding. Projek ini dijangka siap pada Januari 2025; dan
- (iv) **sepanjang jalan Batu Manikar** di bawah Program NRW Kebangsaan Pendekatan 1. Surat Setuju Terima (SST) dijangka dapat dikeluarkan pada awal Mac 2022 dan kerja dijangka siap pada 2024.

3. Dalam memastikan masalah gangguan bekalan air dapat diminimalkan, beberapa pelan tindakan jangka masa pendek telah dan sedang dilaksanakan. Antara tindakan-tindakan tersebut adalah seperti:

- (i) melaksanakan kerja pembaikan paip bocor dengan kadar yang segera;
- (ii) menghantar bantuan alternatif menggunakan lori tangki air ke kawasan yang terjejas melebihi tempoh 24 jam;
- (iii) memantau dan mengawal aras tangkiimbangan dan tangki perkhidmatan sekiranya paras tangki tidak stabil;
- (iv) melaksanakan kerja-kerja pengesanan paip bocor secara aktif (*Active Leakage Control* - ALC) pada paip-paip yang berpotensi bocor (paip ac, paip usang) dengan lebih kerap;
- (v) mengawal tekanan air pada *Pressure Reduce Valve* (PRV) atau *Sluice Valve* di kawasan yang mempunyai tekanan air tinggi dan berpotensi menyebabkan paip pecah;
- (vi) meletakkan tangki-tangki statik di kawasan yang berpotensi mengalami gangguan bekalan air dan memastikan tangki tersebut penuh; dan
- (vii) menggerakkan gerak kerja bersama agensi lain seperti Perbadanan Labuan, BOMBA dan Jabatan Kerja Raya (JKR) bagi membantu penghantaran air ke kawasan yang terjejas. Gerak kerja ini akan beroperasi sekiranya kawasan gangguan meluas dan jentera sedia ada Bahagian Bekalan Air Labuan (BBAL) tidak dapat menampung permintaan penghantaran air.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS**

PERTANYAAN : LISAN

**DARIPADA : YB DATO' SYED ABU HUSSIN BIN HAFIZ
SYED ABDUL FASAL (BUKIT GANTANG)**

TARIKH : 07 MAC 2022 (ISNIN)

SOALAN

DATO' SYED ABU HUSSIN BIN HAFIZ SYED ABDUL FASAL [BUKIT GANTANG] minta **MENTERI KANAN KERJA RAYA** menyatakan kenapa Kementerian tidak menjalankan kerja-kerja penyenggaraan Jalan Persekutuan di Parlimen Bukit Gantang secara menyeluruh iaitu bagi FT060 Jalan Batu Hampar – Changkat Jering, FT001 Jalan Ipoh ke Butterworth, FT074 Jalan Kuala Sepetang ke Taiping dan FT3146 Jalan Industri ke Kamunting bagi mengelakkan jalan tumpul-tumpul, jalan yang baru dibaiki kembali rosak dan jalan yang rosak membahayakan keselamatan dan nyawa pengguna. Apakah status permohonan penyenggaraan jalan berkala pavemen seperti FT060 Jalan Batu Hampar – Changkat Jering, Seksyen 78.60-80.80 (2.2 KM), FT060 Jalan Batu Hampar – Changkat Jering, Seksyen 71.00-71.60 (0.6KM), FT074 Jalan Kuala Sepetang – Taiping, Seksyen 9.30-9.70 (0.4KM) dan FT001 Jalan Ipoh – Butterworth, Seksyen 681.00 – 682.00 (1KM) .

JAWAPAN

Tuan Yang Di-Pertua,

Untuk makluman Ahli Yang Berhormat, merujuk kepada laluan yang dinyatakan oleh Yang Berhormat, laluan yang dimaksudkan adalah laluan FT60 Jalan Batu Hampar – Changkat Jering, FT001 Jalan Ipoh ke Butterworth, FT74 Jalan Kuala Sepetang ke Taiping dan FT3146 Jalan Industri ke Kamunting; melibatkan panjang jalan sepanjang **76.25 km** di dalam daerah Larut Matang Selama.

Untuk makluman Ahli Yang Berhormat juga, jumlah peruntukan yang telah disalurkan bagi **kerja-kerja penyenggaraan berkala** di Jalan Persekutuan di dalam kawasan Daerah Larut Matang Selama adalah berjumlah **RM 6.65 juta** untuk tahun 2020 dan **RM 5.6 juta** untuk tahun 2021. Bagi memastikan kesinambungan kerja-kerja penyenggaraan untuk tahun **2022**, Kementerian ini telah meluluskan peruntukan sebanyak **RM10 juta** iaitu melibatkan kerja-kerja pembaikan dan turapan semula di laluan FT01 (**RM4.35 juta**), di laluan FT60 (**RM3.25 juta**) dan laluan FT74 (**RM2.4 juta**).

Jumlah peruntukan yang telah diluluskan oleh Kementerian Kewangan bagi tahun 2022 adalah terhad berbanding nilai peruntukan yang telah dimohon oleh Kementerian ini. Namun, Kementerian ini sentiasa komited dari semasa ke semasa dalam memastikan jalan persekutuan selamat dan selesa bagi pengguna jalan raya persekutuan dengan menjalankan program penyenggaraan rutin, berkala pavemen dan juga bukan pavemen.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS (2022)**

PERTANYAAN : LISAN

DARIPADA : TUAN KHOO POAY TIONG [KOTA MELAKA]

TARIKH : 7 MAC 2022 (ISNIN)

SOALAN

minta **PERDANA MENTERI** menyatakan :-

- (a) Adakah Tan Sri Azam Baki telah mengisytiharkan pemilikan saham di Syarikat Gets Global Berhad dan Excel Force MSC Berhad pada tahun 2015 - 2016 sepertimana yang diwajibkan dalam Peraturan 10 Peraturan-peraturan Pegawai Awam (Kelakuan dan Tatatertib) 1993 ; dan
- (b) maklumat terperinci mengenai pengisytiharan tersebut, termasuklah jumlah, tarikh, dan pihak yang menerima pengisytiharan.

JAWAPAN

**DIJAWAB OLEH YB DATUK DR. ABD LATIFF AHMAD
MENTERI DI JABATAN PERDANA MENTERI (TUGAS-TUGAS KHAS)**

Tuan Yang Di Pertua,

1. Adalah menjadi tanggungjawab setiap penjawat awam untuk mengisytiharkan harta kepada ketua jabatan masing-masing. Peraturan 10, Peraturan-Peraturan Pegawai Awam (Kelakuan dan Tatatertib) 1993 [P.U. (A) 395/1993] memperuntukkan bahawa semua pegawai awam hendaklah mengisytiharkan secara bertulis kepada Ketua Jabatan masing-masing segala harta yang dimiliki olehnya atau isteri atau suami atau anaknya atau yang dipegang oleh mana-mana orang bagi pihaknya atau bagi pihak isteri atau suaminya atau anaknya. Bagi pegawai-pegawai yang tidak berbuat demikian, tindakan tatatertib boleh diambil oleh Ketua Jabatan.
2. Bagi kes pegawai ini, beliau telah mengisytiharkan harta kepada Ketua Jabatan iaitu Ketua Pesuruhjaya Suruhanjaya Pencegahan Rasuah Malaysia (SPRM) pada masa tersebut.
3. Untuk makluman Yang Berhormat, subperaturan 10(7) P.U. (A) 395/1993 memperuntukkan bahawa "Tiap-tiap perisytiharan di bawah subperaturan (1) hendaklah dikategorikan sebagai terperingkat dan tiap-tiap orang yang memperoleh maklumat di bawah peraturan ini tentang apa-apa perisytiharan sedemikian hendaklah mematuhi prosedur dan peraturan-peraturan berkaitan dengan pengurusan dokumen terperingkat Kerajaan.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS**

PERTANYAAN : JAWAB LISAN

**DARIPADA : DATUK DR. SHAHRUDDIN BIN MD. SALLEH
[SRI GADING]**

TARIKH : 07 MAC 2022 (ISNIN)

SOALAN

DATUK DR. SHAHRUDDIN BIN MD. SALLEH [SRI GADING] minta **PERDANA MENTERI** menyatakan keberkesanan bagi Seksyen 17A Akta Suruhanjaya Pencegahan Rasuah 2009 dalam mencegah korupsi dalam negara terutamanya dalam agensi dan sektor korporat.

JAWAPAN

Tuan Yang di-Pertua,

Untuk makluman Yang Berhormat, Seksyen 17A Akta Suruhanjaya Pencegahan Rasuah Malaysia 2009 (Akta 694) telah dikuatkuasakan pada 1 Jun 2020. Sejak dikuatkuasakan, SPRM telah melaksanakan pelbagai program penerangan secara berterusan bagi memberi kefahaman kepada organisasi korporat berkaitan kesalahan dan hukuman di bawah peruntukan Seksyen 17A Akta 694 yang melibatkan organisasi komersial. Pada tahun 2020 dan 2021, sejumlah 320 program penerangan telah dijalankan melibatkan 13,951 audiens dalam kalangan organisasi korporat.

Seksyen 17A Akta 694 ini dilihat mampu memberikan impak positif dalam mengurangkan jenayah rasuah yang melibatkan organisasi komersial di Malaysia. Berdasarkan peruntukan ini, organisasi komersial boleh didakwa dan dihukum sekiranya membenarkan pegawai/ kakitangan mereka melakukan rasuah untuk memperoleh sesuatu projek atau mendapat apa-apa faedah bagi organisasi komersial itu.

Justeru itu, organisasi komersial perlu membangunkan Pelan Antirasuah Organisasi (OACP) yang merupakan satu dokumen dasar antirasuah di peringkat organisasi untuk menangani permasalahan dan kelemahan governans, integriti dan antirasuah dalam organisasi.

Kes pertama pendakwaan bagi kesalahan di bawah seksyen ini adalah melibatkan seorang bekas pengarah syarikat yang membekalkan perkhidmatan penyewaan kapal kerana disyaki memberi rasuah sebagai imbuhan memberikan sub kontrak penyewaan kapal dalam kerja-kerja cari gali minyak. Walau bagaimanapun, kes tersebut masih lagi dalam peringkat perbicaraan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS**

PERTANYAAN : LISAN

DARIPADA : TUAN SABRI BIN AZIT [JERAJ]

TARIKH : 7 MAC 2022 (ISNIN)

SOALAN

Minta **PERDANA MENTERI** menyatakan apakah mekanisme yang dilaksanakan oleh Suruhanjaya Perkhidmatan Awam Malaysia (SPA) bagi membolehkan calon untuk hadir ke sesi temu duga atau penilaian kompetensi meskipun calon ditimpa musibah seperti perintah kuarantin akibat wabak COVID-19 atau bencana alam.

JAWAPAN

**DI JAWAB OLEH YB DATUK DR. ABD LATIFF BIN AHMAD,
MENTERI DI JABATAN PERDANA MENTERI
(TUGAS-TUGAS KHAS)**

Tuan Yang di-Pertua,

1. Untuk makluman Ahli Yang Berhormat, SPA telah memperkenalkan pendekatan temu duga secara maya pada tahun 2020 dan kaedah Temu Duga Secara *Online* In situ (TSOI) mulai 15 Jun 2021 bagi membolehkan pengerusi panel temu duga, wakil jabatan dan calon hadir ke sesi temu duga dari lokasi masing-masing. Ini bermakna panel temu duga dan calon tidak perlu hadir secara fizikal ke Pusat Temu Duga SPA. Meskipun calon ditimpamusibah seperti perintah kuarantin akibat wabak COVID-19 atau bencana alam, calon boleh hadir ke sesi temu duga secara maya pada tarikh dan waktu yang telah ditetapkan.
2. Calon turut diberi kelonggaran untuk memohon penjadualan semula tarikh sesi temu duga sekiranya tidak dapat hadir kerana kekangan-kekangan seperti masalah capaian internet atau dijangkiti COVID-19 sepanjang tempoh urusan pengambilan jawatan berkenaan.
3. SPA turut memperkenalkan pelaksanaan urusan *Profession Assesment Centre* (PAC) secara maya bagi membolehkan calon hadir ke sesi penilaian kompetensi tanpa perlu hadir secara fizikal ke Pusat PAC.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS**

PERTANYAAN : LISAN

**DARIPADA : YB TUAN HAJI AHMAD BIN HASSAN
(PAPAR)**

TARIKH : 07 MAC 2022 (ISNIN)

SOALAN

TUAN HAJI AHMAD BIN HASSAN [PAPAR] minta **MENTERI KANAN KERJA RAYA** menyatakan bilakah Kerajaan akan menyegerakan pembinaan jambatan kedua merentasi Sungai Papar bagi menampung peningkatan pengguna di Jalan Pengalat - Lok Kawi serta menjadi laluan utama ke ibu negeri termasuk digunakan pengunjung dari negara Brunei.

JAWAPAN

Tuan Yang Di-Pertua,

Untuk makluman Ahli Yang Berhormat, Jambatan Kedua Papar termasuk di dalam skop cadangan projek menaiktaraf Jalan Lok Kawi - Pengalat - Papar, Sabah. Skop projek menaik taraf jalan berkenaan turut melibatkan naik taraf jalan Negeri. Sehubungan itu, sebarang pembangunan di atas jalan Negeri adalah terletak di bawah bidang kuasa dan kelulusan Kerajaan Negeri tersebut.

Walau bagaimanapun, sekiranya cadangan pembinaan Jambatan Kedua Papar ini ingin dilaksanakan dengan menggunakan peruntukan persekutuan setelah mengambil kira keperluan teknikal yang telah dipenuhi, adalah dicadangkan supaya jalan tersebut diwartakan kepada jalan persekutuan terlebih dahulu sebelum dipertimbangkan untuk diangkat dalam *Rolling Plan* (RP) yang akan datang tertakluk kepada persetujuan Kerajaan Sabah.

Kementerian ini akan meneliti cadangan berkenaan dan akan dipertimbangkan untuk diangkat kepada Agensi Pusat sekiranya memenuhi keperluan teknikal untuk dilaksanakan.

Sekian terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS**

PERTANYAAN : LISAN

**DARIPADA : YB TUAN HAJI MOHAMAD BIN SABU (KOTA
RAJA)**

TARIKH : 07 MAC 2022 (ISNIN)

SOALAN

TUAN HAJI MOHAMAD BIN SABU [KOTA RAJA] minta **MENTERI KANAN KERJA RAYA** menyatakan sejauh manakah perkembangan pembaikan jalan raya dan infrastuktur awam yang rosak akibat banjir besar yang melanda Lembah Klang baru-baru ini dilakukan.

JAWAPAN

Tuan Yang Di-Pertua;

Untuk makluman Ahli Yang Berhormat, sebagaimana semua sedia maklum negara kita telah mengalami fenomena Monsun Timur Laut (MTL) bermula November 2021 sehingga Mac 2022. Namun, kesan daripada cuaca tersebut telah mengakibatkan kejadian banjir di sekitar kawasan Lembah Klang pada pertengahan Disember 2021 yang lalu. Kementerian ini menzahirkan ucapan takziah kepada semua mangsa banjir di atas kejadian banjir yang melanda.

Oleh yang demikian, **pada tahun 2022 Kementerian ini telah memperuntukkan peruntukan sebanyak RM 29.13 Juta** bagi melaksanakan **kerja-kerja pembaikan infrastruktur awam yang rosak akibat bencana yang melanda Lembah Klang**. Pembaikan ini melibatkan kerja-kerja penyenggaraan berkala pavemen dan berkala bukan pavemen, penyenggaraan jambatan serta penyenggaraan lampu jalan dan lampu isyarat yang rosak akibat banjir.

Untuk makluman Ahli Yang Berhormat, **Kementerian ini bertanggungjawab untuk melaksanakan pembaikan infrastruktur awam yang berlaku di Jalan Persekutuan sahaja**, manakala bagi **kerosakan infrastruktur di Jalan Negeri ianya di bawah bidang kuasa Kerajaan Negeri dan peruntukan pembaikan adalah di bawah MARRIS**. Kementerian ini bersama-sama pihak JKR sentiasa memantau lokasi-lokasi Jalan Persekutuan yang berisiko menghadapi kejadian banjir dan sekiranya terdapat keperluan untuk menaik aras pihak JKR Daerah akan membuat permohonan kepada Ibu Pejabat JKR bagi tujuan permohonan kelulusan peruntukan.

Untuk makluman Ahli Yang Berhormat juga, **kelulusan peruntukan sebanyak RM 29.13 Juta tersebut adalah melibatkan 50 bilangan kerja** penyenggaraan dan sebanyak **lima (5) kerja telah disiapkan**

sepenuhnya iaitu empat (4) kerja penyenggaraan berkala pavemen dan satu (1) kerja penyenggaraan jambatan, manakala baki 45 bilangan kerja penyenggaraan akibat banjir di kawasan Lembah Klang di dalam proses pembinaan dan dijangka akan disiapkan sepenuhnya pada Julai 2022.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS**

PERTANYAAN : LISAN

DARIPADA : TUAN CHOW KON YEOW [TANJONG]

TARIKH : 7 MAC 2022 (ISNIN)

SOALAN:

TUAN CHOW KON YEOW [TANJONG] minta **PERDANA MENTERI** menyatakan bilakah pindaan kepada Perlembagaan Persekutuan untuk memperundangkan Akta Lompat Parti dan tempoh penjawatan dua (2) penggal bagi jawatan Perdana Menteri akan dilaksanakan. Sekiranya tidak, nyatakan sebabnya.

JAWAPAN

**YB DATO SRI DR. HAJI WAN JUNAIDI BIN TUANKU JAAFAR,
MENTERI DI JABATAN PERDANA MENTERI
(PARLIMEN DAN UNDANG-UNDANG)**

Tuan Yang di-Pertua,

Sepertimana Ahli Yang Berhormat sedia maklum, Memorandum Persefahaman (MoU) Transformasi dan Kestabilan Politik yang ditandatangani Kerajaan Persekutuan dan Pakatan Harapan (PH) pada 13 September 2021 yang lalu merupakan suatu bentuk kerjasama dwi-partisan yang bertujuan memastikan kestabilan politik negara dan mendorong kepada tadbir urus yang cemerlang dalam memerangi COVID-19 dan pemulihan ekonomi.

MoU Transformasi dan Kestabilan Politik tersebut antara lain mengandungi perkara berkaitan Transformasi Pentadbiran yang secara khusus menyentuh keperluan membentangkan dan meluluskan Rang Undang-Undang Peruntukan Anti Lompat Parti dalam tempoh tidak lewat dari Mesyuarat Pertama Penggal Ke-5 Tahun 2022. Pada masa yang sama, Agenda Transformasi Negara turut merangkumi cadangan penetapan had tempoh jawatan Perdana Menteri.

Bagi tujuan ini, penetapan dasar yang jelas adalah wajar bagi memastikan peruntukan undang-undang yang digubal berkaitan kedua-dua perkara ini lebih teratur dan tidak dipertikaikan oleh mana-mana pihak. Oleh yang demikian, beberapa siri libat urus telah dilaksanakan Kerajaan bersama pihak berkepentingan mulai November 2021 sehingga Februari 2022 seperti:

- (i) Pemimpin Parti Komponen;
- (ii) Jawatankuasa Teknikal Transformasi dan Kestabilan Politik dengan keahlian daripada Kerajaan dan Pakatan Harapan;
- (iii) Ahli Parlimen Dewan Rakyat dan Dewan Negara; dan
- (iv) Kaji Selidik Awam merangkumi orang awam, masyarakat madani (CSO/NGO) dan Ahli Parlimen.

Seterusnya, Kerajaan pada 26 Januari 2022 juga telah memutuskan bahawa Rang Undang-Undang (Anti Lompat Parti dan Penetapan Had Tempoh Jawatan Perdana Menteri perlu dibentangkan kepada semua Ketua Parti Kerajaan bagi mendapatkan input serta pandangan mengenai perkara tersebut termasuk draf pindaan Perlembagaan Persekutuan oleh Jabatan Peguam Negara. Kesemua perkara ini perlu dibentangkan pada sesi Mesyuarat Pertama Penggal Kelima Parlimen ke-14 Tahun 2022 selaras dengan MoU berkenaan.

Kesemua sesi libat urus yang telah dan akan dilaksanakan ini membincangkan dan memuktamadkan persoalan-persoalan dasar yang wajar bagi tujuan penggubalan rang undang-undang melalui pindaan Perlembagaan Persekutuan.

Pandangan serta input yang diberikan adalah penting untuk memastikan rang undang-undang yang akan digubal dapat memenuhi ekspektasi semua pihak. Dalam hal ini, adalah jelas bahawa Kerajaan komited untuk memastikan pelaksanaan Rang Undang-Undang (Anti Lompat Parti dan Penetapan Had Tempoh Jawatan Perdana Menteri melalui pindaan Perlembagaan Persekutuan dapat direalisasikan sebagaimana ditetapkan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : JAWAB LISAN

DARIPADA : TUAN CHAN FOONG HIN [KOTA KINABALU]

TARIKH : 7 MAC 2022 (ISNIN)

SOALAN

TUAN CHAN FOONG HIN [KOTA KINABALU] minta **MENTERI ALAM SEKITAR DAN AIR** menyatakan sama ada Kementerian bercadang untuk memperoleh sistem ramalan kaji cuaca yang lebih canggih, berketepatan tinggi dan cepat bagi memberi amaran awal mengenai kemungkinan berlaku bencana di Sabah, terutama banjir. Bagaimana maklumat cuaca dan amaran mengenai kemungkinan berlaku bencana alam boleh disalurkan segera seawal mungkin.

JAWAPAN

Tan Sri Yang Di-Pertua,

1. Kementerian Alam Sekitar dan Air (KASA) melalui Jabatan Meteorologi Malaysia (MET Malaysia) berperanan untuk membekalkan maklumat mengenai ramalan cuaca dan penyebaran amaran cuaca kepada rakyat. Teknologi sistem ramalan cuaca yang digunakan oleh MET Malaysia adalah yang terkini, seiring dengan yang digunakan oleh negara-negara maju lain seperti United Kingdom (UK) dan Amerika Syarikat. Sistem ini sentiasa ditambah baik dengan meningkatkan keupayaan rangkaian pencerapan, pemprosesan data dan penyebaran maklumat sedia ada. Antara usaha-usaha yang telah dan sedang diambil oleh MET Malaysia adalah termasuk menambah rangkaian radar cuaca, menambahbaik stesen pencerapan permukaan, mempertingkatkan Model Ramalan Cuaca Numerikal dan menambahbaik sistem penyampaian maklumat.

2. Peningkatan tahap kecekapan perkhidmatan ramalan cuaca merupakan salah satu daripada fokus pihak Kementerian. Untuk makluman Ahli Yang Berhormat, di bawah Rancangan Malaysia Kedua Belas (RMKe-12), MET Malaysia sedang memasang lapan (8) buah stesen radar baharu termasuk sebuah (1) radar baharu di Tawau, Sabah yang dijangka siap sepenuhnya pada tahun 2022. Pembinaan radar ini adalah sebagai tambahan kepada dua (2) buah stesen radar sedia ada di Wilayah Sabah iaitu di Kota Kinabalu dan Sandakan. Dengan tambahan radar baharu ini, pemantauan cuaca seperti hujan lebat adalah lebih tepat menyeluruh terutamanya di Wilayah Sabah.

3. Selain daripada itu juga, MET Malaysia sedang menaiktaraf enam puluh (60) Stesen Pencerapan Permukaan kepada Stesen Cuaca Automatik di seluruh negara dan sembilan (9) daripadanya melibatkan stesen-stesen pencerap di Wilayah Sabah iaitu di Beaufort, Tawau, Sandakan, Kota Marudu, Kuala Penyu, Persiangan, Kota Belud dan Tenom. Ia adalah sebagai tambahan kepada 41 stesen sedia ada dan projek ini dijangka akan siap pada tahun 2022.

4. Untuk makluman Ahli Yang Berhormat, dalam proses meramal cuaca, MET Malaysia menggunakan Model Ramalan Cuaca Numerikal. MET Malaysia telah meningkatkan keupayaan model cuaca dengan mengadaptasi teknologi Sistem Komputer Berprestasi Tinggi (*High Performance Computing* (HPC) sejak pertengahan tahun 2017 lagi. Produk-produk model cuaca yang dihasilkan oleh Sistem HPC ini membolehkan pegawai-pegawai meteorologi untuk membuat ramalan cuaca tujuh hari lebih awal berbanding hanya tiga hari sebelum ini.
5. Seterusnya, MET Malaysia akan mengeluarkan amaran awal mengenai keadaan cuaca selaras dengan Arahan Majlis Keselamatan Negara No. 20. Perincian model ramalan cuaca MET Malaysia mampu membekalkan maklumat ramalan bagi kawasan yang terkesan dengan keadaan cuaca ekstrem atau bencana dengan resolusi satu kilometer persegi berbanding 16 kilometer persegi sebelum ini.
6. Bagi meningkatkan keupayaan pengeluaran amaran ribut petir, MET Malaysia juga telah membangunkan sistem pemantauan dan ramalan fenomena ribut petir dan hujan lebat iaitu *Radar Integrated Nowcasting System* (RaINS) yang menggunakan teknologi termaju rangkaian radar cuaca dan Model Ramalan Cuaca Numerikal janaan Sistem HPC. RaINS berupaya menghasilkan unjuran pergerakan dan intensiti hujan untuk setiap 10 minit sehingga tiga jam ke hadapan.
7. Ramalan dan amaran cuaca disampaikan melalui siaran stesen TV Malaysia (RTM), laman web, media sosial, media massa dan Mesej Pesanan Ringkas (SMS). Seiring dengan perkembangan semasa agar penyampaian perkhidmatan dapat memenuhi kehendak rakyat, MET Malaysia juga telah membangunkan aplikasi myCuaca yang dapat memberikan maklumat cuaca dan gempa bumi untuk diakses pada bila-bila masa oleh orang ramai. MET Malaysia turut melaksanakan RakanMET iaitu medium interaksi dua hala antara MET Malaysia dan orang awam bagi perkongsian maklumat sahih mengenai perkembangan cuaca semasa di dalam negara.
8. Di bawah RMKe-12, MET Malaysia juga akan menambah baik Sistem Penyampaian Maklumat Bencana berkaitan cuaca, gempa bumi

SOALAN NO : 44

dan tsunami yang mesra pengguna dan secara masa nyata sejajar dengan perubahan teknologi terkini. Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

DARIPADA : TUAN WONG KAH WOH (IPOH TIMUR)

TARIKH : 7 MAC 2022 (ISNIN)

SOALAN

TUAN WONG KAH WOH [IPOH TIMUR] minta **PERDANA MENTERI** menyatakan apakah tindakan yang akan diambil terhadap Pesuruhjaya Suruhanjaya Pencegahan Rasuah Malaysia Tan Sri Azam Baki yang enggan menghadirkan diri ke Prosiding Jawatankuasa Pilihan Khas Parlimen Bagi Agensi-Agensi Bawah Jabatan Perdana Menteri.

JAWAPAN

Tuan Yang di-Pertua,

Untuk makluman Yang Berhormat, perkara yang dibangkitkan oleh Yang Berhormat ini sedang dalam perbincangan Jawatankuasa Pilihan Khas Bagi Agensi-Agensi di Bawah Jabatan Perdana Menteri di mana ia adalah di bawah kuasa Parlimen dan saya selaku menteri tidak ingin untuk campur tangan dalam urusan Jawatankuasa Pilihan Khas tersebut.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : DATUK WIRA DR. MOHD HATTA BIN MD.
RAMLI (LUMUT)**

TARIKH : 7 MAC 2022 (ISNIN)

SOALAN

DATUK WIRA DR. MOHD HATTA BIN MD. RAMLI [LUMUT] meminta **MENTERI KANAN PERTAHANAN** menyatakan rangka pelan menyelamatkan projek Pembinaan 6 unit kapal TLDM, *Littoral Combat Ships* (LCS).

JAWAPAN

Tuan Yang di-Pertua,

Kementerian Pertahanan memberikan penelitian khusus demi memastikan pembinaan *Littoral Combat Ships* (LCS) ini dapat diteruskan bagi mengukuhkan lagi sistem pertahanan dan keselamatan perairan negara. Oleh yang demikian, Kementerian sedang meneliti semula perancangan perolehan bersama dengan Agensi Pusat serta akan mengemukakan pelan pemulihannya sebelum diangkat semula ke Jemaah Menteri untuk pertimbangan sewajarnya.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : JAWAB LISAN

**DARIPADA : DATUK IGNATIUS DARELL LEIKING
[PENAMPANG]**

TARIKH : 7 MAC 2022 (SELASA)

SOALAN

DATUK IGNATIUS DARELL LEIKING [PENAMPANG] minta
MENTERI ALAM SEKITAR DAN AIR menyatakan :-

- a) adakah Perjanjian Pemuliharaan Alam Semula Jadi atau Nature Conservation Agreement (NCA) Sabah menepati objektif, dasar, garis panduan dan hala tujuan pasaran karbon Malaysia; dan
- b) adakah perjanjian NCA ini akan menjadi antara model pelaburan yang akan digunapakai di seluruh negara.

JAWAPAN

Tan Sri Yang Di-Pertua,

1. Untuk makluman Ahli Yang Berhormat, antara keputusan utama persidangan UNFCCC COP-26 proses rundingan perubahan iklim di persidangan Negara Ahli Ke-26 di Glasgow, Scotland pada hujung tahun 2021 adalah mengenai prinsip asas bagi pelaksanaan mekanisme pasaran karbon. Antara keputusan utama yang dicapai adalah keperluan wajib untuk membuat pelarasan berpadanan (*corresponding adjustment*) bagi mengelakkan pengiraan berganda (*double counting*) bagi semua transaksi kredit karbon yang melibatkan negara. Dalam masa yang sama, keputusan rundingan juga menyatakan bahawa semua transaksi kredit karbon yang melibatkan pemindahan antarabangsa (*international transfer*) perlu mendapatkan kebenaran *national authority* melalui kerangka institusi yang dibentuk. Selain itu juga, keputusan rundingan turut menyatakan mengenai keperluan untuk membangunkan had transaksi dan mekanisme kawal selia (*safeguards and limits*) bagi transaksi kredit karbon antarabangsa. Ini adalah penting bagi memastikan transaksi kredit karbon antarabangsa adalah telus, tidak dilaksanakan sewenang-wenangnya, serta mengambil kira kepentingan pemegang taruh berkaitan.

2. Berdasarkan keputusan rundingan UNFCCC tersebut, adalah jelas peranan penting Kementerian Alam Sekitar dan Air selaku '*national authority*' berkaitan mekanisme pasaran karbon negara. Bagi tujuan ini, KASA bertanggungjawab untuk memberikan kebenaran (*authorize*) semua transaksi antarabangsa kredit karbon dan melaksanakan pelarasan berpadanan bagi menjamin ketelusan pelaksanaan. Dalam masa yang sama, KASA juga bertanggungjawab untuk membangunkan infrastruktur asas bagi memantau dan menjejaki transaksi kredit karbon negara, dan menyediakan laporan penglibatan negara di dalam mekanisme pasaran karbon. Laporan penglibatan negara di dalam mekanisme pasaran karbon ini juga akan melalui proses penilaian oleh pasukan pakar (*expert review*) yang dilantik oleh UNFCCC. Seperti mana yang diputuskan oleh Jemaah Menteri baru-baru ini, pada masa ini KASA sedang membangunkan Pusat GHG Kebangsaan yang akan

turut mengandungi fungsi khusus berkaitan pemantauan dan pelaporan mekanisme pasaran karbon negara.

3. Sehubungan itu, KASA berpendirian bahawa sebarang usaha dan penglibatan dalam mekanisme pasaran karbon perlulah dirujuk dan dilaporkan kepada KASA selaku '*national authority*' yang diiktiraf oleh UNFCCC. Perkara ini adalah penting kerana penglibatan negara di dalam mekanisme pasaran karbon antarabangsa berpotensi untuk menjejaskan pencapaian NDC dan aspirasi jangka masa panjang pelepasan sifar bersih negara. Dalam masa yang sama, KASA berpandangan penglibatan kerajaan Persekutuan bagi sebarang penglibatan di dalam mekanisme pasaran karbon adalah penting bagi menjamin kepentingan negara dan pemegang taruh berkaitan serta mengelakkan pihak dalam negara seperti Kerajaan Negeri menerima pelaburan yang berat sebelah dan tidak setimpal dengan usaha yang dicurahkan.

4. Untuk makluman ahli Yang Berhormat, Kerajaan Persekutuan tidak dimaklumkan, dirujuk, dan dilibatkan oleh Kerajaan Negeri Sabah dalam proses rundingan bagi perjanjian NCA tersebut. Sehubungan itu, KASA tidak dapat memberikan penjelasan terperinci mengenai kandungan perjanjian tersebut. Maklumat yang diterima oleh Kementerian Alam Sekitar dan Air hanyalah melalui kenyataan media dan kenyataan bertulis dari wakil Kerajaan Negeri Sabah yang dilaporkan di media massa. Sekiranya perjanjian NCA tersebut mempunyai aspek transaksi kredit karbon antarabangsa, maka ianya akan memberi impak secara langsung kepada pencapaian NDC dan aspirasi pelepasan GHG sifar bersih negara. Kementerian Alam Sekitar dan Air juga sentiasa mengalu-alukan Kerajaan Negeri Sabah untuk merujuk dan melibatkan Kerajaan Persekutuan dan pemegang taruh lain di dalam perbincangan berkaitan perjanjian NCA dan mekanisme pasaran karbon pada masa akan datang.

5. Selaras dengan keputusan Jemaah Menteri, KASA telah membangunkan panduan pasaran karbon secara sukarela (Voluntary Carbon Market – VCM) sebagai panduan umum kepada mana-mana

entiti di dalam negara seperti pihak swasta dan Kerajaan Negeri yang ingin terlibat dengan pasaran VCM antarabangsa. Jemaah Menteri juga telah bersetuju dengan cadangan KASA untuk membangunkan platform tunggal perdagangan karbon di peringkat domestik dengan kerjasama Kementerian Kewangan dan BURSA Malaysia. Entiti berkaitan dalam negara seperti pihak swasta dan Kerajaan Negeri boleh memanfaatkan platform ini kelak bagi melaksanakan urusan niaga kredit karbon di peringkat domestik yang secara langsung akan menggalakkan peralihan industri kepada aktiviti rendah karbon dan menarik pelaburan hijau. Platform tersebut sedang berada di dalam fasa pembangunan oleh pihak BURSA Malaysia dan dijangka siap pada hujung tahun 2022. Dalam masa yang sama, KASA juga sedang membangunkan dasar pasaran karbon negara yang selari dengan keputusan persidangan UNFCCC COP-26 Glasgow yang lalu. Dasar ini secara umumnya memperincikan ketetapan dasar dan prinsip asas bagi penglibatan di dalam mekanisme pasaran karbon. KASA akan melaksanakan libat urus bersama pemegang taruh dalam jangka masa terdekat bagi menjelaskan mengenai pembangunan dasar pasaran karbon negara ini.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN

DARIPADA : TUAN TAN KOK WAI (CHERAS)

TARIKH : 7 MAC 2022 (ISNIN)

SOALAN

TUAN TAN KOK WAI [CHERAS] meminta **MENTERI KANAN PERTAHANAN** menyatakan pendirian *ASEAN Defence Minister Meeting* mengenai AUKUS dan langkah-langkah susulan pembantahan.

JAWAPAN

Tuan Yang di-Pertua,

ASEAN Defence Minister Meeting (ADMM) atau dikenali sebagai Mesyuarat Menteri-Menteri Pertahanan ASEAN, tidak pernah menjadikan isu mengenai penubuhan kerjasama tiga hala antara Australia, United Kingdom dan Amerika Syarikat (AUKUS) sebagai satu topik utama dalam perbincangan di peringkat ADMM mahupun di peringkat *Working Group* ADMM. Namun demikian, saya telah mengambil kesempatan semasa Mesyuarat Pemukiman Menteri-Menteri Pertahanan ASEAN (ADMM Retreat) pada 10 November 2021 yang lalu, menyatakan pendirian tegas Malaysia mengenai AUKUS. Perkara ini juga telah dijelaskan semasa sidang Parlimen yang lepas pada 1 Disember 2021.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS**

PERTANYAAN : LISAN

**DARIPADA : TUAN AKMAL NASRULLAH BIN MOHD.
NASIR [JOHOR BAHRU]**

TARIKH : 7 MAC 2022 (ISNIN)

SOALAN

Minta **PERDANA MENTERI** menyatakan keperluan pegawai-pegawai tertinggi agensi Kerajaan untuk membuat pengisytiharan aset bagi menjamin ketelusan dan integriti pentadbiran Kerajaan.

JAWAPAN

**DIJAWAB OLEH YB DATUK DR ABD LATIFF AHMAD
MENTERI DI JABATAN PERDANA MENTERI (TUGAS-TUGAS KHAS)**

Tuan Yang di-Pertua,

1. Peraturan 10, Peraturan-Peraturan Pegawai Awam (Kelakuan dan Tatatertib) 1993 [P.U. (A) 395/1993] memperuntukkan bahawa semua pegawai awam hendaklah mengisytiharkan secara bertulis kepada Ketua Jabatan masing-masing segala harta yang dimiliki olehnya atau isteri atau suami atau anaknya atau yang dipegang oleh mana-mana orang bagi pihaknya atau bagi pihak isteri atau suaminya atau anaknya.

2. Manakala Ceraian UP.7.2.6 Pekeliling Perkhidmatan Sumber Manusia (MyPPSM) pula memberi penjelasan dan panduan mengenai pemilikan dan perisytiharan harta oleh pegawai awam dengan lebih terperinci. Semua pegawai dikehendaki mengisytiharkan harta apabila:

- a. dilantik ke dalam perkhidmatan awam;
- b. dikehendaki oleh Kerajaan;
- c. memperolehi harta tambahan; dan
- d. melupuskan harta.

3. Semua pegawai dikehendaki membuat perisytiharan harta sekurang-kurangnya sekali dalam tempoh lima (5) tahun. Bagi maksud peraturan ini, 'tempoh perisytiharan' harta (termasuk aset) dikira berdasarkan tarikh terakhir perisytiharan harta dibuat. Sekiranya dalam tempoh perisytiharan harta yang ditetapkan itu seseorang pegawai tidak memperolehi/membuat pemerolehan apa-apa harta tambahan atau tidak melupuskan apa-apa harta, maka pegawai berkenaan juga perlu membuat pengakuan mengenainya.

Sekian, terima kasih

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : JAWAB LISAN

**DARIPADA : TUAN WILLIAM LEONG JEE KEEN
[SELAYANG]**

TARIKH : 7 MAC 2022 (ISNIN)

SOALAN

TUAN WILLIAM LEONG JEE KEEN [SELAYANG] minta **MENTERI ALAM SEKITAR DAN AIR** menyatakan pendekatan dan langkah-langkah utama yang diambil untuk menangani kesan perubahan iklim global.

JAWAPAN

Tan Sri Yang Di-Pertua,

1. Bagi menghadapi kesan perubahan iklim global, Malaysia komited untuk melaksanakan tindakan-tindakan mitigasi dan adaptasi. Sebagai negara anggota Kerangka Konvensyen untuk Perubahan Iklim, Malaysia mempunyai obligasi untuk mengemukakan *Nationally Determined Contributions* dan telah mengemukakan komitmen negara untuk mengurangkan kadar intensiti pelepasan gas rumah kaca sebanyak 45% berbanding dengan tahun 2005.

2. Kesan perubahan iklim global atau fenomena pemanasan global turut memberi impak kepada negara. Sebagaimana yang telah dilaporkan dalam Laporan Komunikasi Kebangsaan yang Ketiga (NC3), negara mengalami tiga impak utama akibat daripada kesan perubahan iklim iaitu kejadian banjir yang lebih ekstrem, kemarau panjang dan kenaikan aras laut. Bagi mengurangkan impak perubahan iklim dan mengekalkan kelestarian pembangunan sosioekonomi negara, Kerajaan telah melaksanakan dan akan terus merangka pelbagai langkah tindakan iklim iaitu mitigasi dan adaptasi secara menyeluruh dan bersepadu.

3. Antara langkah pendekatan utama yang akan dilakukan oleh Kementerian untuk menangani impak perubahan iklim ialah:

- i. Melaksanakan pelbagai program untuk mendorong agenda perubahan iklim dengan menggerakkan sumber tenaga manusia dan peruntukan kewangan;
- ii. Memperkenalkan mekanisme pasaran karbon;
- iii. Menjalin kerjasama dengan semua pihak berkepentingan supaya Kementerian Alam Sekitar dan Air (KASA) dapat memenuhi komitmen negara di bawah United Nations Framework Convention on Climate Change (UNFCCC); dan
- iv. Memupuk gaya hidup hijau dalam semua lapisan masyarakat melalui konsep kesihatan planet (planetary health) ke arah pembangunan lestari yang holistik.

4. Fokus Kementerian dalam melaksanakan pendekatan berperingkat dalam menangani impak perubahan iklim termasuklah tindakan segera dan langkah penyelesaian jangka panjang. Khusus untuk adaptasi perubahan iklim, Kementerian sedang dalam proses membangunkan Pelan Adaptasi Kebangsaan (NAP) yang merangkumi lima (5) sektor utama iaitu:

- i. Keselamatan air dan sumber air (*Water security and water resources*);
- ii. Pertanian dan keselamatan makanan (*Agriculture and food security*);
- iii. Infrastruktur, tenaga dan persekitaran terbina (termasuk bandaraya) (*Infrastructure, energy and built environment (include cities)*);
- iv. Perhutanan dan Biodiversiti (*Forestry and biodiversity*); dan
- v. Kesihatan awam (*Public health*).

5. Kejayaan pelaksanaan langkah-langkah ini bergantung kepada kerjasama semua pihak sama ada agensi kerajaan Persekutuan dan Negeri, pihak berkuasa tempatan, NGO, masyarakat dan sebagainya.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS**

PERTANYAAN : LISAN

DARIPADA : YB TUAN BARU BIAN (SELANGAU)

TARIKH : 07 MAC 2022 (ISNIN)

SOALAN

TUAN BARU BIAN [SELANGAU] minta **MENTERI KANAN KERJA RAYA** menyatakan dengan pengesahan ibu kota Indonesia berpindah ke 'Nusantara' di Kalimantan, adakah Kerajaan meneruskan Lebuh Raya Trans Borneo (dari Semanggaris-Tawau - Lg Pa'Sia-Lg Semadoh-Ba'Kelalan/Bario - Lg Bawan) yang dicadangkan oleh Kerajaan PH sebelum ini.

JAWAPAN

Tuan Yang Di-Pertua,

Untuk makluman Ahli Yang Berhormat, Kementerian ini mengambil maklum dan **sedang menyusun strategi pembangunan rangkaian jalan raya terkini** susulan pengesahan perpindahan ibu negara Indonesia ke Nusantara. Salah satu daripada projek yang dikenali pasti adalah Projek Lebuhraya Trans Borneo jajaran Kalabakan-Serudung yang merupakan sebahagian daripada jajaran Lebuhraya Trans Borneo dari Semanggaris - Tawau - Long Pa'Sia - Long Semadoh - Ba'Kelalan/Bario - Long Bawan.

Untuk makluman Ahli Yang Berhormat, projek ini pernah diluluskan oleh Kementerian Kewangan di bawah Inisiatif Belanjawan 2020 dan peruntukan sebanyak RM10 juta telah diluluskan di bawah inisiatif ini bagi melaksanakan kajian kerja-kerja awalan terlebih dahulu. Walau bagaimanapun, pada Jun 2020 Kementerian Kewangan telah memutuskan untuk tidak meneruskan semua inisiatif Belanjawan 2020 yang telah diumumkan. Lanjutan daripada itu, kerja-kerja awalan ini tidak dapat diteruskan kerana tiada peruntukan disalurkan kepada Kementerian ini.

Kementerian ini akan meneliti cadangan projek Lebuhraya Trans Borneo dari Semanggaris-Tawau - Long Pa'Sia - Long Semadoh - Ba'Kelalan/Bario - Long Bawan ini apabila dimohon oleh Kerajaan Sarawak dalam *Rolling Plan* yang akan datang dan akan dipertimbangkan untuk diangkat kepada Agensi Pusat sekiranya memenuhi keperluan teknikal untuk dilaksanakan, tertakluk kepada keutamaan projek dan agihan siling peruntukan pembangunan untuk Kementerian.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

DARIPADA : TUAN LIM KIT SIANG [ISKANDAR PUTERI]

TARIKH : 7 MAC 2022 (ISNIN)

SOALAN

TUAN LIM KIT SIANG [ISKANDAR PUTERI] minta **PERDANA MENTERI** menyatakan status pembangunan Perlis Inland Port yang merupakan salah satu projek penting di bawah NCER.

JAWAPAN

**DIJAWAB OLEH YB DATO' SRI MUSTAPA BIN MOHAMED
MENTERI DI JABATAN PERDANA MENTERI (EKONOMI)**

Tuan Yang di-Pertua,

1. Pembangunan *Perlis Inland Port* (PIP) di Chuping, Perlis merupakan inisiatif Kerajaan Negeri Perlis yang disokong oleh Kerajaan Persekutuan yang dilaksanakan melalui kaedah kerjasama awam swasta (*Public Private Partnership* - PPP).
2. Pembangunan PIP mempunyai dua komponen pembinaan infrastruktur melalui kaedah pembiayaan oleh pihak swasta dan Kerajaan Persekutuan. Pembiayaan melalui pelaburan swasta dengan anggaran kos RM1.2 bilion adalah bagi pembinaan pelabuhan darat (*inland port*) yang akan dilaksana secara berfasa oleh anak syarikat milik Kerajaan Negeri Perlis. Pelaburan ini adalah untuk penyediaan kemudahan, gudang dan bangunan bagi pengendalian kargo di PIP. Pembinaan

pelabuhan darat di bawah tanggungjawab pihak swasta kini telah memperolehi Kebenaran Merancang daripada Pihak Berkuasa Tempatan. Berdasarkan carta perbatuan projek, pembinaan fizikal pelabuhan darat ini dijangka akan dimulakan pada suku pertama tahun 2022 dan dijangka siap pada tahun 2024.

3. Bagi menyokong pelaksanaan projek pelabuhan darat yang dipacu oleh pelaburan swasta, Kerajaan Persekutuan telah meluluskan projek Kemudahan Infrastruktur Luaran PIP di bawah Pihak Berkuasa Pelaksanaan Koridor Utara (NCIA). Ia mengandungi tiga (3) komponen infrastruktur utama yang melibatkan skop laluan tetap jalan raya (*bonded road*), persimpangan bertingkat dan penyediaan landasan keretapi bagi menyediakan ketersambungan ke PIP. Pelaksanaan projek Kemudahan Infrastruktur Luaran PIP oleh NCIA dijangka akan memulakan pembinaan pada suku pertama tahun 2022 dan dijadualkan siap pada tahun 2024, selari dengan jadual pelaksanaan komponen pelabuhan darat oleh pihak swasta.

4. Pembangunan PIP adalah satu komponen penting bagi menggalakkan lagi pertumbuhan ekonomi di utara Semenanjung Malaysia secara umum dan Perlis secara khusus serta kawasan selatan Thailand. Ia akan memudahkan aktiviti logistik kargo import-eksport domestik dan antarabangsa melalui Pelabuhan Pulau Pinang serta sempadan antarabangsa antara Malaysia dan Thailand. Selain itu, ia juga berperanan untuk menjadi pusat kargo bagi menyokong keperluan logistik projek-projek yang dilaksanakan di Koridor Ekonomi Wilayah Utara (NCER). Ini termasuklah pembangunan Chuping Valley Industrial Area (CVIA) yang kini dalam pelaksanaan dan cadangan projek NCER Agri Economic Zone (NAEZ) yang terletak di Lembah Chuping.

5. Projek-projek ini dijangka dapat menarik pelaburan berkualiti sektor swasta dari dalam dan luar negara yang seterusnya akan memangkin pertumbuhan di NCER.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

DARIPADA : DATO' HAJI MAHFUZ OMAR (POKOK SENA)

TARIKH : 7 MAC 2022 (ISNIN)

SOALAN

DATO' HAJI MAHFUZ BIN HAJI OMAR [POKOK SENA] minta **PERDANA MENTERI** menyatakan apakah status paip minyak Sabah Sarawak (SSGP) milik PETRONAS yang dilaporkan masih belum beroperasi sepenuhnya selepas kejadian kebocoran gas pada tahun 2020 seperti yang dilaporkan oleh akhbar. Dan apakah kesan kehilangan pendapatan negara melalui Gas Petroleum Cecair (LNG) oleh kerana harga LNG semasa sekarang yang tinggi dalam sejarah akibat daripada kegagalan paip SSGP tidak beroperasi sepenuhnya.

JAWAPAN

**DIJAWAB OLEH YB DATO' SRI MUSTAPA BIN MOHAMED
MENTERI DI JABATAN PERDANA MENTERI (EKONOMI)**

Tuan Yang di-Pertua,

1. Aktiviti-aktiviti pembaikpulihan yang komprehensif di bawah Pelan Pembaikan dan Jaminan Teknikal untuk paip gas Sabah Sarawak (SSGP) sedang giat dijalankan oleh PETRONAS bagi memastikan SSGP dapat beroperasi semula dengan selamat, selaras dengan piawaian Jabatan Keselamatan dan Kesihatan Pekerjaan (DOSH).
2. Aktiviti-aktiviti pembaikpulihan di bawah pelan tersebut sedang berjalan mengikut jadual operasi yang telah ditetapkan untuk permohonan permit ujian (*Permit to Test* - PTT) dari DOSH pada pertengahan tahun ini.
3. Selain itu, PETRONAS juga merancang untuk menyambung semula bekalan gas asli ke Kompleks LNG PETRONAS di Bintulu melalui saluran paip SSGP pada tahun ini, selaras dengan pelan perniagaan Gas Asli Cecair (LNG).
4. Harga pasaran LNG semasa tidak memainkan sebarang peranan dalam isu ini kerana majoriti perjanjian jualan adalah berdasarkan perjanjian jangka panjang sedia ada.
5. PETRONAS juga telah mengambil beberapa langkah berkaitan untuk mengurangkan impak kekurangan bekalan LNG akibat isu SSGP, termasuklah menggunakan dua kemudahan terapung *Floating LNG* sedia ada bagi tujuan pengeluaran LNG dan memenuhi kewajipan perjanjian urus niaga.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS**

PERTANYAAN : LISAN

**DARIPADA : YB DATUK DR. SHAHRUDDIN BIN MD.
SALLEH [SRI GADING]**

TARIKH : 7 MAC 2022 (ISNIN)

SOALAN

Minta **PERDANA MENTERI** menyatakan apakah Prosedur Operasi Standard jika kawasan menerima kadar hujan yang tinggi yang boleh mengakibatkan banjir di kawasan taman perumahan.

JAWAPAN

**DIJAWAB OLEH YB DATUK DR ABD LATIFF AHMAD
MENTERI DI JABATAN PERDANA MENTERI
(TUGAS-TUGAS KHAS)**

Tuan Yang di-Pertua,

1. Sebagai salah satu agensi yang terlibat dengan pengurusan bencana dan mengeluarkan amaran awal, Jabatan Pengairan dan Saliran (JPS) telah menyediakan siren amaran di kawasan-kawasan sungai yang berisiko dinaiki air dan berpotensi mengakibatkan limpahan.
2. JPS juga telah membangunkan Program Ramalan dan Amaran Banjir (PRAB) yang melibatkan beberapa fasa pembangunan. Sehingga kini, PRAB telah beroperasi sepenuhnya melibatkan tiga lembangan sungai utama iaitu Sg. Kelantan, Sg. Terengganu dan

Sg. Pahang semenjak tahun 2017. Amaran yang dikeluarkan oleh JPS akan disalurkan kepada agensi-agensi berkaitan untuk persediaan menghadapi kemungkinan banjir.

3. Selain itu, NADMA juga telah mengambil inisiatif untuk mewujudkan kerjasama bersama syarikat-syarikat telekomunikasi terkemuka negara untuk menyebarkan amaran banjir kepada umum melalui khidmat pesanan ringkas (SMS). Kerjasama ini dilakukan secara tanggungjawab sosial korporat (CSR).

4. YAB Perdana Menteri juga telah mengarahkan supaya Kementerian Alam Sekitar dan Air (KASA) untuk bekerjasama dengan Suruhanjaya Komunikasi dan Multimedia Malaysia (SKMM) bagi menambahbaik sistem komunikasi untuk tujuan penyaluran maklumat paras air sungai dan keadaan banjir yang lebih efektif.

5. Selain itu, Jawatankuasa Pengurusan Bencana Daerah (JPBD) juga berperanan untuk merangka strategi khusus penyaluran maklumat ke kawasan yang dijangka terjejas banjir dengan menggunakan aset-aset daerah seperti melalui Jabatan Penerangan (JaPen), Polis Diraja Malaysia (PDRM), siar raya fasiliti awam mahupun persendirian atau apa-apa jua kaedah yang bersesuaian mengikut keperluan dan kapasiti di kawasan yang dijangka terjejas.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS (2022)**

PERTANYAAN : LISAN
DARIPADA : PUAN WONG SHU QI [KLUANG]
TARIKH : 7 MAC 2022 (ISNIN)

SOALAN

Minta **PERDANA MENTERI** menyatakan status terkini peratusan dan kos pelaksanaan Pelan Anti Rasuah Nasional (NACP) 2019 - 2023 setakat 1 Mac 2022 dan apakah perancangan Kerajaan untuk melaksanakan baki inisiatif NACP yang belum dilaksanakan sebelum 2023.

(JAWAPAN)

**YB DATO SRI DR. HAJI WAN JUNAIDI BIN TUANKU JAAFAR,
MENTERI DI JABATAN PERDANA MENTERI
(PARLIMEN DAN UNDANG-UNDANG)**

Tuan Yang di-Pertua,

Pelan Anti Rasuah Nasional (NACP) merangkumi 115 inisiatif yang dibahagikan kepada 6 bidang utama. Pelaksanaan NACP telah bermula pelaksanaannya pada Januari 2019 dan sehingga 31 Disember 2019, 29 inisiatif yang telah selesai pelaksanaan dengan pencapaian output pada tahun 2019.

Laporan Semakan Semula Separuh Penggal NACP 2019-2023 telah dikeluarkan pada 19 Mei 2021 dengan menggariskan 82 inisiatif berasaskan kepada keperluan penambahbaikan berterusan seiring dengan dasar semasa kerajaan ke atas inisiatif-inisiatif yang digariskan dalam NACP 2019-2023.

Laporan Kemajuan NACP Bagi Tahun 2019 telah diedarkan kepada Parlimen pada November 2020 manakala Laporan Kemajuan NACP Bagi Tahun 2020 dan 2021 dijangka akan dikeluarkan dalam tempoh Penggal Kelima, Parlimen Ke-14 Tahun 2022.

Kerajaan akan meneruskan pelaksanaan yang terdapat di dalam NACP yang mempunyai jangka masa sehingga tahun 2023. Sehingga 31 Disember 2021, lapan (8) inisiatif telah siap dilaksanakan iaitu 33% secara menyeluruh dan terdapat lebih kurang 14 inisiatif lagi yang akan selesai dilaksanakan pada suku tahun kedua 2022.

Pelaksanaan NACP menggunakan peruntukan semasa Kerajaan dan sekiranya terdapat sebarang perubahan dari segi pelaksanaan yang memerlukan kos tambahan, pihak agensi peneraju akan memohon kepada pihak berkaitan dalam mendapatkan peruntukan tambahan yang sewajarnya.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS**

PERTANYAAN : LISAN

**DARIPADA : YB TUAN STEVEN CHOONG SHIAU YOON
(TEBRAU)**

TARIKH : 07 MAC 2022 (ISNIN)

SOALAN

TUAN STEVEN CHOONG SHIAU YOON [TEBRAU] minta **MENTERI KANAN KERJA RAYA** menyatakan bilakah Projek Menaik Taraf Lebuhraya Pasir Gudang (FT17) dari empat lorong kepada enam lorong sepanjang lebuhraya tersebut disiapkan sepenuhnya memandangkan kesesakan waktu pergi dan balik kerja dan keperluan tersebut adalah mendesak.

JAWAPAN

Tuan Yang Di-Pertua,

Untuk makluman Ahli Yang Berhormat, cadangan menaiktaraf Laluan FT17 Lebuhraya Pasir Gudang kepada 6 lorong 2 hala dengan piawaian U5 bagi mengurangkan kesesakan lalulintas terbahagi kepada empat (4) fasa iaitu Fasa 1, 2A, 2B dan 3 yang merangkumi jajaran sepanjang 28.2 km.

Fasa 1 bermula dari Persimpangan Kangkar Tebrau sehingga ke Persimpangan Plentong melibatkan jajaran sepanjang 8.0 km telah siap pada 31 Disember 2016 dan Fasa 2A daripada Persimpangan Plentong ke Persimpangan Bandar Seri Alam / Taman Rinting melibatkan jajaran sepanjang 7.7 km juga telah siap pada 31 Oktober 2018.

Bagi meneruskan kesinambungan projek tersebut, Fasa 2B telah diluluskan pada Rolling Plan 4 Tahun 2020, Rancangan Malaysia Kesebelas (RMKe-11) yang melibatkan jajaran sepanjang 5.5 km iaitu bermula daripada Persimpangan Bandar Seri Alam /Taman Rinting ke Persimpangan Pasir Gudang dan kini di peringkat perolehan.

Untuk makluman Ahli yang Berhormat, bagi fasa terakhir iaitu Fasa 3: Dari Persimpangan Bertingkat Perling Hingga Ke Susur Naik Lebuhraya Utara Selatan, Kementerian ini telah mengangkat permohonan projek tersebut untuk kelulusan Agensi Pusat pada Rolling Plan 2 (RP2), Rancangan Malaysia Kedua Belas (RMKe-12). Walau bagaimanapun, projek ini tidak mendapat kelulusan daripada Agensi Pusat pada tempoh tersebut.

Kementerian ini akan meneliti cadangan projek ini sekiranya dimohon dalam Rolling Plan yang akan datang dan diangkat semula kepada Agensi Pusat untuk pertimbangan dan kelulusan.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS**

PERTANYAAN : LISAN

**DARIPADA : TUAN M. KULASEGARAN
[IPOH BARAT]**

TARIKH : 7 MAC 2022 (ISNIN)

SOALAN

TUAN M. KULASEGARAN [IPOH BARAT] minta **PERDANA MENTERI** menyatakan sama ada Suruhanjaya Pilihan Raya (SPR) akan membenarkan simbol atau logo parti masing-masing dicetak dengan warna dalam kertas undi pada Pilihan Raya Umum yang ke-15. Jika tidak, mengapa tidak.

JAWAPAN

**YB DATO' SRI DR. HAJI WAN JUNAIDI BIN TUANKU JAAFAR,
MENTERI DI JABATAN PERDANA MENTERI
(PARLIMEN DAN UNDANG-UNDANG)**

Tuan Yang di-Pertua,

Untuk makluman Ahli Yang Berhormat, SPR tiada cadangan untuk melaksanakan penggunaan cetakan simbol parti berwarna pada kertas undi dalam PRU Ke-15 akan datang. SPR melihat kaedah sedia ada iaitu cetakan tanpa warna pada kertas undi adalah yang terbaik bagi pelaksanaan pilihan raya di negara ini.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : JAWAB LISAN

DARIPADA : YB TUAN CHAN MING KAI [ALOR SETAR]

TARIKH : 7 MAC 2022

SOALAN

YB TUAN CHAN MING KAI [ALOR SETAR] minta **MENTERI ALAM
SEKITAR DAN AIR** menyatakan penghutang bil air tertinggi bagi premis
Kerajaan di setiap negeri serta jumlah tunggakan masing-masing.

JAWAPAN

Tuan Yang di-Pertua,

1. Untuk makluman Yang Berhormat, semua operator air tidak boleh mendedahkan data peribadi serta maklumat lain mengenai penggunaanya kerana tertakluk kepada Akta Perlindungan Data Peribadi 2010 (Akta 709). Sehubungan itu, bagi sesi dewan pada hari ini, Kementerian tidak dapat mengemukakan berhubung maklumat spesifik mengenai identiti akaun penghutang serta jumlah nilai hutang tertunggak seperti yang dipohon.

2. Namun secara keseluruhannya, jumlah hutang tertunggak penghutang bil air tertinggi bagi premis Kerajaan di setiap negeri di bawah kawal selia Suruhanjaya Perkhidmatan Air Negara (SPAN) sehingga 31 Disember 2021 adalah RM22.9 juta dengan pecahan mengikut negeri seperti berikut:

1. Kedah – Tiada tunggakan
2. Pulau Pinang – Tiada tunggakan
3. Perak – Tiada tunggakan
4. Perlis – RM1.6 juta
5. Kelantan – RM1.5 juta
6. Terengganu – RM0.2 juta
7. Pahang – RM2.1 juta
8. Selangor – RM6.9 juta
9. Negeri Sembilan – RM0.9 juta
10. Melaka – RM0.7 juta
11. Johor – RM7.7 juta
12. Labuan – RM1.3 juta

Sekian terima kasih.

**PEMBERITAHU PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS**

PERTANYAAN : LISAN

DARIPADA : YB DR. ONG KIAN MING [BANGI]

TARIKH : 7 MAC 2022 (ISNIN)

SOALAN

minta **PERDANA MENTERI** menyatakan berapa jumlah perbelanjaan bagi program 100 Hari Aspirasi Keluarga Malaysia yang berlangsung dari 9 hingga 12 Disember 2021 di Pusat Konvensyen Kuala Lumpur (KLCC), dan apakah sumber peruntukan belanjawan yang digunakan bagi perbelanjaan tersebut.

JAWAPAN

**DIJAWAB OLEH YB DATUK DR. ABD LATIFF BIN AHMAD
MENTERI DI JABATAN PERDANA MENTERI
(TUGAS-TUGAS KHAS)**

Tuan Yang di-Pertua,

1. Jumlah perbelanjaan bagi program 100 Hari Aspirasi Keluarga Malaysia (AKM) yang berlangsung pada 9 hingga 12 Disember di KLCC adalah sebanyak RM13.696 juta. Sumber pembiayaan adalah dari Perbelanjaan Mengurus Kerajaan.

2. Perbelanjaan tersebut meliputi kos pelaksanaan kempen 100 Hari AKM, kos pelaksanaan promosi, publisiti dan tarikan pengunjung, kos bagi keperluan pameran dan Kapsul Keluarga Malaysia, kos persiapan tempat, jurugambar dan juruvideo, kawalan keselamatan dan kesejahteraan, kos keurusetiaan dan penginapan, pembayaran yuran pengurusan acara, dan perbelanjaan perkhidmatan seperti kos pembersihan, internet dan sebagainya.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN

**DARIPADA : YB TUAN SANISVARA NETHAJI RAYER A/L
RAJAJI [JELUTONG]**

TARIKH : 7 MAC 2022 (ISNIN)

SOALAN

Minta **PERDANA MENTERI** menyatakan angka jumlah orang yang terkorban akibat kejadian banjir yang berlaku pada Disember 2021 dan Januari 2022 di Selangor, Pahang, Melaka, Negeri Sembilan dan Johor.

JAWAPAN

**DIJAWAB OLEH YB DATUK DR ABD LATIFF AHMAD
MENTERI DI JABATAN PERDANA MENTERI
(TUGAS-TUGAS KHAS)**

Tuan Yang di-Pertua,

1. Berdasarkan maklumat daripada Polis Diraja Malaysia (PDRM), secara keseluruhannya sejak Monsun Timur Laut 2021/2022 berlaku, sebanyak 55 kes kematian telah dilaporkan. 52 kematian berlaku pada Disember 2021, manakala 3 kematian berlaku pada Januari 2022. Seramai 2 orang mangsa masih lagi dilaporkan hilang di negeri Pahang.
2. Negeri Selangor mencatatkan jumlah kematian yang tertinggi, 25 kematian, diikuti negeri Pahang 21 kematian, Kelantan 4 kematian, Sabah 3 kematian serta Negeri Sembilan dan Johor, masing-masing mencatatkan 1 kematian. Kes kematian ini melibatkan 40 orang lelaki dewasa, 12 orang perempuan dewasa, 2 orang kanak-kanak lelaki dan seorang kanak-kanak perempuan. Antara punca kematian adalah disebabkan mati lemas selepas dihanyutkan oleh arus deras, terperangkap dalam kenderaan serta tertimbus akibat tanah runtuh.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN
DARIPADA : DATO' ABDULLAH SANI BIN ABDUL HAMID
[KAPAR]
TARIKH : 7 MAC 2022 (ISNIN)

SOALAN

Minta **PERDANA MENTERI** menyatakan pelan tindakan dalam menangani isu integriti dalam kalangan sektor perkhidmatan awam terutamanya pegawai tinggi Kerajaan dan agensi Kerajaan.

JAWAPAN

**YB DATO SRI DR. HAJI WAN JUNAIDI BIN TUANKU JAAFAR,
MENTERI DI JABATAN PERDANA MENTERI
(PARLIMEN DAN UNDANG-UNDANG)**

Tuan Yang di-Pertua,

Seperti mana Yang Berhormat sedia maklum, Pusat Governans, Integriti & Anti Rasuah Nasional (GIACC) masih terus menyelaras dan menangani isu-isu berkaitan tadbir urus, integriti dan antirasuah secara holistik sejak ditubuhkan pada 1 Jun 2018. Salah satu usaha penting untuk pembangunan negara adalah penyelarasan dan pemantauan pelaksanaan Pelan Antirasuah Nasional (NACP).

GIACC juga turut mengurusetiakan Mesyuarat Jawatankuasa Khas Kabinet Mengenai Anti-Rasuah (JKKMAR) yang dipengerusikan oleh YAB Perdana Menteri. JKKMAR berperanan untuk menimbang, menilai dan meluluskan dasar-dasar berhubung pemantapan governans, integriti dan antirasuah dalam sistem pengurusan pentadbiran Kerajaan.

Sehingga kini, sebanyak 14 Siri Mesyuarat JKKMAR telah diadakan. Melalui langkah ini, Kerajaan dapat memastikan pelaksanaan inisiatif-inisiatif yang digariskan dalam NACP dapat diteruskan.

Secara keseluruhan, melalui penetapan inisiatif di bawah NACP dan keputusan JKKMAR bermula dari tahun 2018 hingga kini, terdapat lebih kurang 77 inisiatif yang melibatkan perkhidmatan awam keseluruhannya. Secara amnya pihak Jabatan Perkhidmatan Awam (JPA) dan beberapa agensi strategik yang lain telah dipertanggungjawabkan untuk menerajui beberapa inisiatif yang melibatkan Pegawai Tinggi Kerajaan di dalam agensi Kerajaan.

PAntara inisiatif yang masih di dalam tindakan pihak JPA dan beberapa agensi Kerajaan lain adalah:

- (i) Meminda Pekeliling Perkhidmatan Bil. 3 Tahun 1998 dengan membuat semakan semula ke atas pekeliling berkaitan penerimaan hadiah;
- (ii) Mengukuhkan mekanisme dalam menguatkuasa pusingan kerja secara mandatori kepada penjawat awam yang memegang jawatan sensitif;
- (iii) Menambahbaik garis panduan penglibatan dan pelantikan pegawai kanan Kerajaan sebagai Ahli Lembaga Pengarah dan Ketua Pegawai Eksekutif di semua Badan Berkanun dan Syarikat Berkepentingan Kerajaan;
- (iv) Mewujudkan inisiatif untuk menggalakkan dan menguruskan nilai baik di tempat kerja berteraskan integriti, akauntabiliti dan kecekapan dalam sektor awam melalui:
 - a) Sistem Pengurusan Nilai Audit (SPAN); dan
 - b) Modul Pemantapan Nilai Perkhidmatan Awam;
- (v) Menambahbaik proses kenaikan pangkat perkhidmatan awam sedia ada dengan mengambil kira elemen integriti sebagai prasyarat (termasuk pegawai tinggi Kerajaan);

- (vi) Menyemak semula dan memperkukuhkan proses tapisan integriti sedia ada khususnya pegawai Kerajaan yang memegang jawatan dan tanggungjawab yang berisiko tinggi;
- (vii) Memperkenalkan cadangan alternatif bagi melaksanakan pemusatan beberapa jawatan Pihak Berkuasa Tempatan;
- (viii) Meningkatkan sistem perolehan berasaskan teknologi (e-perolehan) bagi mengurangkan campur tangan manusia;
- (ix) Mewujudkan Kod Etika Perkhidmatan Awam berdasarkan 3 prinsip utama iaitu Kenegaraan, Tadbir Urus yang berintegriti dan Pembudayaan Nilai-Nilai Murni; dan
- (x) Melaksanakan Program Pembudayaan Etika Perkhidmatan Awam di peringkat kementerian / jabatan / agensi Kerajaan, termasuk keperluan menandatangani Akuan Pematuhan Pegawai Awam setiap kali urusan pelantikan, pertukaran dan kenaikan pangkat dilaksanakan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS**

PERTANYAAN : LISAN

DARIPADA : TUAN CHONG CHIENG JEN [STAMPIN]

TARIKH : 7 MAC 2022 (ISNIN)

SOALAN:

minta **PERDANA MENTERI** menyatakan jumlah pegawai dalam perkhidmatan awam yang memegang jawatan Gred 54 dan ke atas dan apakah angka terperinci dari segi kaum dan negeri asal pegawai-pegawai tersebut.

JAWAPAN

**DIJAWAB OLEH YB DATUK DR ABD LATIFF AHMAD
MENTERI DI JABATAN PERDANA MENTERI
(TUGAS-TUGAS KHAS)**

Tuan Yang di-Pertua,

1. Sehingga 16 Februari 2022, berdasarkan status pengisian perjawatan di dalam Sistem HRMIS Jabatan Perkhidmatan Awam, bilangan pegawai awam Persekutuan Gred 54 dan ke atas tidak termasuk Polis dan Tentera adalah seramai 25,947 orang.

2. Daripada jumlah tersebut, seramai 19,826 (76.41%) Melayu, 3,220 (12.41%) Cina, 1,996 (7.69%) India, 445 (1.72%) Bumiputera Sabah, 317 (1.22%) Bumiputera Sarawak dan 143 (0.55%) lain-lain kaum.

Kaum	Jumlah Pegawai Gred 54 dan ke atas	Peratus
Melayu	19,826	76.41%
Cina	3,220	12.41%
India	1,996	7.69%

Bumiputera Sabah	445	1.72%
Bumiputera Sarawak	317	1.22%
Lain-Lain Kaum	143	0.55%
JUMLAH KESELURUHAN	25,947	100.00%

3. Bilangan pegawai berkenaan mengikut negeri kelahiran pula adalah seramai 4,443 (17.12%) Kelantan, 3,018 (11.63%) Perak, 2,854 (11.00%) Johor, 2,359 (9.09%) Kedah, 1,875 (7.23%) Terengganu, 1,858 (7.16%) Selangor, 1,781 (6.86%) W.P Kuala Lumpur, 1,585 (6.11%) Pulau Pinang, 1,318 (5.08%) Negeri Sembilan, 1,207 (4.65%) Melaka, 1,153 (4.44%) Pahang, 1,040 (4.01%) Sarawak, 747 (2.88%) Sabah, 361 (1.39%) Perlis, 340 (1.31%) luar negara, 8 (0.03%) W.P Labuan.

Negeri	Jumlah Pegawai Gred 54 dan ke atas	Peratus
Kelantan	4,443	17.12%
Perak	3,018	11.63%
Johor	2,854	11.00%
Kedah	2,359	9.09%
Terengganu	1,875	7.23%
Selangor	1,858	7.16%
W.P. Kuala Lumpur	1,781	6.86%
Pulau Pinang	1,585	6.11%
Negeri Sembilan	1,318	5.08%
Melaka	1,207	4.65%
Pahang	1,153	4.44%
Sarawak	1,040	4.01%
Sabah	747	2.88%
Perlis	361	1.39%
Luar Negara	340	1.31%
W.P. Labuan	8	0.03%
JUMLAH KESELURUHAN	25,947	100.00%

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

DARIPADA : TUAN OSCAR LING CHAI YEW [SIBU]

TARIKH : 7 MAC 2022 (ISNIN)

SOALAN

TUAN OSCAR LING CHAI YEW [SIBU] minta **PERDANA MENTERI** menyatakan mengapakah masih ada beberapa negeri yang belum meminda perlembagaan negeri supaya warganegara yang berusia 18 tahun boleh mengundi dan menjadi calon dalam pilihan raya. Nyatakan negeri-negeri yang belum meminda perlembagaan negeri mereka dan bagaimana Kerajaan Persekutuan memastikan negeri-negeri itu mengikut dasar Kerajaan Persekutuan dan apakah langkah yang digunakan oleh Kerajaan Persekutuan untuk mengatasi masalah ini.

JAWAPAN

**YB DATO SRI DR. HAJI WAN JUNAIDI BIN TUANKU JAAFAR,
MENTERI DI JABATAN PERDANA MENTERI
(PARLIMEN DAN UNDANG-UNDANG)**

Tuan Yang di-Pertua,

Pindaan berkaitan dengan had umur calon di bawah Perkara 47 Perlembagaan Persekutuan bagi ahli Dewan Rakyat dan Seksyen 5 Jadual Kelapan Perlembagaan Persekutuan bagi ahli Dewan Negeri telah diluluskan di Dewan Rakyat pada **16 Julai 2019** dan pada **25 Julai 2019** di Dewan Negara bersama-sama dengan pindaan had umur pengundi 18 tahun serta pendaftaran pemilih secara automatik. Pada **4 September 2021**, Duli Yang Maha Mulia Seri Paduka Baginda Yang di-Pertuan Agong telah berkenan ke atas Rang Undang-Undang (Pindaan) 2019. Ia seterusnya telah diwartakan sebagai Akta Perlembagaan (Pindaan) 2019 [Akta A1603] pada 10 September 2019 dan pindaan kepada Perkara 47 dan Jadual Kelapan Perlembagaan Persekutuan telah dikuatkuasakan pada **11 September 2019**.

Urusan had umur calon ahli Dewan Negeri adalah tertakluk kepada Perlembagaan Negeri atau Undang-Undang Tubuh Negeri yang juga perlu dipinda agar selaras dengan pindaan di bawah Seksyen 5 Jadual Kelapan Perlembagaan Persekutuan. Bagi maksud ini, setiap negeri mempunyai peruntukan badan perundangannya yang unik dan tersendiri bagi urusan melaksanakan apa-apa pindaan yang berkaitan hal ehwal perundangan negeri. Berdasarkan maklumat yang diperolehi SPR setakat 17 Januari 2022, negeri-negeri yang telah melulus dan menguatkuasakan pindaan had umur calon ahli Dewan Negeri daripada 21 tahun kepada 18 tahun adalah **Kelantan, Perak, Pulau Pinang, Perlis, Kedah, Sabah dan Sarawak**.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : JAWAB LISAN

DARIPADA : PUAN YEO BEE YIN [BAKRI]

TARIKH : 7 MAC 2022 (ISNIN)

SOALAN

PUAN YEO BEE YIN [BAKRI] minta **MENTERI ALAM SEKITAR DAN AIR** menyatakan strategi pemulihan untuk kira-kira 20 sungai Kelas V (BOD) di Johor.

JAWAPAN

Tuan Yang Dipertua,

1. Untuk makluman Yang Berhormat, mengikut Laporan Kualiti Alam Sekeliling 2018 hingga 2020 yang diterbitkan oleh Jabatan Alam Sekitar (JAS), jumlah sungai yang dikategorikan sebagai **Kelas V** bagi parameter *Biological Oxygen Demand* (BOD) adalah seperti berikut:

- (i) 12 sungai dalam Kategori V (BOD) pada tahun 2018;
- (ii) 15 sungai dalam Kategori V (BOD) pada tahun 2019; dan
- (iii) 7 sungai dalam Kategori V (BOD) pada tahun 2020.

2. Untuk tempoh 2018 hingga 2020, didapati bilangan sungai untuk Kategori V bagi parameter BOD di Johor telah berkurang. Ini menunjukkan kualiti air sungai di Johor adalah semakin baik.

3. Dalam usaha meningkatkan kualiti air sungai yang terdapat di Negeri Johor, Kementerian Alam Sekitar dan Air (KASA) melalui JAS telah melaksanakan strategi yang merangkumi program penguatkuasaan ke atas punca-punca pencemaran, pengawasan kualiti air sungai dan pelaksanaan program komunikasi, pendidikan dan kesedaran awam (*communication, education and public awareness* - CEPA).

4. Antara langkah-langkah yang dilaksanakan:

- (i) mempertingkatkan penguatkuasaan bagi punca-punca yang tertakluk di bawah Akta Kualiti Alam Sekeliling 1974 (AKAS 1974) dan peraturan-peraturan di bawahnya. Sebarang ketidakpatuhan akan diambil tindakan berdasarkan AKAS 1974 seperti penahanan operasi, kompaun, tindakan mahkamah, tarik atau gantung lesen dan perintah larangan operasi;
- (ii) memastikan projek-projek pembangunan yang tertakluk kepada keperluan melaksanakan *Environmental Impact Assessment* (EIA) terutama yang melibatkan kerja tanah, hendaklah

menyediakan pelan kawalan hakisan dan mendapan dan seterusnya mematuhi syarat-syarat kelulusan laporan EIA;

- (iii) mengenalpasti lokasi aduan yang sering dikaitkan dengan pencemaran dan sering diadukan supaya penguatkuasaan adalah lebih berfokus;
- (iv) meningkatkan penggunaan teknologi seperti penggunaan *drone* dan pelaporan pemantauan alam sekitar secara atas talian; dan
- (v) meningkatkan penggunaan data dan maklumat pengawasan kualiti air sungai untuk merancang dan menyusun strategi penguatkuasaan. Pengesanan perubahan kepada kualiti air sungai akan disusuli dengan tindakan penguatkuasaan di lapangan.

5. Selain daripada aspek penguatkuasaan dan pemantauan dibawah AKAS 1974, KASA juga akan mengukuhkan kerjasama melalui pelaksanaan operasi bersepadu dengan agensi-agensi penguatkuasaan yang lain seperti Pihak Berkuasa Tempatan, Badan Kawalselia Air Negeri Johor dan Syarikat Air Johor berdasarkan bidang kuasa masing-masing.

6. Akhir sekali, usaha menjaga kelestarian alam sekitar perlu melibatkan semua pihak seperti penduduk setempat, industri, institusi pengajian tinggi, badan bukan kerajaan (*non-governmental organization* - NGO) dan sebagainya. Antara program yang dilaksanakan KASA adalah program Kutip Sampah sambil Riadah (KUDAH) khususnya gotong-royong membersihkan sungai, ceramah kesedaran, pameran atau bengkel kepada orang awam.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : JAWAB LISAN

**DARIPADA : DATUK SERI PANGLIMA MADIUS TANGAU
[TUARAN]**

TARIKH : 7 MAC 2022 (SELASA)

SOALAN

DATUK SERI PANGLIMA MADIUS TANGAU [TUARAN] minta **MENTERI ALAM SEKITAR DAN AIR** menyatakan adakah Kerajaan Negeri Sabah mempunyai kuasa untuk melaksanakan Carbon Trading tanpa merujuk kepada Kerajaan Persekutuan.

JAWAPAN

Tan Sri Yang Di-Pertua,

1. Untuk makluman Ahli Yang Berhormat, antara keputusan utama persidangan UNFCCC COP-26 proses rundingan perubahan iklim di persidangan Negara Ahli Ke-26 di Glasgow, Scotland pada hujung tahun 2021 adalah mengenai prinsip asas bagi pelaksanaan mekanisme pasaran karbon. Antara keputusan utama yang dicapai adalah keperluan wajib untuk membuat pelarasan berpadanan (*corresponding adjustment*) bagi mengelakkan pengiraan berganda (*double counting*) bagi semua transaksi kredit karbon yang melibatkan negara. Dalam masa yang sama, keputusan rundingan juga menyatakan bahawa semua transaksi kredit karbon yang melibatkan pemindahan antarabangsa (*international transfer*) perlu mendapatkan kebenaran *national authority* melalui kerangka institusi yang dibentuk. Selain itu juga, keputusan rundingan turut menyatakan mengenai keperluan untuk

membangunkan had transaksi dan mekanisme kawal selia (*safeguards and limits*) bagi transaksi kredit karbon antarabangsa. Ini adalah penting bagi memastikan transaksi kredit karbon antarabangsa adalah telus, tidak dilaksanakan sewenang-wenangnya, serta mengambil kira kepentingan pemegang taruh berkaitan.

2. Berdasarkan keputusan rundingan UNFCCC tersebut, adalah jelas peranan penting Kementerian Alam Sekitar dan Air selaku '*national authority*' berkaitan mekanisme pasaran karbon negara. Bagi tujuan ini, KASA bertanggungjawab untuk memberikan kebenaran (*authorize*) semua transaksi antarabangsa kredit karbon dan melaksanakan pelarasan berpadanan bagi menjamin ketelusan pelaksanaan. Dalam masa yang sama, KASA juga bertanggungjawab untuk membangunkan infrastruktur asas bagi memantau dan menjejaki transaksi kredit karbon negara, dan menyediakan laporan penglibatan negara di dalam mekanisme pasaran karbon. Laporan penglibatan negara di dalam mekanisme pasaran karbon ini juga akan melalui proses penilaian oleh pasukan pakar (*expert review*) yang dilantik oleh UNFCCC. Seperti mana yang diputuskan oleh Jemaah Menteri baru-baru ini, pada masa ini KASA sedang membangunkan Pusat GHG Kebangsaan yang akan turut mengandungi fungsi khusus berkaitan pemantauan dan pelaporan mekanisme pasaran karbon negara.

3. Sehubungan itu, KASA berpendirian bahawa sebarang usaha dan penglibatan dalam mekanisme pasaran karbon perlulah dirujuk dan dilaporkan kepada KASA selaku '*national authority*' yang diiktiraf oleh UNFCCC. Perkara ini adalah penting kerana penglibatan negara di dalam mekanisme pasaran karbon antarabangsa berpotensi untuk menjejaskan pencapaian NDC dan aspirasi jangka masa panjang pelepasan sifar bersih negara. Dalam masa yang sama, KASA berpandangan penglibatan kerajaan Persekutuan bagi sebarang penglibatan di dalam mekanisme pasaran karbon adalah penting bagi menjamin kepentingan negara dan pemegang taruh berkaitan serta mengelakkan pihak dalam negara seperti Kerajaan Negeri menerima pelaburan yang berat sebelah dan tidak setimpal dengan usaha yang dicurahkan.

4. Untuk makluman ahli Yang Berhormat, Kerajaan Persekutuan tidak dimaklumkan, dirujuk, dan dilibatkan oleh Kerajaan Negeri Sabah dalam proses rundingan bagi perjanjian NCA tersebut. Sehubungan itu, KASA tidak dapat memberikan penjelasan terperinci mengenai kandungan perjanjian tersebut. Maklumat yang diterima oleh Kementerian Alam Sekitar dan Air hanyalah melalui kenyataan media dan kenyataan bertulis dari wakil Kerajaan Negeri Sabah yang dilaporkan di media massa. Sekiranya perjanjian NCA tersebut mempunyai aspek transaksi kredit karbon antarabangsa, maka ianya akan memberi impak secara langsung kepada pencapaian NDC dan aspirasi pelepasan GHG sifar bersih negara. Kementerian Alam Sekitar dan Air juga sentiasa mengalu-alukan Kerajaan Negeri Sabah untuk merujuk dan melibatkan Kerajaan Persekutuan dan pemegang taruh lain di dalam perbincangan berkaitan perjanjian NCA dan mekanisme pasaran karbon pada masa akan datang.

5. Selaras dengan keputusan Jemaah Menteri, KASA telah membangunkan panduan pasaran karbon secara sukarela (Voluntary Carbon Market – VCM) sebagai panduan umum kepada mana-mana entiti di dalam negara seperti pihak swasta dan Kerajaan Negeri yang ingin terlibat dengan pasaran VCM antarabangsa. Jemaah Menteri juga telah bersetuju dengan cadangan KASA untuk membangunkan platform tunggal perdagangan karbon di peringkat domestik dengan kerjasama Kementerian Kewangan dan BURSA Malaysia. Entiti berkaitan dalam negara seperti pihak swasta dan Kerajaan Negeri boleh memanfaatkan platform ini kelak bagi melaksanakan urusan niaga kredit karbon di peringkat domestik yang secara langsung akan menggalakkan peralihan industri kepada aktiviti rendah karbon dan menarik pelaburan hijau. Platform tersebut sedang berada di dalam fasa pembangunan oleh pihak BURSA Malaysia dan dijangka siap pada hujung tahun 2022. Dalam masa yang sama, KASA juga sedang membangunkan dasar pasaran karbon negara yang selari dengan keputusan persidangan UNFCCC COP-26 Glasgow yang lalu. Dasar ini secara umumnya memperincikan ketetapan dasar dan prinsip asas bagi penglibatan di dalam mekanisme pasaran karbon. KASA akan melaksanakan libat urus bersama pemegang taruh dalam jangka masa terdekat bagi

NO. SOALAN : 65

menjelaskan mengenai pembangunan dasar pasaran karbon negara ini.
Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

DARIPADA : DATO' NGEH KOO HAM [BERUAS]

TARIKH : 07 MAC 2022 (ISNIN)

SOALAN

DATO' NGEH KOO HAM [BERUAS] minta **PERDANA MENTERI** menyatakan mengapa Suruhanjaya Sekuriti Malaysia menyatakan bahawa Ketua Suruhanjaya Pencegahan Rasuah Malaysia, Tan Sri Azam Bin Baki adalah orang yang mengawal dan menguruskan akaun jual-beli sahamnya tetapi Tan Sri Azam Bin Baki sendiri telah di dalam satu sidang media menyatakan bahawa akaun sahamnya digunakan oleh adik lelakinya, Dato' Nasir Bin Baki untuk membeli saham atas namanya. Adakah Tan Sri Azam Baki telah melakukan apa-apa kesalahan di bawah mana-mana peraturan atau undang-undang berkenaan dengan saham dan waran yang dimilikinya dalam Getz Global Berhad (masa itu dipanggil KBES Berhad) dan Excel Force MSC Berhad.

JAWAPAN

**YB DATO SRI DR. HAJI WAN JUNAIDI BIN TUANKU JAAFAR,
MENTERI DI JABATAN PERDANA MENTERI
(PARLIMEN DAN UNDANG-UNDANG)**

Tuan Yang di-Pertua,

1. Untuk makluman Ahli Yang Berhormat, isu saham yang di pertikaikan oleh banyak pihak daripada parti pembangkang sebenarnya telahpun selesai. Selain daripada itu, isu ini juga telah diputuskan dan tiada kes oleh inkuiri pihak Suruhanjaya Sekuriti Malaysia (SC). Malahan, Ketua Pesuruhjaya Suruhanjaya Pencegahan Rasuah Malaysia (KPSPRM) telah pun melalui beberapa Jawatankuasa iaitu:

- i. Lembaga Penasihat Pencegahan Rasuah (LPPR),
- ii. Jawatankuasa Mencegah Rasuah Parlimen (JKMR); dan
- iii. Jawatankuasa Aduan (JKA).

2. Menerusi satu kenyataan SC pada 18 Januari 2022, suruhanjaya itu yang selesai menjalankan siasatan menjelaskan bahawa telah menyelesaikan siasatan berdasarkan bukti yang dikumpul dan SC tidak dapat memastikan secara muktamad jika terdapat pelanggaran di bawah Seksyen 25(4) Akta Perindustrian Sekuriti (Depositori Pusat) (SICDA) telah berlaku.

3. Oleh yg demikian, tiada keperluan lagi isu pemilikan saham oleh KPSPRM ini dipertikaikan. KPSPRM juga telah mengambil tindakan undang-undang terhadap pihak yang memfitnah beliau dan kes sedang dalam peringkat mahkamah dan sebarang ulasan kes ini juga akan menimbulkan *sub judice*.

4. Kerajaan tidak melindungi individu-individu tertentu atau mengambil tindakan terhadap orang-orang yang tertentu hanya kerana untuk memuaskan hati sesetengah pihak. Sesiapa sahaja bertanggungjawab akan dihadapkan ke muka pengadilan dan mahkamahlah yang akan menentukan sama ada orang itu bersalah atau tidak.

5. Sehubungan itu, semua pihak perlu menerima keputusan SC yang menjelaskan tidak ada kes terhadap KPSPRM berhubung akaun dagangan miliknya dan keputusan hasil siasatan SC perlu menjadi panduan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : JAWAB LISAN

**DARIPADA : PUAN HAJAH FUZIAH BINTI SALLEH
[KUANTAN]**

TARIKH : 7 MAC 2022 (ISNIN)

SOALAN

PUAN HAJAH FUZIAH BINTI SALLEH [KUANTAN] minta **MENTERI ALAM SEKITAR DAN AIR** menyatakan prosedur operasi standard untuk mengurus laporan-laporan EIA setelah projek berkenaan diluluskan, termasuk laporan EIA Jadual 1 dan maklumat tambahan untuk EIA Jadual 2 dan sama ada laporan-laporan ini boleh diakses oleh orang awam.

JAWAPAN

Tan Sri Yang Di-Pertua,

1. Semua pengurusan dokumen yang diterima adalah mengikut kehendak pekeliling yang telah ditetapkan. Laporan *Environmental Impact Assessment* (EIA) merupakan laporan teknikal yang disediakan dan hak milik terpelihara oleh pihak penggerak projek bagi tujuan mengenalpasti impak alam sekitar dan memperincikan langkah mitigasi yang akan dilaksanakan bagi sesuatu pembangunan.
2. Laporan EIA boleh dirujuk oleh orang awam semasa laporan tersebut dipamerkan sama ada secara atas talian atau secara fizikal di lokasi yang ditetapkan seperti di pejabat Jabatan Alam Sekitar (JAS), Pihak Berkuasa Tempatan, perpustakaan negeri, balai polis dan lain-lain, khususnya bagi aktiviti yang ditetapkan di bawah Jadual Kedua, Perintah Kualiti Alam Sekeliling (Aktiviti yang Ditetapkan)(Penilaian Kesan kepada Alam Sekeliling) 2015.
3. Manakala Laporan EIA yang telah diluluskan masih boleh dirujuk oleh orang awam di Perpustakaan JAS bagi tujuan pembelajaran dan penyelidikan. Sekiranya ada pihak yang berminat untuk mendapatkan terus Laporan EIA, boleh mendapatkannya terus daripada pihak yang menyediakan Laporan EIA iaitu Penggerak Projek.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS**

PERTANYAAN : LISAN

**DARIPADA : YB DATO' WIRA HAJI AMIRUDDIN BIN
HAJI HAMZAH [KUBANG PASU]**

TARIKH : 7 MAC 2022 (ISNIN)

SOALAN :

Minta **PERDANA MENTERI** menyatakan :-

- a) jumlah penerima bantuan khas pengurusan kematian COVID-19 yang telah diberikan oleh NADMA dan adakah NADMA bersedia untuk mempertimbangkan bantuan ini diberikan terus kepada waris tanpa perlu memohon; dan
- b) adakah NADMA bersedia mempertimbangkan bantuan ini kepada mereka yang meninggal akibat kesan "*long COVID-19*".

JAWAPAN

**DIJAWAB OLEH YB DATUK DR ABD LATIFF AHMAD
MENTERI DI JABATAN PERDANA MENTERI
(TUGAS-TUGAS KHAS)**

Tuan Yang di-Pertua,

1. Setakat 28 Februari 2022, Agensi Pengurusan Bencana Negara (NADMA) telah meluluskan sebanyak 17,867 permohonan yang layak dan lengkap dengan jumlah bayaran sebanyak RM89.335 juta.
2. NADMA tidak boleh mempertimbangkan pemberian bantuan kepada waris tanpa permohonan kerana pembayaran bantuan adalah melalui *Electronic Fund Transfer* (EFT) kepada akaun bank waris. Selain itu, lantikan atau pemilihan waris yang akan menerima bantuan tersebut bagi pihak, perlu dipersetujui oleh kalangan ahli keluarga terlebih dahulu bagi mengelakkan timbulnya sebarang isu di pihak Kerajaan.
3. Syarat utama bagi bantuan ini adalah sijil kematian yang dikemukakan hendaklah jelas tertulis "COVID-19" sebagai sebab kematian. NADMA tiada halangan untuk mempertimbangkan bantuan ini kepada mereka yang meninggal akibat kesan "*long COVID-19*" selama mana sijil kematian yang dikemukakan memenuhi syarat yang ditetapkan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : JAWAB LISAN

DARIPADA : PUAN NOORITA BINTI SUAL [TENOM]

TARIKH : 7 MAC 2022 (ISNIN)

SOALAN

PUAN NOORITA BINTI SUAL [TENOM] minta **MENTERI ALAM SEKITAR DAN AIR** menyatakan apakah perancangan dan usaha yang akan diambil oleh Kerajaan untuk membantu memperkasakan Jabatan Pengairan dan Saliran Malaysia, khususnya Pusat Ramalan Dan Amaran Banjir Negara (PRABN) memandangkan jabatan ini penting untuk memastikan negara kita dapat bersedia dan bertindak lebih awal sebelum berlakunya bencana alam seperti banjir.

JAWAPAN

Tan Sri Yang Di-Pertua,

Bagi memperkasakan PRABN, JPS Malaysia telah membuat permohonan pertambahan peruntukan sebanyak RM176 juta bagi penambahbaikan Program Ramalan dan Amaran Banjir Fasa 2 meliputi perkara-perkara berikut:

- i) menaiktaraf 516 stesen siren dan 155 stesen kamera web yang telah diluluskan di bawah Program Ramalan dan Amaran Banjir Fasa 2;
- ii) penambahan 361 unit stesen kamera web baru; dan
- iii) pelaksanaan aktiviti *Capacity Building* dan memberikan latihan kepada penduduk berkenaan siren amaran banjir melalui program kesedaran awam (CEPA).

Dalam pada itu juga JPS akan memohon 86 perjawatan tambahan bagi menyokong pelaksanaan PRAB Fasa 2 dan Fasa 3. Untuk makluman perjawatan sedia ada PRAB Fasa 1 adalah sebanyak 35 perjawatan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : JAWAB LISAN

**DARIPADA : DATIN PADUKA DR. TAN YEE KEW
[WANGSA MAJU]**

TARIKH : 7 MAC 2022 (ISNIN)

SOALAN

DATIN PADUKA DR. TAN YEE KEW [WANGSA MAJU] minta **MENTERI ALAM SEKITAR DAN AIR** menyatakan langkah dan perancangan jangka pendek, sederhana dan panjang oleh Kerajaan supaya bencana banjir tidak memberikan impak besar kepada negara dan rakyat.

JAWAPAN

Tan Sri Yang Di-Pertua,

1. KASA melalui agensi-agensi terlibat telah melaksanakan beberapa langkah dan perancangan jangka pendek bagi mengurangkan impak banjir seperti berikut:

- i. memastikan kesiapsiagaan infrastruktur tebatan banjir (pam pintu air dan genset) supaya dapat berfungsi pada tahap optimum ketika banjir berlaku;
- ii. menyelenggara, mendalamkan dan membersihkan saliran, sungai serta kolam takungan banjir bagi meningkatkan kapasiti aliran dan takungan air larian permukaan;
- iii. mempertingkatkan program penyelidikan dan pembangunan (R&D) berkaitan perubahan iklim khususnya dalam aspek adaptasi dan pengurangan risiko bencana (*Climate Change Adaptation (CCA) -Disaster Risk Reduction (DRR)*);

2. KASA juga telah mengambil langkah jangka sederhana bagi menebat kesan banjir seperti berikut:

- i. memperkasa tadbir urus adaptasi perubahan iklim sektor air melalui pembangunan Akta Adaptasi Sektor Air sebagai strategi jangka panjang dengan mengambil kira keperluan peningkatan tahap perlindungan infrastruktur saliran dan pantai negara. Di bawah akta ini, KASA akan mencadangkan penubuhan sebuah tabung khas/kumpulan wang amanah untuk peningkatan kapasiti adaptif sektor air dan kawasan pesisir melalui pembangunan dan penyelenggaraan infrastruktur yang mengambil kira faktor perubahan iklim;
- ii. penggunaan pendekatan *nature-based solution* seperti pembinaan denai sungai sebagai platform penglibatan masyarakat dalam aktiviti perlindungan, pembersihan dan pemuliharaan sungai;

- iii. meningkatkan kesedaran awam dengan pelaksanaan Public Outreach Programme (POP) dan program kesedaran alam sekitar melalui pendekatan *communication, education and public awareness (CEPA)* seperti latihan menghadapi banjir, atau *flood drills*, dengan izin. Pendekatan ini akan dilaksanakan di peringkat sekolah dan masyarakat melalui rukun tetangga untuk meningkatkan kesedaran rakyat menghadapi amaran banjir dan langkah yang perlu diambil jika berdepan ancaman ini; dan
- iv. memperkasa pelaksanaan pendekatan Pengurusan Lembangan Sungai Bersepadu (IRBM) dalam pengurusan lembangan sungai melalui empat (4) objektif utama iaitu:
 - a) memastikan air mencukupi;
 - b) memastikan air bersih;
 - c) mengurangkan risiko banjir; dan
 - d) melestarikan alam sekitar.

Melalui pembangunan pelan IRBM, cadangan perancangan dan pembangunan sumber air di dalam sesebuah lembangan mestilah dijadikan rujukan mandatori oleh pihak Kerajaan Negeri dan semua pihak berkepentingan. Dalam merancang pembangunan, kesan terhadap kelestarian alam sekitar perlu diberikan perhatian terutamanya sumber air yang sangat diperlukan oleh negara.

3. Bagi langkah penyelesaian jangka panjang pula, KASA mengambil pendekatan secara struktur dan bukan struktur seperti berikut:

(i) Pendekatan Secara Struktur

- (a) pembinaan terusan bagi mengatasi banjir genang;
- (b) meninggikan dan menaik taraf benteng/ ban parit;
- (c) menaik taraf sungai-sungai utama bagi meningkatkan kapasiti hidraulik sungai berdasarkan pendekatan *Make room for water*;

SOALAN NO : 71

- (d) pembinaan *levees*, benteng konkrit (*floodwall*) dan *mobile flood wall* bagi mengawal aliran air banjir di dalam laluan banjir (*floodway*);
- (e) melaksanakan kerja-kerja pembinaan infrastruktur kawalan di punca seperti kolam tadahan bagi mengurangkan impak jumlah air larian selepas pembangunan berdasarkan konsep *Building With Nature*;
- (f) menaik taraf sistem saliran dengan meningkatkan kapasiti air larian dan memastikan kecerunan sistem saliran yang bersesuaian seterusnya mengurangkan halangan aliran dengan membesarkan saiz dan mendalamkan kedalaman pembedung bagi mengelakkan berlakunya *bottleneck* dan aliran balik (*backflow*);
- (g) pemasangan pintu kawalan air pasang surut berserta pam di hilir (titik luahan akhir */final discharge*) bagi memastikan air laut tidak memasuki sistem saliran sedia ada untuk kawasan-kawasan yang berhampiran dengan persisiran pantai;
- (h) pembinaan *underground storage* untuk mengalirkan air sungai sewaktu waktu puncak sebelum dilepaskan semula di kawasan hiliran;
- (i) pemindahan penduduk di kawasan dataran banjir ke tempat yang lebih selamat dan kawasan tersebut diwartakan sebagai dataran banjir atau dijadikan pusat rekreasi; dan
- (j) Pembangunan baru dan pembangunan semula (*retrofitting*) bandar-bandar dan kawasan penempatan seperti *Sponge City* yang menekankan pembangunan berdaya tahan (*developing resilience*);

(ii) **Pendekatan Bukan Struktur**

- (a) melaksanakan Program *Public Outreach* dan Kempen Kesedaran Alam Sekitar di peringkat Pihak Berkuasa Tempatan (PBT) agar masyarakat berdisiplin terhadap kebersihan bandar demi mengelakkan longkang dan parit tersumbat;
- (b) penggunaan mandatori Manual Saliran Mesra Alam (MSMA) dan Pelan Induk Saliran Mesra Alam (PISMA) oleh Kerajaan Negeri dan PBT dalam kelulusan *Certificate of Compliance Completion* (CCC);
- (c) pemantauan pematuhan terhadap garis panduan MSMA di peringkat PBT untuk mengurangkan kesan banjir kilat melalui kawalan di punca;
- (d) penguatkuasaan penyediaan pelan pengawalan hakisan dan kelodak semasa kerja-kerja tanah, fasa pembinaan untuk mengurangkan hakisan tanah melalui PBT dan JAS. Ini bertujuan untuk mengelak pemendapan dan aliran lumpur ke dalam aliran sungai;
- (e) meningkatkan Keupayaan dan Pembangunan Sistem Komputer Utama Meteorologi (MIFS, CMSS dan eMET). Sistem yang dibangunkan akan diintegrasikan sepenuhnya dengan semua sistem sedia ada jabatan dan menghasilkan produk yang lebih interaktif dan dinamik dengan teknologi terkini GIS dan *Web Maps Services* - WMS;
- (f) mewujudkan pusat ramalan cuaca numerikal kebangsaan merangkumi pembangunan pusat komputer prestasi tinggi, pembangunan, operasi dan penyelidikan;
- (g) kesinambungan dan peningkatan infrastruktur sedia ada daripada 200TFLOPS kepada 5PFLOPS. Ini membolehkan perkhidmatan model dapat diteruskan

SOALAN NO : 71

dan dipertingkatkan kepada semua pemegang taruh. Peningkatan ini adalah berasaskan kepada:

- (1) mengoperasikan model global berskala semi-hemisfera daripada data-data model ECMWF, NCEP-GFS dan UKMO-UM;
 - (2) penghasilan model-model bercorak kebarangkalian;
 - (3) melaksanakan kaedah data asimilasi model secara meluas menggunakan data-data cerapan meteorologi semasa; dan
 - (4) memperkukuhkan penyampaian output model kepada pengguna melalui aplikasi-aplikasi berteknologi terkini menjurus kepada keperluan pengguna;
- (h) melahirkan lebih ramai SME dalam bidang model ramalan cuaca numerikal. Ini merangkumi permodelan ramalan ribut tropika, ramalan cuaca 1 hingga 14 hari, ramalan bermusim 1 hingga 6 bulan, unjuran perubahan iklim sehingga 100 tahun dan ramalan marin;
- (i) meningkatkan pembangunan modal insan bagi ramalan cuaca numerikal dan penyelidikan meteorologi di rantau tropika berteraskan kepada keragaman iklim dan cuaca ekstrem;
- (j) pelaksanaan pelan perancangan pembangunan dan zon guna-tanah yang lebih teratur;
- (k) pewartaan kawasan rizab sungai sebagai tanah kerajaan serta mengelakkan pembangunan kawasan perumahan dalam dataran banjir untuk mengurangkan risiko banjir;

- (l) penyelarasan dan pemerkasaan kerjasama antara Kerajaan Persekutuan, Kerajaan Negeri dan Kerajaan Tempatan dalam infrastruktur saliran sebagaimana dalam Perlembagaan Persekutuan; dan
- (m) pembangunan Akta Adaptasi Perubahan Iklim bagi meneliti keperluan meningkatkan tahap perlindungan infrastruktur saliran dan pantai negara susulan daripada faktor perubahan iklim. Akta ini juga mencadangkan penubuhan sebuah tabung khas/kumpulan wang amanah bagi pembinaan dan penyelenggaraan infrastruktur saliran dan pantai negara dengan mengambil kira faktor perubahan iklim.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : JAWAB LISAN

**DARIPADA : DATO' SERI DR. WAN AZIZAH
WAN ISMAIL [PANDAN]**

TARIKH : 7 MAC 2022 (ISNIN)

SOALAN

DATO' SERI DR. WAN AZIZAH WAN ISMAIL [PANDAN] minta **MENTERI ALAM SEKITAR DAN AIR** menyatakan penjelasan mengenai sistem ramalan awal banjir yang telah diberikan peruntukan untuk dibangunkan dalam Rancangan Malaysia Kesebelas yang lalu tetapi kelihatan tidak berfungsi semasa fenomena banjir yang berlaku baru-baru ini.

JAWAPAN

Tuan Yang Di-Pertua,

1. Kementerian Alam Sekitar dan Air melalui agensi pelaksana Jabatan Pengairan dan Saliran Malaysia (JPS) berperanan untuk membuat ramalan dan amaran banjir untuk seluruh negara melalui Program dan Amaran banjir Negara (PRAB) yang telah dimulakan pembangunan pada tahun 2015. Program ramalan banjir JPS berupaya untuk meramalkan 7 hari simulasi banjir dan mengeluarkan hebahan amaran banjir seawal 2 hari. Mengikut perancangan, program ramalan banjir ini akan dijalankan secara menyeluruh untuk seluruh negara dan melibatkan 41 lembangan sungai.

2. Pembangunan program ramalan ini terbahagi kepada 2 Fasa iaitu Fasa 1 dan Fasa 2, bermula pada tahun 2015 dan berakhir pada 2025. Program PRAB Fasa 1 melibatkan 3 lembangan sungai utama iaitu, Lembangan Sungai Kelantan, Sungai Terengganu dan Sungai Pahang telah mula dioperasikan mulai tahun 2017. Kini pembangunan PRAB Fasa 2 melibatkan 38 buah lembangan sedang dilaksanakan dan dijangka siap dan akan beroperasi sepenuhnya untuk seluruh negara pada tahun 2025.

3. Bagi operasi Monsun Timur Laut (MTL) 2021/2022, program PRAB telah berjaya membuat 8 kali hebahan dan amaran banjir di negeri Kelantan, Terengganu dan Pahang bagi memberi amaran banjir kepada penduduk di Kawasan yang terlibat. Sebanyak 2 hebahan dan amaran banjir di Lembangan Sungai Kelantan, 3 hebahan di lembangan sungai Terengganu dan 3 hebahan di lembangan sungai Pahang.

Sekian. Terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

DARIPADA : TUAN PANG HOK LIONG [LABIS]

TARIKH : 7 MAC 2022 (ISNIN)

SOALAN

Minta **PERDANA MENTERI** menyatakan dengan terperinci senarai, butiran, lokasi dan nilai tanah yang dihadiahkan kepada semua mantan Perdana Menteri.

JAWAPAN

**DIJAWAB OLEH YB DATUK DR. ABD LATIFF BIN AHMAD
MENTERI DI JABATAN PERDANA MENTERI (TUGAS-TUGAS KHAS)**

Tuan Yang Di Pertua,

1. Elaun dan Keistimewaan Mantan Perdana Menteri Malaysia adalah tertakluk kepada ketetapan kadar dan syarat di perenggan 21(1), Jadual Pertama, Akta Ahli Parlimen (Saraan) 1980 [Akta 237].
2. Berdasarkan rekod Jabatan Perdana Menteri, hanya YABhg. Tun Abdullah Ahmad Badawi sahaja yang pernah dikurniakan tanah oleh Kerajaan selaku mantan Perdana Menteri iaitu di Persiaran Tuanku Ja'far, Kuala Lumpur selepas kelulusan Jemaah Menteri pada 16 Jun 2009. Butiran tanah yang dikurniakan adalah seperti berikut:

Keluasan (kps)	155,290.94
Nilaian Jabatan Penilaian dan Pengurusan Harta (JPPH) (Semasa)/kps	RM492.37
Penilaian harta tanah oleh JPPH (Tanah)	RM76,460,000.00
Penilaian harta tanah oleh JPPH (Rumah)	RM7,240,000.00

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : TUAN HASSAN BIN ABDUL KARIM
[PASIR GUDANG]**

TARIKH : 7 MAC 2022 (ISNIN)

SOALAN

Minta **PERDANA MENTERI** menyatakan apakah Kerajaan boleh memberi bantuan kewangan kepada banyak pembinaan masjid-masjid baru di peringkat negeri yang diusahakan sendiri atas inisiatif rakyat termasuk di Parlimen Pasir Gudang.

JAWAPAN

**YB SENATOR TUAN HAJI IDRIS BIN HAJI AHMAD
MENTERI DI JABATAN PERDANA MENTERI
(HAL EHWAL AGAMA)**

Tuan Yang di-Pertua,

1. Untuk makluman Ahli Yang Berhormat peruntukan untuk pembinaan masjid-masjid baharu di seluruh negara adalah di bawah bidang kuasa negeri. Walau bagaimanapun Kerajaan sangat komited untuk turut membantu menyelaraskan, memberi sokongan padu dan mempermudah urusan rumah ibadat bagi orang Islam dalam aspek tadbir urus, pengimaran, pembangunan fizikal dan penyelenggaraan serta pendidikan kepada masyarakat Islam setempat.
2. Sehubungan dengan itu peruntukan ini boleh dipohon oleh mana-mana Jawatankuasa Kariah / Penduduk sesebuah kawasan untuk pembinaan masjid baharu melalui Pejabat Agama Islam Daerah yang akan dikemukakan kepada Unit Pembangunan, Majlis Agama Islam / Jabatan Agama Negeri untuk kelulusan termasuk peruntukan untuk penyelenggaraan atau pembaikan kecil yang boleh dipohon di bawah peruntukan Pembangunan Luar Bandar (PLB), Pejabat Daerah dan Tanah di setiap negeri
3. Selain itu, usaha-usaha yang telah dan sedang diambil tindakan oleh pihak Kerajaan bagi merealisasikan hasrat murni ini dapat dilihat melalui Program dan Pembangunan Projek Khas di bawah Unit Penyelarasan Pelaksanaan (ICU), Jabatan Perdana Menteri, di mana ia akan sentiasa dipantau dan dikemaskini dari semasa ke semasa.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : JAWAB LISAN

DARIPADA : TUAN GOBIND SINGH DEO [PUCHONG]

TARIKH : 7 MAC 2022 (ISNIN)

SOALAN

TUAN GOBIND SINGH DEO [PUCHONG] minta **MENTERI ALAM SEKITAR DAN AIR** menyatakan apakah tindakan untuk menyelesaikan masalah banjir di DUN Sri Serdang dan status naik taraf bagi Kolam Takungan Banjir memandangkan kawasan itu sering dilanda banjir setiap kali hujan lebat.

JAWAPAN

Tuan Yang Di-Pertua,

1. Kementerian Alam Sekitar dan Air (KASA) mengambil berat dan melahirkan rasa simpati akan masalah banjir yang berlaku di kawasan Dun Sri Serdang. Kerajaan Negeri Selangor melalui Jabatan Pengairan dan Saliran (JPS) Negeri Selangor sedang melaksanakan projek seperti berikut :-

- i. Kerja-kerja Membersihkan Kolam Dataran Banjir TNB dan Lain-lain Kerja Berkaitan di Taman Serdang Jaya, Seri Serdang dalam pelaksanaan berjumlah RM 199,650.00 dan dijangka siap pada Mei 2022;
- ii. Kerja-kerja Pengorekan Kolam Takungan Banjir Seri Serdang dan Lain-lain Kerja Berkaitan Berhampiran Taman Andalas,

Seri Serdang dalam peringkat penilaian dan dijangka dilaksanakan pada Mac 2022 yang dianggarkan berjumlah RM 500,000.00;

- iii. Kerja-kerja Pengorekan Kolam Takungan A dan Lain-lain Kerja Berkaitan Berhampiran Taman Universiti, Seri Serdang dalam peringkat penilaian dan dijangka dilaksanakan pada Mac 2022 yang dianggarkan berjumlah RM 500,000.00; dan
- iv. Kerja-kerja Pengorekan Kolam Takungan B dan Lain-lain Kerja Berkaitan Berhampiran Jabatan Pertanian Serdang, Seri Serdang dalam peringkat penilaian dan dijangka dilaksanakan pada Mac 2022 yang dianggarkan berjumlah RM 500,000.00.

2. Selain itu, KASA melalui Jabatan Pengairan dan Saliran Malaysia (JPS) juga telah melaksanakan Kajian Pelan Induk Saliran Mesra Alam Sri Kembangan dan Sungai Besi pada tahun 2010 yang merangkumi kawasan Dun Sri Serdang.

3. Kajian tersebut mengandungi cadangan Pelan Induk Saliran termasuklah cadangan infrastruktur saliran yang perlu dilaksanakan untuk menangani kejadian banjir kilat yang berlaku dan dijadikan sebagai panduan dalam merancang pembangunan sistem saliran masa hadapan. Di samping itu juga, kajian tersebut boleh dijadikan rujukan oleh pemaju-pemaju dalam merancang aras pembangunan yang sesuai bagi mengurangkan risiko banjir.

4. Projek RTB Sg Kuyoh merupakan salah inisiatif jabatan untuk menangani masalah isu banjir yang berlaku di sekitar kawasan tersebut dan peruntukan sebanyak RM300 juta di bawah Rolling Plan ke-4 RMKe-11 bermula tahun 2020. Projek dijangka tender pada tahun 2023.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS**

PERTANYAAN : LISAN

DARIPADA : YB TUAN CHONG CHIENG JEN (STAMPIN)

TARIKH : 07 MAC 2022 (ISNIN)

SOALAN

TUAN CHONG CHIENG JEN [STAMPIN] minta **MENTERI KANAN KERJA RAYA** menyatakan adakah sebabnya Kerajaan Persekutuan tidak menanggung keseluruhan atau sesetengah kos pembinaan jambatan Batang Lupar yang merupakan jambatan yang terpanjang di Sarawak.

JAWAPAN

Tuan Yang Di-Pertua,

Untuk makluman Ahli Yang Berhormat, cadangan pelaksanaan Jambatan Batang Lupar telah dibatalkan oleh Kerajaan Persekutuan kerana ia terletak di bawah status jalan negeri. Kementerian Kerja Raya mengambil maklum bahawa Kerajaan Negeri Sarawak akan meneruskan pelaksanaan Jambatan Batang Lupar dan dua (2) projek pembinaan jambatan lain iaitu Jambatan Batang Igan dan Jambatan Batang Rambungan sebagai sebahagian daripada skop Program Naik Taraf Laluan Pesisir Pantai / *State Coastal Road Program*.

Untuk makluman Ahli Yang Berhormat juga, peruntukan asal bagi ketiga-tiga projek berkenaan telah dipindahkan kepada projek cadangan membina Jalan Perhubungan Sarawak-Sabah atau *Sarawak-Sabah Link Road* (SSLR) yang merupakan jalan baharu. Anggaran kos bagi Fasa I SSLR ialah RM 1.2 bilion di mana RM900 juta diperolehi menerusi peruntukan asal untuk ketiga-tiga jambatan di atas.

Sekian.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS**

PERTANYAAN : JAWAB LISAN

DARIPADA : TUAN NGA KOR MING [TELUK INTAN]

TARIKH : 07 MAC 2022 (ISNIN)

SOALAN

TUAN NGA KOR MING [TELUK INTAN] minta **PERDANA MENTERI** menyatakan secara terperinci :-

- (a) demi menjaga integriti dan kewibawaan Jabatan Peguam Negara, apakah langkah-langkah yang diambil oleh Kerajaan untuk memastikan kejadian Jabatan Peguam Negara sering menarik balik tuduhan kes rasuah terhadap individu atau orang kenamaan dari parti-parti pemerintah tidak berulang lagi; dan
- (b) nyatakan satu persatu nilai aset dan liabiliti yang telah diisytihar oleh anggota Kabinet kepada Parlimen.

JAWAPAN

**YB DATO SRI DR. HAJI WAN JUNAIDI BIN TUANKU JAAFAR,
MENTERI DI JABATAN PERDANA MENTERI
(PARLIMEN DAN UNDANG-UNDANG)**

Tuan Yang di-Pertua,

Jabatan Peguam Negara (AGC) merupakan satu organisasi yang bebas dan tidak berpihak khususnya dalam menentukan sama ada satu prosiding jenayah wajar dimulakan atau dihentikan. Ini selaras dengan Perkara 145(3) Perlembagaan Persekutuan dan Kanun Tatacara Jenayah [Akta 593] yang melibatkan kuasa Pendakwa Raya. Dalam menentukan perkara ini, AGC mementingkan keadilan dan ketelusan. Setiap keputusan yang dibuat oleh AGC adalah berlandaskan fakta dan keterangan serta hasil siasatan yang dikemukakan oleh agensi penguatkuasaan.

Dalam konteks ini, keputusan untuk memulakan prosiding jenayah adalah bergantung sepenuhnya kepada hasil siasatan yang dikemukakan untuk pertimbangan AGC. Dalam membuat keputusan untuk mendakwa atau tidak, AGC berpandukan kepada prinsip terdapatnya seratus peratus (100%) keterangan yang jelas untuk membawa pertuduhan ke Mahkamah. AGC perlu terlebih dahulu berpuas hati bahawa keterangan yang ada adalah jelas dan yang boleh dipercayai (credible) serta lengkap sebelum sesuatu kes itu dibuat pertuduhan di Mahkamah. Adalah tidak wajar untuk AGC membawa kes berdasarkan keterangan yang tidak cukup lengkap dengan kesukaran untuk membuktikan intipati kesalahan dalam pertuduhan tanpa keraguan yang munasabah (beyond reasonable doubt), hanya dengan hasrat untuk menyerahkan kepada Mahkamah bagi memutuskan kes-kes yang sedemikian.

Namun, selepas pertuduhan ataupun setelah kes berjalan di Mahkamah, terdapat keadaan luar jangka yang mungkin berlaku seperti kemunculan keterangan baharu, terdapat aspek siasatan yang tidak disiasat atau tidak disiasat dengan rapi oleh pihak penguatkuasaan, kematian saksi penting atau saksi pendakwaan

didapati bercakap bohong. Keadaan ini menyebabkan AGC terpaksa membuat penilaian semula terhadap keputusan menuduh yang telah dibuat terdahulu. Bagi mengelakkan daripada perkara ini berulang, setiap agensi penguatkuasaan hendaklah memastikan setiap siasatan dibuat secara menyeluruh, lengkap dan terperinci supaya tidak ada keadaan di mana ada kelemahan dalam siasatan dan aspek siasatan yang tidak dibuat secara rapi sebelum dikemukakan kepada AGC untuk keputusan dan mengelakkan tindakan di mana pertuduhan perlu ditarik balik.

Tuan Yang di-Pertua,

Untuk makluman Yang Berhormat, berdasarkan Kod Etika Bagi Anggota Pentadbiran Dan Ahli Parlimen, paparan butiran perisytiharan harta akan dipaparkan di portal, selama tempoh 3 bulan dari tarikh penerimaan dokumen perisytiharan harta oleh SPRM. Maklumat pengisytiharan anggota Kabinet yang telah mengisytiharkan harta sebelum ini telah dipapar selama 3 bulan semasa awal pelantikan pada tahun 2020 yang lalu. Manakala, Anggota Kabinet baharu yang telah mengisytiharkan harta juga telah dipaparkan selepas pengisytiharan diselesaikan. Butiran perisytiharan harta yang dipaparkan terdiri daripada jumlah pendapatan bulanan dan jumlah aset. Paparan perisytiharan harta anggota pentadbiran boleh di akses secara atas talian di **Portal Perisytiharan Harta**.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS**

PERTANYAAN : LISAN

**DARIPADA : YB TUAN FONG KUI LUN
[BUKIT BINTANG]**

TARIKH : 7 MAC 2022 (ISNIN)

SOALAN

Minta **PERDANA MENTERI** menyatakan usaha untuk memperkasakan Majlis Pengurusan Bencana Negara (NADMA) berikutan kelemahan yang dihadapi semasa menguruskan bencana negara seperti hujan ribut dan banjir yang melanda baru-baru ini.

JAWAPAN

**DIJAWAB OLEH YB DATUK DR ABD LATIFF AHMAD
MENTERI DI JABATAN PERDANA MENTERI
(TUGAS-TUGAS KHAS)**

Tuan Yang di-Pertua,

1. Kerajaan sentiasa cakna dengan keperluan menjamin keselamatan dan kebajikan rakyat termasuk dalam aspek pengurusan bencana. Kerajaan sentiasa berusaha untuk memperbaiki apa-apa kelemahan di dalam menguruskan bencana berdasarkan *lessons learned and past experience* setiap kali berlakunya bencana
2. Antara kelemahan yang dikenal pasti berikutan kejadian banjir sewaktu Monsun Timur Laut 2021/2022 yang lepas adalah isu *chain of command* di dalam pelaksanaan mekanisme tindak balas bencana. Struktur organisasi Agensi Pengurusan Bencana Negara (NADMA) yang kecil dan hanya beroperasi di peringkat pusat telah menyukarkan koordinasi dan penyampaian maklumat dua hala secara terus dengan agensi-agensi di lapangan. Struktur organisasi NADMA hanya mempunyai 83 perjawatan pelbagai gred pengurusan dan profesional serta kumpulan sokongan dan tidak mempunyai kakitangan di peringkat negeri dan daerah.
3. Keupayaan NADMA juga terbatas untuk menyelaras tindakan pengurusan bencana di peringkat setempat yang melibatkan pelbagai pihak meliputi komuniti, badan-badan bukan kerajaan, kerajaan tempatan, pihak swasta dan sebagainya. Ini termasuklah usaha dalam pengurangan risiko bencana, kesiapsiagaan, dan pemerkasaan komuniti berkaitan kesedaran ancaman bahaya bencana.
4. Dalam hal ini, Jemaah Menteri pada 22 Disember 2021 telah memutuskan supaya struktur NADMA diteliti semula untuk diperkukuhkan selaras dengan peranannya sebagai peneraju pengurusan bencana negara. YAB Perdana Menteri turut menekankan keperluan untuk mewujudkan NADMA di peringkat negeri dan daerah semasa ucapannya dalam Mesyuarat Khas Penggal Keempat,

Parlimen Ke-14 Dewan Rakyat pada 20 Januari 2022. NADMA telah memulakan proses penstrukturan semula organisasi bagi meningkatkan keberkesanan pelaksanaan tanggungjawab pengurusan bencana.

5. Selain itu, bagi memastikan pengurusan bencana negara pada masa akan datang dapat berjalan dengan baik dan mengatasi kelemahan-kelemahan yang dikenal pasti, Mesyuarat Jawatankuasa Pengurusan Bencana Pusat yang dipengerusikan oleh YAB Perdana Menteri secara dalam talian pada 3 Februari 2022 telah bersetuju dengan lapan langkah strategik (jangka masa pendek, sederhana dan panjang) penambahbaikan pengurusan bencana negara yang telah dibentangkan oleh NADMA iaitu:

- (a) Pemerkasaan dasar, perundangan dan mekanisme berkaitan pengurusan bencana dan pengurangan risiko bencana (DRR);
- (b) Penekanan terhadap inisiatif DRR
- (c) Penyediaan dana untuk pengurusan bencana dan DRR;
- (d) Pengukuhan mekanisme koordinasi dan kompetensi *stakeholders* pengurusan bencana;
- (e) Penambahbaikan sistem dan penyampaian maklumat di dalam pengurusan bencana dan DRR;
- (f) Pemerkasaan dasar dan mekanisme koordinasi bantuan NGO dan sukarelawan;
- (g) Peningkatan kemahiran di dalam komunikasi krisis dan komunikasi strategik; dan
- (h) Peningkatan kapasiti komuniti setempat dan tumpuan terhadap *localization* di dalam pengurusan bencana dan DRR.

6. Pewujudan repositori daftar risiko bencana negara (National Risk Register) juga akan membantu mempertingkatkan perluasan dasar DRR melalui pembuatan keputusan berdasarkan risiko dan maklumat sejarah bencana di peringkat daerah dan negeri.
7. Kementerian dan Agensi juga disarankan agar dapat menetapkan supaya sebanyak lima peratus daripada perbelanjaan mengurus dan pembangunan diperuntukkan bagi tujuan pengurusan bencana pada masa akan datang. Ini penting bagi persiapan perbelanjaan untuk tujuan kesiapsiagaan, tindak balas, pemulihan awal dan pasca bencana serta pencegahan dan mitigasi risiko bencana.
8. Mesyuarat JPBP juga bersetuju dengan penekanan terhadap konsep “whole of society approach” yang perlu diterjemahkan dalam dasar, pengoperasian dan latihan amal bencana dengan penglibatan bersama agensi-agensi Kerajaan, NGO, dan komuniti. Pada masa yang sama, pemerksaan kapasiti komuniti setempat akan dipertingkatkan melalui ketua komuniti yang akan bertindak sebagai *initial responder*.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS**

PERTANYAAN : LISAN

DARIPADA : DR. AZMAN BIN ISMAIL [KUALA KEDAH]

TARIKH : 7 MAC 2022 (ISNIN)

SOALAN

Minta **PERDANA MENTERI** menyatakan sebab-sebab mengapa Malaysia tidak mengisytiharkan bermulanya situasi endemik COVID-19 di Malaysia pada waktu ini sedangkan varian yang dominan ialah Omicron.

JAWAPAN

**DIJAWAB OLEH YB DATUK DR. ABD LATIFF BIN AHMAD,
MENTERI DI JABATAN PERDANA MENTERI (TUGAS-TUGAS KHAS)**

Tuan Yang Dipertua,

1. Pengisytiharan fasa 'Peralihan ke Endemik' memerlukan Kerajaan untuk melaksanakan proses ketekunan wajar, *due diligence* (dengan izin) secara teliti, berhati-hati dan tidak tergesa-gesa. Fasa ini merupakan fasa transisi atau peralihan sebagai persediaan untuk kita melangkah ke fasa endemik sepenuhnya.
2. Perancangan berkaitan fasa peralihan negara ke endemik ini telahpun dibangunkan oleh pihak Kerajaan. Kerajaan perlu mempertimbangkan pelbagai faktor integral termasuklah penilaian risiko semasa jangkitan COVID-19 dalam negara oleh pihak Kementerian Kesihatan Malaysia (KKM). Kerajaan turut telah menetapkan 7 tonggak yang harus dipenuhi bersama di Fasa 'Peralihan ke Endemik' ini. Antaranya ialah, untuk segera melakukan ujian pengesanan COVID-19 sekiranya bergejala dan jadikan ujian pengesanan COVID-19 sebagai rutin dan membuat pelaporan dalam MySejahtera.
3. Tonggak ketujuh, iaitu Duta-Duta Pemerkasaan Komuniti juga penting bagi memastikan masyarakat menormalisasikan dengan amalan, langkah-langkah keselamatan termasuklah setiap prosedur operasi standard (SOP) yang ditetapkan Kerajaan dalam fasa tersebut.
4. Kerajaan turut menyedari kepentingan untuk merencanakan kembali ekonomi negara terutamanya dalam sektor perniagaan dan pelancongan. Justeru, Kerajaan sedang menyediakan dan memperhalusi SOP khusus bagi pembukaan sempadan negara secara selamat atau "*Reopening Safely*" yang turut merangkumi protokol pra pelepasan. Hasrat Kerajaan ini juga selari dengan titah Baginda Yang di-Pertuan Agong agar peralihan ini dibuat dengan penuh hemah.
5. Ingin saya tegaskan bahawa sebaik sahaja Kerajaan mengumumkan Fasa 'Peralihan ke Endemik', usaha untuk melindungi

diri daripada virus ini akan lebih bergantung kepada iltizam dan disiplin sendiri (*self discipline*) kita semua. Kita tidak boleh berasa selesa dan bersikap sambil lewa. Kita perlu sentiasa mematuhi dan mengamalkan SOP yang ditetapkan Kerajaan bagi membantu mencegah penularan dan kebolehjangkitan apa juga varian berkaitan COVID-19 termasuklah Omicron. Tindakan tegas akan sentiasa dilaksanakan oleh Kerajaan dalam pematuhan SOP dalam kalangan ahli masyarakat bagi memastikan penularan jangkitan COVID-19 dapat dibendung.

6. Justeru, pengisytiharan fasa peralihan ke endemik ini perlu dilakukan dengan berhati – hati selepas Kerajaan melaksanakan proses ketekunan wajar selaras dengan visi dan matlamat Keluarga Malaysia demi kebaikan bersama.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN

**DARIPADA : YB TUAN RAMKARPAL SINGH A/L KARPAL SINGH
[BUKIT GELUGOR]**

TARIKH : 7 MAC 2022 (ISNIN)

SOALAN

TUAN RAMKARPAL SINGH A/L KARPAL SINGH [BUKIT GELUGOR] minta **PERDANA MENTERI** menyatakan berkenaan bilangan Timbalan Pendakwa Raya daripada Jabatan Peguam Negara yang telah dilantik sebagai Pesuruhjaya Kehakiman dan Hakim Mahkamah Tinggi setakat bulan Februari, 2022 dan berapakah sabitan (conviction) yang telah direkodkan oleh Pesuruhjaya Kehakiman dan Hakim Mahkamah Tinggi tersebut.

JAWAPAN

**YB DATO SRI DR. HAJI WAN JUNAIDI BIN TUANKU JAAFAR,
MENTERI DI JABATAN PERDANA MENTERI
(PARLIMEN DAN UNDANG-UNDANG)**

Tuan Yang di-Pertua,

Untuk makluman Ahli Yang Berhormat, bilangan Hakim Mahkamah Tinggi dan Pesuruhjaya Kehakiman pada masa ini yang pernah berkhidmat sebagai Timbalan Pendakwa Raya daripada Jabatan Peguam Negara adalah seperti berikut:

Hakim	Bilangan
Hakim Mahkamah Tinggi	20
Pesuruhjaya Kehakiman	13

Jumlah sabitan yang telah direkodkan oleh Hakim Mahkamah Tinggi dan Pesuruhjaya Kehakiman tersebut mulai tahun 2020 hingga Februari 2022 adalah seperti berikut:

HAKIM MAHKAMAH TINGGI:

Bil.	Hakim Mahkamah Tinggi	Jumlah Sabitan
1.	YA Dato' Indera Haji Abd. Halim bin Aman	37
2.	YA Dato' Haji Azman bin Abdullah	13
3.	YA Dato' Akhtar bin Tahir (Mendengar kes-kes sivil dari tahun 2020 hingga kini)	0
4.	YA Dato' Mohd Zaki bin Abdul Wahab (Mendengar kes sivil dari tahun 2020 hingga kini)	0
5.	YA Dato' Azmi bin Ariffin (Mendengar kes sivil dari tahun 2020 hingga kini)	0
6.	YA Datuk Noorin binti Badaruddin (Mendengar kes sivil bermula 01.04.2021 hingga kini)	2
7.	YA Tuan Azhahari Kamal bin Ramli	5
8.	YA Dato' Indera Haji Ab. Karim bin Haji Ab. Rahman	17
9.	YA Datuk Wong Kian Kheong (Mendengar kes sivil dari tahun 2020 hingga kini)	0
10.	YA Dato' Dr. Choo Kah Sing (Mendengar kes sivil dari tahun 2020 hingga kini)	0
11.	YA Dato' Ahmad bin Bache (Mendengar kes-kes sivil bermula dari tahun 2020 hingga kini)	0
12.	YA Dato' Ahmad Kamal bin Md. Shahid	1
13.	YA Dato' Roslan bin Haji Abu Bakar	16
14.	YA Dato' Abd. Wahab bin Mohamed	28
15.	YA Dato' Hassan bin Abdul Ghani	30

Bil.	Hakim Mahkamah Tinggi	Jumlah Sabitan
16.	YA Dato' Muhammad Jamil bin Hussin	13
17.	YA Dato' Sri Tun Abd Majid bin Dato' Haji Tun Hamzah (Mendengar kes-kes sivil dari tahun 2020 hingga kini)	0
18.	YA Datuk Anselm Charles Fernandis	10
19.	YA Dato' Mohd Radzi bin Harun	3
20.	YA Datuk Meor Hashimi bin Abdul Hamid	26

PESURUHJAYA KEHAKIMAN:

Bil.	Pesuruhjaya Kehakiman	Jumlah Sabitan
1.	YA Datuk Duncan bin Sikodol	17
2.	YA Datuk Haji Aslam bin Zainuddin	16
3.	YA Dato' Azhar bin Abdul Hamid	7
4.	YA Puan Nurulhuda Nur'aini binti Mohamad Nor	17
5.	YA Tuan Hasbullah bin Adam	1
6.	YA Puan Julia binti Ibrahim	5
7.	YA Tuan Mohamad Abazafree bin Mohd Abbas	17
8.	YA Tuan Azizan bin Md. Arshad (Dilantik pada 04.02.2022)	0
9.	YA Puan Noor Ruwena binti Md. Nurdin (Dilantik pada 04.02.2022)	0
10.	YA Puan Jamhirah binti Ali (Dilantik pada 04.02.2022)	0
11.	YA Puan Rozi binti Bainon (Dilantik pada 04.02.2022)	0
12.	YA Tuan Noor Hisham bin Ismail (Dilantik pada 04.02.2022)	0
13.	YA Puan Roz Mawar binti Rozain (Dilantik pada 04.02.2022)	0

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS**

PERTANYAAN : LISAN

**DARIPADA : YB TUAN LOKE SIEW FOOK
[SEREMBAN]**

TARIKH : 7 MAC 2022 (ISNIN)

SOALAN :

Minta **PERDANA MENTERI** menyatakan tindakan dan langkah Kerajaan dalam menangani kesan pasca banjir besar Disember lalu dan memastikan negara lebih bersedia menghadapi sebarang bencana pada masa hadapan.

JAWAPAN

**DIJAWAB OLEH YB DATUK DR ABD LATIFF AHMAD
MENTERI DI JABATAN PERDANA MENTERI
(TUGAS-TUGAS KHAS)**

Tuan Yang di-Pertua,

1. Pada 29 Disember 2021, Kerajaan telah mengumumkan beberapa bantuan dan kemudahan di bawah inisiatif Bantuan Keluarga Malaysia dengan nilai keseluruhan sebanyak RM1.4 bilion yang diberikan terus kepada mangsa yang terkesan. Pengumuman ini menzahirkan keprihatinan Kerajaan Persekutuan terhadap mangsa yang terkesan berikutan bencana banjir di dalam tempoh Monsun Timur Laut (MTL) 2021/2022. Selain daripada jumlah ini, Kerajaan juga telah menyediakan peruntukan bagi pembaikan infrastruktur, kerosakan dan sebagainya yang jauh melebihi nilai tersebut
2. Bantuan banjir kepada Keluarga Malaysia menggunakan peruntukan Kumpulan Wang Amanah Bantuan Bencana Negara (KWABBN) antara lain adalah seperti berikut:
 - (i) Bantuan Wang Ihsan sebanyak RM1,000 kepada setiap Ketua Isi Rumah (KIR) yang terjejas dengan banjir sama ada yang berpindah atau tidak berpindah ke pusat pemindahan sementara (PPS);
 - (ii) Bantuan Ihsan Pengurusan Kematian sebanyak RM10,000 kepada waris mangsa yang meninggal dunia;
 - (iii) Bantuan Barangan Keperluan Asas (BBKA) sebanyak RM2,500 kepada setiap KIR yang rumahnya dinaiki air; dan
 - (iv) Bantuan Pembaikan Rumah dengan Nilai Maksimum RM5,000.

3. Lain-lain bantuan yang dihulurkan melalui Kementerian-Kementerian berkaitan adalah seperti berikut:

- (i) Rebat RM500 pembelian peralatan elektrik yang ditebus semasa pembelian di kedai dan pasar raya berdaftar atau platform e-dagang yang diiktiraf Kementerian Tenaga dan Sumber Asli;
- (ii) Bantuan Automotif Keluarga Malaysia yang meliputi diskaun daripada syarikat automotif dan juga baucar diskaun RM1,000 daripada Kerajaan sama ada untuk pembaikan atau penggantian kenderaan persendirian yang rosak atau musnah akibat banjir;
- (iii) Pembaikan rumah yang mengalami kerosakan serius sehingga RM15,000 manakala bagi rumah yang musnah dan tidak boleh diduduki, Kerajaan akan membantu sehingga kos RM56,000 setiap unit rumah dibina baharu;
- (iv) Bagi pesawah yang mengalami kemusnahan tanaman padi, suntikan bantuan tambahan RM20 juta kepada Tabung Bencana Tanaman Padi (TBTP) untuk pengusaha yang terjejas akibat banjir. Sehingga RM1,800 bagi setiap hektar dengan had maksimum 3 hektar diberikan kepada pesawah yang layak;
- (v) Bagi petani, penternak dan peladang agromakanan yang terjejas, suntikan bantuan tambahan RM20 juta disediakan bagi Tabung Bencana Tanaman Padi (TBTP). Sehingga RM1,800 bagi setiap hektar dengan had maksimum 3 hektar diberikan kepada pesawah yang layak; dan
- (vi) Bantuan berbentuk geran RM3,000 melalui TEKUN Nasional yang diberikan kepada peniaga informal dan mikro yang mana premis perniagaan mereka terjejas akibat banjir pada

Disember 2021 dan Januari 2022 bagi memulihkan perniagaan dan beroperasi semula.

4. Bagi memastikan Kerajaan lebih bersedia untuk menghadapi sebarang bencana pada masa hadapan, Jemaah Menteri pada 22 Disember 2021 telah memutuskan supaya struktur NADMA diteliti semula untuk diperkukuhkan selaras dengan peranannya sebagai peneraju pengurusan bencana negara. Keperluan untuk NADMA diwujudkan di negeri dan daerah sekali lagi diulangi oleh YAB Perdana Menteri dalam Mesyuarat Khas Penggal Keempat, Parlimen Ke-14 Dewan Rakyat pada 20 Januari 2022.

5. Selain itu, bagi memastikan pengurusan bencana negara pada masa akan datang dapat berjalan dengan baik dan mengatasi kelemahan-kelemahan yang dikenal pasti, Mesyuarat Jawatankuasa Pengurusan Bencana Pusat yang dipengerusikan oleh YAB Perdana Menteri secara talian pada 3 Februari 2022 telah bersetuju dengan lapan langkah strategik (jangka masa pendek, sederhana dan panjang) penambahbaikan pengurusan bencana negara yang telah dibentangkan oleh Agensi Pengurusan Bencana Negara (NADMA) iaitu:

- (i) Pemerkasaan dasar, perundangan dan mekanisme berkaitan pengurusan bencana dan pengurangan risiko bencana (DRR);
- (ii) Penekanan terhadap inisiatif DRR;
- (iii) Penyediaan dana untuk pengurusan bencana dan DRR;
- (iv) Pengukuhan mekanisme koordinasi dan kompetensi *stakeholders* pengurusan bencana;
- (v) Penambahbaikan sistem dan penyampaian maklumat di dalam pengurusan bencana dan DRR;
- (vi) Pemerkasaan dasar dan mekanisme koordinasi bantuan NGO dan sukarelawan;

(vii) Peningkatan kemahiran di dalam komunikasi krisis dan komunikasi strategik; dan

(viii) Peningkatan kapasiti komuniti setempat dan tumpuan terhadap *localization* di dalam pengurusan bencana dan DRR.

6. Pewujudan repositori daftar risiko bencana negara (*National Risk Register*) juga akan membantu mempertingkatkan perluasan dasar DRR melalui pembuatan keputusan berdasarkan risiko dan maklumat sejarah bencana di peringkat daerah dan negeri.

7. Kementerian dan Agensi juga disarankan untuk membuat penetapan sebanyak lima peratus daripada perbelanjaan mengurus dan pembangunan bagi tujuan pengurusan bencana pada masa akan datang. Ini penting bagi persiapan perbelanjaan untuk tujuan kesiapsiagaan, tindak balas, pemulihan awal dan pasca bencana serta pencegahan dan mitigasi risiko bencana.

8. Mesyuarat JPBP juga bersetuju dengan penekanan terhadap konsep “whole of society approach” yang perlu diterjemahkan dalam dasar, pengoperasian dan latihan amal bencana dengan penglibatan bersama agensi-agensi Kerajaan, NGO, dan komuniti.

9. Pada masa yang sama, pemerkasaan kapasiti komuniti setempat akan dipertingkatkan melalui ketua komuniti yang akan bertindak sebagai *initial responder*.

10. Selain itu, Kerajaan melalui Kementerian Alam Sekitar dan Air (KASA) telah merangka cadangan penyelesaian menangani bencana banjir meliputi projek tebatan banjir, peningkatan keupayaan dan pembangunan serta naik taraf sistem amaran awal yang berkaitan. Keutamaan pelaksanaan akan diberikan kepada:

- (i) penyelesaian jangka pendek yang bersifat *low cost high impact* seperti penyelenggaraan saliran, mendalamkan sungai, meninggikan benteng sungai dan juga penggantian struktur jambatan lama yang mengganggu aliran air sungai bagi mengurangkan impak banjir sementara penyelesaian jangka panjang diambil;

- (ii) langkah-langkah pencegahan dan DRR yang tidak melibatkan peruntukan kewangan yang besar seperti aktiviti pembalakan dan perancangan pembangunan di daerah-daerah (seperti pembukaan tanah di kawasan tadahan air, pembangunan di rizab sungai, pembinaan lebuh raya, dan jajaran sungai yang diubah); dan
- (iii) negeri-negeri dan daerah-daerah yang berisiko tinggi menghadapi banjir saban tahun.

11. Semua perancangan ini akan diperhalusi dari semasa ke semasa oleh pihak Kerajaan. Selaras dengan matlamat pengurusan bencana adalah tanggungjawab bersama, Kerajaan Persekutuan, Kerajaan Negeri, Pihak Berkuasa Tempatan, komuniti, NGO dan pelbagai pihak yang lain hendaklah berganding bahu bagi memastikan pelaksanaannya kelak adalah menyeluruh.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS**

PERTANYAAN : LISAN

**DARIPADA : TUAN MUHAMMAD BAKHTIAR BIN
WAN CHIK [BALIK PULAU]**

TARIKH : 7 MAC 2022 (ISNIN)

SOALAN

Minta **PERDANA MENTERI** menyatakan :-

- (a) sama ada saranan Majlis Pemulihan Negara bagi pembukaan sempadan negara kepada warga asing telah melalui proses analisis kos-manfaat berdasarkan senario (scenario-based cost-benefit analysis); dan
- (b) kos-manfaat yang dijangkakan dalam senario terbaik, senario agak buruk dan senario terburuk.

JAWAPAN

**YB DATUK DR. ABD LATIFF BIN AHMAD,
MENTERI DI JABATAN PERDANA MENTERI (TUGAS-TUGAS KHAS)**

Tuan Yang Dipertua,

1. Kerajaan mengambil maklum akan cadangan pembukaan sempadan negara bermula 1 Mac 2020 seperti disyorkan oleh Majlis Pemulihan Negara (MPN) pada 8 Februari 2022 yang lalu.

2. Mesyuarat Majlis Pemulihan Negara (MPN) pada 8 Februari 2022 telah membincangkan cadangan pembukaan sempadan negara seperti yang dibentangkan oleh Ketua Pengarah Imigresen. Keputusan mesyuarat telah mengambil kira semua aspek termasuk pandangan ahli mesyuarat yang turut dihadiri oleh Kementerian Kesihatan Malaysia serta Menteri-menteri Kabinet yang lain. Keputusan yang disyorkan oleh MPN tersebut perlu terlebih dahulu dikemukakan kepada Jemaah Menteri untuk diputuskan oleh Kerajaan.
3. Dalam hal ini, keputusan Kerajaan untuk beralih ke Fasa Endemik dalam usaha untuk menamatkan pandemik COVID-19 di Malaysia perlu dibuat secara berhati-hati dan penuh hemah. Pertimbangan sewajarnya perlulah diberikan dengan mengambil kira maklum balas dan pandangan yang merentas pelbagai bidang kuasa Kementerian dan Agensi Kerajaan.
4. Selain itu juga, peralihan ini perlu dilaksanakan berdasarkan penilaian risiko semasa jangkitan COVID-19 dalam negara oleh pihak Kementerian Kesihatan Malaysia (KKM) mengambil kira maklumat situasi semasa penularan COVID-19 termasuklah kesan pasca-banjir dan peningkatan kes positif melibatkan Varian Omicron di kalangan pengembara dari luar negara pada pertengahan bulan Januari 2022.
5. Pembukaan semula sempadan negara merupakan satu keperluan dan bersandarkan tiga perkara asas iaitu:
 - (i) memberi keselesaan kepada pengembara dan tidak merumitkan perjalanan mereka;
 - (ii) berpandukan sains dan fakta terkini berkaitan COVID-19; dan
 - (iii) membandingkan keperluan pembukaan sempadan dengan negara-negara lain.
6. Kerajaan akan membuat pengumuman mengenai tarikh pembukaan sempadan negara setelah ianya dibentangkan dalam Jawatankuasa Khas Pengurusan Pandemik dan Mesyuarat Jemaah Menteri.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS**

PERTANYAAN : JAWAB LISAN

**DARIPADA : TUAN SANISVARA NETHAJI RAYER A/L
RAJAJI [JELUTONG]**

TARIKH : 07 MAC 2022 (ISNIN)

SOALAN

TUAN SANISVARA NETHAJI RAYER A/L RAJAJI [JELUTONG]
minta **PERDANA MENTERI** menyatakan apakah hasil siasatan
Suruhanjaya Pencegahan Rasuah berkenaan isu penyalahgunaan
dana MITRA (Malaysian Indian Transformation Unit).

JAWAPAN

**YB DATO SRI DR. HAJI WAN JUNAIDI BIN TUANKU JAAFAR,
MENTERI DI JABATAN PERDANA MENTERI
(PARLIMEN DAN UNDANG-UNDANG)**

Tuan Yang di-Pertua,

Untuk makluman Yang Berhormat, Suruhanjaya Pencegahan
Rasuah Malaysia (SPRM) telah membuka beberapa Kertas Siasatan
(KS) berkenaan isu penyalahgunaan dana MITRA. Dua (2) daripada
KS telah di tuduh di mahkamah pada 18.02.2022.

Masih terdapat beberapa KS pertimbangan Timbalan Pendakwa
Raya (TPR) dan terdapat KS yang masih dalam tindakan. KS dibuka
bagi setiap individu/ entiti yang disyaki menyalahgunakan dana MITRA
dengan merujuk kepada bukti serta keterangan-keterangan semasa
siasatan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS**

PERTANYAAN : LISAN

**DARIPADA : DR. MASZLEE BIN MALIK
[SIMPANG RENGAM]**

TARIKH : 7 MAC 2022 (ISNIN)

SOALAN:

minta **PERDANA MENTERI** menyatakan apakah mekanisme untuk rakyat memantau dan mengetahui aset dan pemilikan harta para pegawai tertinggi di agensi-agensi penguatkuasaan seperti SPRM, Imigresen, Kastam, PDRM demi menjamin integriti, ketelusan dan juga tahap akauntabiliti tatakelola Kerajaan di dalam agensi-agensi tersebut.

JAWAPAN

**DIJAWAB OLEH YB DATUK DR ABD LATIFF AHMAD
MENTERI DI JABATAN PERDANA MENTERI
(TUGAS-TUGAS KHAS)**

Tuan Yang di-Pertua,

1. Mekanisme untuk rakyat memantau dan mengetahui aset dan pemilikan harta Anggota Pentadbiran dan Ahli Parlimen telah diwujudkan melalui butiran perisytiharan harta yang dipaparkan di Portal Perisytiharan Harta (<https://mydeclaration.sprm.gov.my/>). Maklumat ini dipaparkan selama tempoh tiga (3) bulan dari tarikh penerimaan dokumen perisytiharan harta oleh SPRM selaras dengan Kod Etika bagi Anggota Pentadbiran dan Ahli Parlimen, Kerajaan Malaysia. Walau bagaimanapun, mekanisme bagi pegawai tertinggi Kerajaan untuk paparan harta kepada rakyat masih belum dilaksanakan.
2. Sebaliknya, mekanisme pemantauan di peringkat pegawai tertinggi pada masa kini dilaksanakan menerusi pemantauan di peringkat Ketua Jabatan yang digariskan di bawah Peraturan 10 dan Peraturan 11; Peraturan-Peraturan Pegawai Awam (Kelakuan dan Tatatertib) 1993 [P.U. (A) 395/1993].
3. Peraturan 10, [P.U. (A) 395/1993] misalnya telah memperuntukkan bahawa semua pegawai awam hendaklah mengisytiharkan secara bertulis kepada Ketua Jabatan masing-masing segala harta yang dimiliki olehnya, isteri, suami dan anak atau yang dipegang oleh mana-mana orang bagi pihaknya atau bagi pihak isteri atau suaminya atau anaknya.
4. Manakala Peraturan 11 menyatakan bahawa sekiranya pegawai ternyata menyenggara suatu taraf kehidupan yang melebihi emolumennya dan pendapatan persendirian lain yang sah atau mempunyai kawalan atau memiliki sumber-sumber kewangan atau harta, harta alih atau tidak alih yang nilainya tidak seimbang dengan emolument atau pendapatan persendiriannya yang sah, ketua jabatan hendaklah melalui notis bertulis, memanggil pegawai untuk memberi penjelasan

bertulis dalam tempoh tiga puluh (30) hari dari tarikh penerimaan notis bagaimana pegawai tersebut boleh menyenggara taraf kehidupan tersebut atau bagaimana pegawai mendapat sumber-sumber kewangannya atau hartanya.

5. Ceraian UP.7.2.6 Pekeliling Perkhidmatan Sumber Manusia (MyPPSM) pula memberi penjelasan dan panduan mengenai pemilikan dan perisytiharan harta oleh pegawai awam dengan lebih terperinci. Semua pegawai dikehendaki mengisytiharkan harta apabila:

- a. dilantik ke dalam perkhidmatan awam;
- b. dikehendaki oleh Kerajaan;
- c. memperolehi harta tambahan; dan
- d. melupuskan harta.

6. Perisytiharan harta perlu dibuat sekurang-kurangnya sekali dalam tempoh lima (5) tahun dan 'tempoh perisytiharan' harta dikira berdasarkan tarikh terakhir perisytiharan harta dibuat. Sekiranya dalam tempoh perisytiharan harta yang ditetapkan itu seseorang pegawai tidak memperolehi/membuat pemerolehan apa-apa harta tambahan atau tidak melupuskan apa-apa harta, maka pegawai berkenaan juga perlu membuat pengakuan mengenainya.

7. Pemantauan ke atas perisytiharan harta ini dilaksanakan secara berkala dan dilaporkan dalam Mesyuarat Jawatankuasa Pemandu HRMIS yang di Pengerusikan oleh Ketua Pengarah Perkhidmatan Awam Malaysia sebagai salah satu KPI yang perlu dicapai oleh Kementerian/Agensi.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : PUAN JUNE LEOW HSIAD HUI
[HULU SELANGOR]**

TARIKH : 7 MAC 2022 (ISNIN)

SOALAN

PUAN JUNE LEOW HSIAD HUI [HULU SELANGOR] minta **MENTERI PERUSAHAAN PERLADANGAN DAN KOMODITI** menyatakan berapa kadar prestasi keseluruhan pencapaian piawaian MSPO di negara kita khususnya di Hulu Selangor dan apakah usaha terbaru Kementerian dalam memerangi polemik minyak sawit yang masih hangat diperkatakan oleh komuniti antarabangsa.

JAWAPAN

Tuan Yang Di-Pertua,

Prestasi keseluruhan pencapaian Pensijilan Minyak Sawit Mampan Malaysia (MSPO) adalah dinilai melalui keluasan kawasan tanaman sawit yang berjaya dipersijilkan dengan pensijilan MSPO.

Untuk makluman Ahli Yang Berhormat, merujuk pada statistik terkini pencapaian pensijilan MSPO sehingga 31 Januari 2022, sejumlah 5,448,186.09 ha keluasan kawasan tanaman sawit bersamaan dengan 92.89 peratus telah dipersijilkan dengan MSPO di seluruh negara berbanding dengan jumlah keluasan tanaman sawit yang dilesenkan oleh Lembaga Minyak Sawit Malaysia (MPOB) pada 31 Disember 2020 iaitu sebanyak 5,865,296.91 ha.

Bagi daerah Hulu Selangor khususnya, sehingga 31 Januari 2022, sejumlah 10,776.03 ha keluasan kawasan tanaman sawit telah dipersijilkan MSPO bagi kategori estet dan 8,499.37 ha adalah keluasan tanaman sawit yang telah dipersijilkan MSPO untuk pekebun kecil tersusun. Manakala bagi pekebun kecil persendirian, keluasan tanaman sawit yang telah dipersijilkan adalah berjumlah 584.22 ha.

Dalam memerangi polemik minyak sawit yang masih hangat diperkatakan oleh komuniti antarabangsa, Kementerian Perusahaan Perladangan dan Komoditi (KPPK) telah memperkenalkan empat dasar baharu sejak tahun 2019 sebagai komitmen Kerajaan ke arah penanaman sawit mampan.

Empat dasar baharu tersebut adalah:-

- i. mengehadkan keluasan penanaman kelapa sawit seluruh negara dengan penetapan sasaran seluas 6.5 juta hektar sahaja;
- ii. melaksanakan larangan penanaman baharu sawit di atas kawasan baharu tanah gambut dan penetapan syarat serta

peraturan yang lebih ketat terhadap tanaman sawit di kawasan tanah gambut sedia ada;

- iii. melaksanakan larangan penukaran guna tanah Hutan Simpan Kekal (HSK) bagi aktiviti penanaman sawit atau tanaman pertanian lain; dan
- iv. menyediakan peta rasmi bagi kawasan tanaman sawit di seluruh negara untuk capaian umum.

Selain itu, Kerajaan juga telah melakukan semakan semula piawaian MSPO bagi meningkatkan kredibiliti piawaian MSPO dengan memasukkan elemen-elemen baharu ke dalam keperluan MSPO.

Elemen baharu MSPO yang mengetengahkan Matlamat Pembangunan Mampan (SDG) Pertubuhan Bangsa-Bangsa Bersatu (PBB) dijangka akan dapat membantu Malaysia dalam mendapatkan pengiktirafan MSPO di peringkat global. Antara elemen baharu adalah seperti;

- i. Nilai Konservasi Tinggi (*High Conservation Value* - HCV), yang menekankan tentang langkah-langkah yang bersesuaian bagi tujuan perlindungan spesis atau habitat;
- ii. Pengiraan Gas Rumah Kaca (GHG) yang melibatkan pengiraan, pengesahan dan pelaporan yang betul bagi pelepasan gas rumah kaca syarikat (ladang atau kilang) dengan mengambil kira data inventori mereka, contohnya jumlah bahan bakar, penggunaan elektrik, baja, racun rumpai yang telah digunakan, dan lain-lain inventori yang berkenaan dan;
- iii. Penilaian Impak Sosial (SIA), merupakan satu proses menganalisis, memantau dan mengurus impak sosial yang dijangka berlaku atau yang tidak terjangka, sama ada impak positif atau negatif yang terhasil daripada sesuatu langkah

intervensi (dasar, program, pelan dan projek) dan apa-apa proses perubahan sosial.

Untuk memperkuat lagi standard MSPO 2022, terdapat penambahan elemen baru iaitu Kelakuan beretika (*Ethical Conduct*), di mana elemen ini memerlukan komitmen yang tinggi dari pihak majikan dan organisasi. Semua organisasi diwajibkan untuk mematuhi kelakuan beretika dan anti-rasuah dalam hubungan perniagaan mereka dengan pekerja, komuniti dan pihak berkepentingan.

Selain itu juga, standard MSPO 2022 telah menambahbaik kriteria syarat pekerjaan, khususnya bagi definisi buruh paksa telah diperkukuh dengan merujuk kepada *International Labor Organisation Decent Work Agenda*. Tumpuan utama pada definisi buruh paksa di mana merujuk kepada kerja atau perkhidmatan yang dituntut daripada mana-mana orang di bawah ancaman penalti dan yang mana orang tersebut tidak menawarkan dirinya secara sukarela.

Piawaian MSPO yang dikemaskini ini dijangka akan dilancarkan pada pertengahan tahun 2022.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : DATUK SERI HAJI SALAHUDDIN BIN AYUB
[PULAI]**

TARIKH : 7 MAC 2022 (ISNIN)

SOALAN

DATUK SERI HAJI SALAHUDDIN BIN AYUB [PULAI] minta **PERDANA MENTERI** menyatakan adakah terdapat kesediaan Kementerian untuk membuat penelitian semula terhadap kadar Pendapatan Garis Kemiskinan (PGK) nasional setelah negara dilanda pandemik, krisis ekonomi serta isu banjir.

JAWAPAN

**DIJAWAB OLEH YB DATO' SRI MUSTAPA BIN MOHAMED
MENTERI DI JABATAN PERDANA MENTERI (EKONOMI)**

Tuan Yang di-Pertua,

1. Kadar kemiskinan di Malaysia adalah pada 5.6% pada tahun 2019 berdasarkan Survei Pendapatan, Perbelanjaan Isi Rumah dan Perkhidmatan Asas (HIES&BA) 2019. Pada tahun 2020, Jabatan Perangkaan Malaysia (DOSM) telah menganggarkan kadar kemiskinan meningkat kepada 8.4% akibat impak pandemik COVID-19 dan situasi ekonomi semasa.
2. HIES&BA sedang dilaksanakan oleh DOSM sepanjang tahun 2022. Berdasarkan survei terkini, kadar kemiskinan yang lebih relevan akan diperoleh kerana survei ini mengambil kira impak pandemik COVID-19, krisis ekonomi serta kesan banjir. Dapatan survei ini dijangka diterbitkan pada pertengahan tahun 2023.
3. Dalam masa yang sama, Kerajaan akan mengemas kini semula Pendapatan Garis Kemiskinan (PGK) 2022 untuk mengukur kadar kemiskinan berdasarkan tren pendapatan dan pola perbelanjaan rakyat serta mengikut harga barangan dan perkhidmatan semasa. Dapatan survei ini akan menjadi input asas dalam menentukan PGK 2022 baharu yang akan digunakan dalam mengukur kadar kemiskinan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : DATO' SERI HAJI IDRIS BIN JUSOH
[BESUT]**

TARIKH : 7 MAC 2022 (ISNIN)

SOALAN

DATO' SERI HAJI IDRIS BIN JUSOH [BESUT] minta **MENTERI PERUSAHAAN PERLADANGAN DAN KOMODITI** menyatakan langkah-langkah Kementerian bagi meningkatkan lebih ramai pekebun kecil 'pintar' dalam sektor industri hiliran agrikomoditi, khasnya dalam bidang teknologi pertanian moden.

JAWAPAN

Tuan Yang Di-Pertua,

Kerajaan komited untuk meningkatkan lebih ramai pekebun kecil 'pintar' agrikomoditi dalam sektor industri pertengahan dan hiliran. Kementerian Perusahaan Perladangan dan Komoditi (KPPK) melalui Agensi-agensi di bawahnya telah dan sedang menjalankan Penyelidikan dan Pembangunan (R&D) secara dalaman mahupun berkolaborasi dengan pihak swasta dan institusi penyelidikan tempatan dan luar negara untuk menghasilkan teknologi dan inovasi bagi meningkatkan pekebun kecil pintar khususnya dalam bidang teknologi pertanian moden. Antara lain usaha yang telah dan sedang dilaksanakan adalah seperti berikut:

- i. Lembaga Minyak Sawit Malaysia (MPOB) memperkenalkan aplikasi *Sawit Secure* bagi membantu pihak industri termasuk pekebun kecil dalam mendapatkan maklumat berkaitan dengan perosak dan penyakit utama pokok sawit dan membantu pekebun kecil mengemukakan pertanyaan di samping memuatnaik gambar berkaitan penyakit dan perosak di kebun sawit bagi mendapatkan penjelasan lanjut;
- ii. Membangunkan Sistem Maklumat Sumber Sawit (OPRIS) yang dapat menyediakan maklumat seperti jenis tanah, kesesuaian kawasan untuk tanaman sawit, agroiklim dan geospatial tanaman sawit. Maklumat ini dapat membantu dalam aktiviti pemetaan kawasan Kelompok Minyak Sawit Mampan (SPOC) terutamanya bagi membantu inisiatif Pensijilan Minyak Sawit Mampan Malaysia (MSPO) bagi kategori pekebun kecil sawit;
- iii. Lembaga Getah Malaysia (LGM) membangunkan beberapa teknologi seperti pembangunan Mesin Mengisi Tanah dalam Polibeg (SoFil) yang berkemampuan meningkatkan produktiviti serta kualiti kerana ia dapat mengeluarkan polibeg berisi tanah untuk kegunaan tapak semaian sebanyak 4000 beg sehari dengan tenaga 3 orang pekerja sahaja;

- iv. LGM juga telah melatih seramai 22 usahawan dengan masing-masing berjaya menginovasikan sekurang-kurangnya satu produk berasaskan getah seperti *NR composites paint for artwork (RRIMCOLOR)*, *NR latex based stationery adhesive (RRIM GLUE)*, *rubber speed bump*, *rubber interlocking mat*, *NR Latex for soles and foam*, *rubber sandals*; dan
- v. Lembaga Koko Malaysia (LKM) telah membangunkan aplikasi konsep pertanian presisi (*Precision Farming*) dengan aktiviti pengurusan ladang koko berasaskan teknologi pemetaan *Geographic Information System (GIS)* dan *Global Positioning System (GPS)* dan berjaya mengoptimalkan penggunaan input pertanian di tempat yang perlu pada masa yang tepat dalam masa yang betul.

Selain itu, KPPK melalui IMPAC (Institut Perladangan Dan Komoditi Malaysia) menerusi pusat latihannya, Akademi Hevea Malaysia (AHM) juga turut komited untuk memberi latihan dan kemahiran awalan kepada tenaga kerja tempatan sebelum ditempatkan di kilang/premis mengikut sektor-sektor pekerjaan masing-masing, meningkatkan kepakaran pekerja tempatan sedia ada dan memberi latihan kemahiran kepada pelajar-pelajar di institusi kemahiran. Secara tidak langsung ini juga dapat membantu meningkatkan tenaga kerja terlatih dengan teknologi di dalam industri agrikomoditi.

Kementerian juga sedia bekerjasama dengan Kementerian Sains, Teknologi dan Inovasi (MOSTI) serta Kementerian Industri Makanan dan Asas Tani (MAFI) dalam penyelidikan dan kajian yang berkaitan dengan tanaman serta pertanian di samping meningkatkan keupayaan dan kemahiran pekebun kecil pintar dalam sektor industri hiliran agrikomoditi.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS**

PERTANYAAN : LISAN

**DARIPADA : YB DATO' HAJI MAHFUZ HAJI OMAR
(POKOK SENA)**

TARIKH : 07 MAC 2022 (ISNIN)

SOALAN

DATO' HAJI MAHFUZ HAJI OMAR [POKOK SENA] minta **MENTERI KANAN KERJA RAYA** menyatakan apakah justifikasi mengenai perlanjutan konsesi syarikat Pintas Utama Sdn. Bhd. selama 6 tahun bermula 2021 hingga 2027 untuk projek pemantauan dan pembaikan cerun jalan persekutuan dan negeri dengan kos sebanyak RM300 juta dan telah menyebabkan dimonopoli oleh satu syarikat dan kos serta kadar harga yang tidak menguntungkan Kerajaan.

JAWAPAN

Tuan Yang Di-Pertua,

Untuk makluman Ahli Yang Berhormat, Kementerian Kewangan (MOF) telah meluluskan pelantikan syarikat Pintas Utama Sdn. Bhd. (PUSB) secara rundingan terus sebagai kontraktor bagi projek di atas bagi tempoh 3 tahun dengan opsyen tempoh sambungan selama 2 tahun tertakluk kepada prestasi syarikat.

Tempoh 3 tahun yang pertama bagi kontrak ini telah berakhir pada 31 Oktober 2020 dan MOF telah meluluskan tempoh pelanjutan kontrak untuk tempoh satu (1) tahun bermula 1 September 2020 sehingga 31 Oktober 2021. MOF juga turut menyatakan pelanjutan tempoh satu (1) tahun berikutnya boleh dipertimbangkan tertakluk kepada prestasi syarikat PUSB.

Kementerian ini selaku agensi pelaksana mencadangkan kepada MOF supaya kontrak penyenggaraan cerun ini diteruskan dengan model yang sama iaitu melalui satu kontrak jangka panjang untuk pelaksanaan kerja pembaikan dan pencegahan cerun. Kaedah ini dapat menyegerakan proses perolehan bagi memastikan pelaksanaan kerja pembaikan di tapak dapat dimulakan dengan segera dan lebih kos efektif. Syarikat ini juga bertanggung jawab sebagai pihak yang akan memberi respon pertama sekiranya berlaku runtuh cerun.

Sehubungan dengan itu, Kementerian ini telah mengemukakan syor untuk pelanjutan tempoh kontrak selama 1 tahun untuk pertimbangan dan kelulusan MOF. Oleh itu, penentuan tempoh kontrak baharu selama 6 tahun kepada syarikat adalah atas pertimbangan pihak MOF.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : DATUK SERI DR. SHAMSUL ANUAR BIN HAJI
NASARAH [LENGGONG]**

TARIKH : 10 MAC 2022 (SELASA)

SOALAN

DATUK SERI DR. SHAMSUL ANUAR BIN HAJI NASARAH [LENGGONG] minta **PERDANA MENTERI** menyatakan apakah perkembangan terkini prestasi dan pencapaian pelaksanaan sasaran Matlamat Pembangunan Mampan (SDG) 2030 serta apakah perancangan strategik yang dirangka oleh pihak Kerajaan bagi memastikan indikator-indikator yang disasarkan terus dicapai dalam tempoh krisis pandemik COVID-19 dan perubahan struktur ekonomi negara.

JAWAPAN

**DIJAWAB OLEH YB DATO' SRI MUSTAPA BIN MOHAMED
MENTERI DI JABATAN PERDANA MENTERI (EKONOMI)**

Tuan Yang di-Pertua,

1. Sejak negara menzahirkan komitmen dalam mencapai Agenda 2030 pada tahun 2015, Kerajaan telah melaksanakan pelbagai langkah untuk memastikan pencapaian matlamat pembangunan mampan (SDG). Pelbagai inisiatif telah dilaksanakan agar pemimpin di pelbagai peringkat terutama di peringkat akar umbi, pembuat dasar dan keputusan dapat menerima pakai, menerapkan dan melaksanakan SDG. Sehingga tahun 2021, langkah-langkah yang telah dilaksanakan bagi mempergiat SDG pada peringkat kebangsaan adalah seperti berikut:

- i. Penambahbaikan tadbir urus SDG dengan melibatkan pelbagai pihak berkepentingan seperti sektor swasta dan pertubuhan masyarakat sivil (CSO) untuk menganggotai Majlis SDG Negara, Jawatankuasa Pemandu dan Jawatankuasa Teknikal SDG;
 - ii. Mengarusperdanakan SDG dalam rancangan pembangunan negara dengan menjajarkan kesemua 17 SDG kepada strategi dan bidang keutamaan dalam rancangan pembangunan negara;
 - iii. Penyertaan persidangan berkaitan SDG di peringkat antarabangsa dan serantau seperti *Asia Pacific Forum on Sustainable Development* (APFSD), *ASEAN Forum on SDGs with National Development Planning Agencies* dan sebagainya;
 - iv. Penghasilan dan pembentangan pelaporan *Voluntary National Review* (VNR) dan *Voluntary Local Review* (VLR) di persidangan Pertubuhan Bangsa-bangsa Bersatu (PBB);
 - v. Melaksanakan program merakyatkan SDG (*SDG Localisation*) dengan melibatkan pihak berkuasa tempatan, sektor swasta, badan bukan Kerajaan (NGO), pertubuhan masyarakat sivil (CSO), ahli akademik dan belia dalam pelbagai inisiatif pembangunan sosioekonomi di peringkat tempatan;
 - vi. Melaksanakan inisiatif komunikasi, pendidikan dan kesedaran awam (CEPA) melalui penganjuran Malaysia SDG Summit pada 6-7 November 2019 di Kuala Lumpur Convention Centre, penganjuran siri webinar SDG 1, 2, 3, 4 dan 13 serta memenuhi pelbagai jemputan ceramah dan forum SDG oleh pelbagai pihak berkepentingan.
2. Manakala, dari segi pembangunan data dan indikator SDG, usaha berterusan yang dilaksanakan oleh Kerajaan termasuk:
- i. meningkatkan ketersediaan data dan indikator SDG secara berterusan.;
 - ii. penerbitan *My Local Stats*, yang memuatkan statistik sosioekonomi utama di peringkat daerah pentadbiran.; dan

- iii. memantau indikator SDG melalui sistem iaitu National SDG Progress Monitoring System yang telah dilancarkan pada 15 Mac 2019.

3. Secara keseluruhan, negara telah menunjukkan prestasi pencapaian SDG yang baik pada 2020 dengan 49 indikator (34%) merekodkan pencapaian positif. Walaupun berhadapan dengan pandemik COVID-19 pada tahun 2020, prestasi SDG negara adalah baik. Namun, terdapat indikator yang terjejas akibat krisis kesihatan yang melanda seluruh dunia. Berdasarkan 146 indikator, 49 indikator (34%) bertambah baik, 34 indikator (23%) tidak berubah, manakala 41 indikator (28%) menurun. Bakinya, 22 indikator (15%) adalah indikator yang tidak boleh diukur dengan statistik (*non-statistical indicators*).

4. Antara indikator yang bertambah baik ialah kualiti udara dan air, kes jenayah menurun, penggunaan internet meningkat, peningkatan wanita dalam jawatan pengurusan dan indikator insiden kecederaan pekerjaan yang boleh membawa maut. Antara indikator yang merosot akibat Pandemik COVID-19 ialah kadar pertumbuhan tahunan KDNK per kapita, bilangan penumpang di lapangan terbang serta kadar kemiskinan mutlak dan pengangguran.

5. Bagi mempergiatkan lagi SDG pada tahun 2022 UPE, JPM sebagai *focal point* SDG akan melaksanakan usaha seperti berikut:

- i. Merangka Pelan Hala Tuju SDG Fasa II, 2021-2025 (SDG Roadmap Phase II, 2021-2025) yang memberi tumpuan pelaksanaan SDG di peringkat tempatan;
- ii. Membangunkan satu pelan komunikasi yang komprehensif untuk menyebarkan maklumat mengenai SDG secara efektif;
- iii. Meningkatkan kesedaran awam mengenai SDG secara berterusan menerusi:
 - a. penganjuran webinar SDG;
 - b. penganjuran Malaysia SDG Summit 2022;
 - c. pewujudan SDG Center di UPE, JPM bagi menyebarkan maklumat SDG;
 - d. penerbitan artikel dan iklan SDG dalam media massa;

- e. penganjuran sesi libat urus bersama pihak berkepentingan termasuk sektor awam, swasta dan CSO; dan
 - f. pelantikan *SDG Ambassador*.
- iv. Meneroka kerjasama yang lebih erat dengan Sustainable Development Solutions Network (SDSN) melalui memorandum persefahaman (MOU) antara UPE, JPM dan SDSN/ Jeffery Sach Centre Sunway University bagi pelaksanaan kajian dan penyebaran maklumat.
- v. Mewujudkan dana bagi meningkatkan pelaksanaan *SDG localisation* oleh CSO dan enterprise social menerusi (*Rolling Plan 3-RP3*) yang disalurkan menerusi kementerian dan agensi berkaitan.
- vi. Meneroka kebolehlaksanaan pemberian insentif seperti anugerah *SDG* kepada *SDG Champions* sewaktu penganjuran Malaysia *SDG Summit 2022* bagi menggalakkan penglibatan sektor awam, institusi pendidikan, sektor swasta dan CSO dalam aktiviti dan program *SDG*.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS**

PERTANYAAN : LISAN

**DARIPADA : YB DATUK WIRA HAJI MOHD. ANUAR BIN
MOHD. TAHIR (TEMERLOH)**

TARIKH : 07 MAC 2022 (ISNIN)

SOALAN

DATUK WIRA HAJI MOHD. ANUAR BIN MOHD. TAHIR [TEMERLOH] minta **MENTERI KANAN KERJA RAYA** menyatakan langkah yang diambil Kerajaan untuk membantu kontraktor yang sedang melaksanakan projek Kerajaan yang terbeban dengan kenaikan mendadak kos berkenaan.

JAWAPAN

Tuan Yang Di-Pertua,

Untuk makluman Ahli Yang Berhormat, Kementerian ini mengambil maklum mengenai kenaikan harga bahan binaan di pasaran berikutan kesan pandemik COVID-19 di seluruh dunia. Satu kajian telah dilaksanakan oleh Jabatan Kerja Raya (JKR) berdasarkan kepada Siaran Khas 1, 2 dan 3 yang dikeluarkan oleh Jabatan Perangkaan Malaysia (Department of Statistics Malaysia-DOSM). Hasil kajian menunjukkan terdapat kenaikan kepada Indeks Kos Bahan Binaan Bangunan dan Harga Unit Purata bagi bahan binaan tersebut.

Bagi membantu kontraktor G1 - G2 yang dikategori sebagai kontraktor kecil dalam menghadapi cabaran kenaikan harga bahan binaan, Kementerian Kerja Raya (KKR) melalui Jabatan Kerja Raya (JKR) telah melaksanakan kajian terhadap jadual kadar harga yang dikhususkan kepada pelaksanaan projek kecil kerja undi kontraktor G1 dan G2. Dalam hal ini, Kementerian Kewangan telah mengeluarkan surat bertarikh 12 Julai 2021 bagi meluluskan penggunaan Jadual Kadar Kerja (JKK) Kejuruteraan Awam dan Bangunan Tahun 2021 yang berkuatkuasa mulai 1 Julai 2021 sehingga 31 Disember 2022.

Kerajaan juga telah bersetuju untuk melaksanakan Syarat Perubahan Harga atau Variation of Price (VOP) dalam kontrak kerja berikutan peningkatan ketara kos beberapa bahan binaan demi memastikan projek Kerajaan tidak terjejas dan dapat disiapkan mengikut jadual. Pelaksanaan Syarat Perubahan Harga ini dikuatkuasakan melalui Pekeliling Perbendaharaan PK 2.4 'Pelaksanaan Syarat Perubahan Harga (Variation Of Price – VOP) dalam Kontrak Kerja (Pindaan 1 Januari 2022) mulai 1 Januari 2021 hingga 30 Jun 2022.

Pelaksanaan syarat perubahan harga ini merangkumi kontrak secara konvensional dan juga kontrak secara Reka & Bina yang mana pengiraan

VOP dibenarkan sehingga tamat kontrak dan tertakluk kepada peraturan yang telah dinyatakan dalam pekeliling tersebut.

Bagi meneruskan kesinambungan dalam usaha untuk mengatasi peningkatan harga bahan binaan, kajian dan rayuan berkaitan VOP, Kerajaan sedang menimbang untuk pelanjutan VOP berdasarkan keperluan semasa.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : DATO' MOHD. NIZAR BIN HAJI
ZAKARIA [PARIT]**

TARIKH : 7 MAC 2022 (ISNIN)

SOALAN :

Minta **PERDANA MENTERI** menyatakan :-

- (a) apakah perancangan jangka masa panjang Kementerian dalam menghadapi ancaman serangan siber; dan
- (b) bagaimanakah Kementerian akan memastikan rakyat sentiasa bersiap siaga dalam mendepani ancaman dan serangan siber yang semakin berleluasa di sebalik kepesatan teknologi masa kini.

JAWAPAN

**YB DATUK DR. ABD LATIFF BIN AHMAD,
MENTERI DI JABATAN PERDANA MENTERI
(TUGAS-TUGAS KHAS)**

Tuan Yang Dipertua,

1. Strategi Keselamatan Siber Malaysia (*Malaysia Cyber Security Strategy* (MCSS)) merupakan perancangan jangka masa panjang dalam menghadapi ancaman serangan siber. Strategi ini dilaksanakan melalui pendekatan *Active Cyber Defence* di mana tindakan menangani risiko ancaman siber dilaksanakan di peringkat nasional, sektor dan organisasi. Pelaksanaan strategi ini akan meningkatkan kesediaan negara menangani ancaman siber dengan mempunyai keupayaan untuk meramal, mengesan, menghalang dan bertindak balas dengan berkesan.
2. Pelaksanaan MCSS akan turut menumpukan kepada peningkatan keupayaan Pusat Penyelarasan dan Kawalan Siber Negara (*National Cyber Coordination and Command Centre* (NC4)). Selain itu, Arahan Majlis Keselamatan Negara (MKN) yang baharu iaitu Arahan MKN No. 26: Pengurusan Keselamatan Siber Negara telah diluluskan oleh Sidang MKN. Arahan ini menggariskan struktur tadbir urus keselamatan siber yang lebih jelas termasuk peranan NC4 sebagai Pasukan Tindakbalas Kecemasan Komputer (*Computer Emergency Response Team* (CERT) Negara).
3. Dalam memastikan rakyat sentiasa bersiap siaga dalam mendepani ancaman dan serangan siber yang semakin berleluasa, tonggak 4 dalam MCSS memfokuskan kepada Pembangunan Kapasiti dan Keupayaan, Kesedaran dan Pendidikan. Tonggak ini dilaksanakan melalui tiga (3) strategi di bawahnya iaitu mempertingkatkan kapasiti dan keupayaan keselamatan nasional; mempertingkatkan kesedaran keselamatan siber; dan memupuk pengetahuan keselamatan siber melalui Pendidikan. Antara pelan tindakan yang sedang dilaksanakan MCSS adalah untuk membangun dan melaksanakan Pelan Induk Kesedaran Keselamatan Siber yang komprehensif di peringkat nasional. Tujuannya

adalah untuk memastikan setiap inisiatif program kesedaran keselamatan siber dalam bidang keselamatan siber adalah terselaras dan bersepadu.

4. Di samping itu, inisiatif MyDIGITAL yang merupakan usaha negara ke arah berpendapatan tinggi dengan berpacuan teknologi dan pendigitalan turut menfokuskan kepada keperluan meningkatkan kepercayaan dan amalan beretika dalam penggunaan data dan teknologi serta kesedaran keselamatan siber.

5. Inisiatif ini adalah untuk memastikan objektif sebagai peneraju serantau ekonomi digital tercapai yang turut diselaraskan dengan program dan aktiviti dibawah tonggak 4 MCSS.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT
PARLIMEN KEEMPAT BELAS 2022**

PERTANYAAN : LISAN

DARIPADA : TUAN NOOR AMIN BIN AHMAD [KANGAR]

TARIKH : 7 MAC 2022 (ISNIN)

SOALAN

Minta **PERDANA MENTERI** menyatakan kesan perbezaan keputusan fatwa atau pendekatan pentadbiran agama di negeri-negeri. Apakah langkah Kementerian untuk menyelaraskan fatwa dan pendekatan yang berbeza ini bagi mengelak salah faham terhadap Islam.

JAWAPAN

**YB SENATOR DATUK HAJI IDRIS BIN HAJI AHMAD
MENTERI DI JABATAN PERDANA MENTERI (HAL EHWAL ISLAM)**

Tuan Yang di-Pertua,

1. Perbezaan keputusan fatwa di antara negeri-negeri adalah tidak dinafikan berlaku. Walau bagaimanapun, ia hanya berlaku dalam beberapa isu yang lebih menjurus kepada isu setempat. Ini adalah kerana masalah dan keperluan setiap negeri adalah berbeza di antara satu sama lain dalam mempertimbang dan memutuskan sesuatu. Antara tahun 1957-2014 hanya 17 fatwa yang berbeza antara negeri-negeri.
2. Di peringkat pusat, Jabatan Kemajuan Islam Malaysia (JAKIM), selaku urus setia Mesyuarat Jawatankuasa Muzakarah Majlis Kebangsaan Bagi Hal Ehwal Ugama Islam Malaysia (MKI), berperanan untuk menyelaras pandangan hukum terhadap isu-isu berkaitan hal ehwal Islam yang bersifat nasional. Enakmen Pentadbiran Agama Islam Negeri-negeri telah memperuntukkan berkenaan dengan rujukan isu-isu berkaitan hal ehwal Islam yang bersifat nasional kepada Jawatankuasa Muzakarah MKI. Bagi mewujudkan keselarasan, setiap pandangan hukum yang dikeluarkan oleh Jawatankuasa Muzakarah MKI akan diangkat untuk perkenan Majlis Raja-Raja untuk tindakan pelaksanaan di peringkat negeri.
3. Kerajaan juga sentiasa memberi perhatian terhadap aspek penyelarasan fatwa dengan mengadakan program-program pendidikan hukum dan fatwa dalam pelbagai isu dan bidang seperti Seminar Pendidikan Fatwa Peringkat Kebangsaan dan Multaqa Jawatankuasa Fatwa Seluruh Malaysia bagi menyelaras dan memberi kefahaman yang jelas tentang isu-isu hukum dan fatwa kepada seluruh umat Islam.

Sekian, terima kasih.